

En latanta mert. En kosmar  
repete. En lafore efreyan. En  
dayri ranpli avek sekre. Mark,  
aze 18 an, ti vwar son lavi devir  
anba lao dan les pas detrwa  
semenn. I ti pe fou? I ti'n ganny  
andoye? Avek en kriminel lo  
son talon, i ti napa bokou letan  
pour desifre sa mistè ki i ti a pe  
viv.



*Lise Morel*



*Letranze*

*Dan Mwan*

*Kouvertir par: Gerald Luc*

**PREMYE PIBLIKASYON 2003**


**PAR**

**LENSTITI KREOL, LAKAZ SEN ZOZEF, O-KAP**

**©2003 LENSTITI KREOL**

**ENPRIMEN PAR PRINTEC PRESS HOLDINGS  
MON FLERI**

ISBN: 99931-50-81-2



*Letranze*

*Dan Mwan*

*Lise Morel*

*Retranze*  
*Dan Mwan*

*Kouvertir par Gerald Luc*

**LENTITI KREOL, LAKAZ SEN ZOZEF, O-KAP**  
**©2003 LENTITI KREOL**

**ENPRIMEN PAR PRINTEC PRESS HOLDINGS**  
**MON FLERI**



### **Not Lo Loter**

Lise Morel ti ne Sesel an 1966. I'n lekol Seychelles Polytechnic avan fer en 2<sup>em</sup> degre dan domenn elektronik Liniversite Chemnitz-Zwickau, Lalmanny. Son pli gran sikse dan literatir Kreol se en seri zistwar kourt avek tit Mon Lonbraz ek Mwan. I osi ekrir poenn ek zistwar pour manrmay.

Lise i annan en garson aze trwa an e i travay dan lavyasyon sivil.

An alan simityer  
Mon ti zwen en vye granwar  
pe manz son leker  
Mon ti demann li -  
i bon zanmi?  
move, move -  
me mon manz li malgre i anmer  
mon manz li akuz i mon leker.

## Prolog

### Zilyet 1978

*Labrin. Lao lo Montanny Mon Plezir, dernyen reyon soley ti filtre ant fey bann gran gran pye dibwa lafore ki ti toultour li. Lafoumbal, pouse par divan vannswet, ti trenn bann fey sek an tourbiyon; en papiyon mor, lezel kase; latmosfer maron, epi roz, epi mov. En tourtreldézil ti roukoule par la anler dan en pye dibwa, en son melankolik, tris, konmsi i ti sagrinen pour sa lazournen ki ti pe terminen. Me li, i pa ti ni remarke, ni tann nanryen. Son konsantrasyon ti lo sa fanm.*

*I ti obzerv sa fanm kot i ti pe ale vini anba lavarang pe dispit avek son mari, avek en regar entans, ki ti paret tranble ler parey lasaler lo koltar so. En varyete lemosyon ti frisonn li - dezir, melanze avek en latandres etranz. Lafreyer, leksitasyon ek en latras remor pour sa ki i ti pe mazin fer. Dezir. Zanmen i ti'n deza resanti koumsa avan.*

*Sa fanm ti sot deor e avans dan kote lakaz, en mouvman enkonnyaman elegan, malgre lakoler ki ti'n donn son lizye nwanr en lekla ekstra. Divan ti fwet son zip gode plake ant son lazanm, e montre son laform. Tournir son tete ti pe monte desann dan son lekor rob. I ti perdi li en moman, alors i ti bouz en pti pe ant bann pye dibwa pour li nabou kontinyen get li. I ti tras e kares sa laform feminen dan ler. I ti soupire... manifik! Zanmen i ti'n deza war en kreatir osi manifik! I ti konnen ki enn de fwa sa fanm ti'n santi son prezans; en apremidi i ti pe lav zafer dan lakwizin, i ti arete toudenkou e fikse ver lafore kot i ti ete. I ti paret enkyet e apre i ti vin tak laport devan.*

*“Ou ti promet, ou ti promet mwan ...” sa fanm ti vire pour kriy avek son mari, ki ti ankor anba lavarang.*

*“Fou mwan lape ou fanm,” sa zonm ti reponn son madanm e li osi i ti sot deor e diriz ver lafore, direkteman lo sa bann pye dibwa kot li i ti ete. Sa zonm ti aret detrwa met avek li, ouver son labraget pour li gat delo.*

*I ti get sa zonm kot i ti pe pise e fer en grimas avek son labous, en kreatir mizerab ki pa rekonnèt boner ki i ti annan dan son lanmen. Ti annan detrwa zour depi ki i ti pe obzerv sa koup, fasinen par sa fanm. Toulezour sa zonm ti lev diskisyon kot son lakour. I pa ti konpran lo ki tenm diskisyon ti ete, me i ti rekonnèt lakoler e ladetres sa madanm sak fwa ki zot ti dispit. Lapliparditan sa zonm apre ti devire e ale, e rantre tar aswar pour dormi.*

*En glisman lonbraz.*

*Alerte, sa zonm ti vire e son lizye ti ouver pli gran avek sòk e en lafreyer sibit, swivi par en tourdisman vyolan e en lanvi vomi, e apre - en nean.*

## Sapit 1

Out 1997

I a telefonn Tanya, i pa a telefonn Tanya? Ou a dir ki sa ki'n fer li fer sa? Kekfwa i ti *crazy* pour li, me eski ou kapab *crazy* pour en dimoun ki ou'n fek zwenn? *No way! Well*, i pa tro konnen - kekfwa. Li, i ti move dakor avek sa fiy. Non, i ti move dakor avek sa fiy avan sa, la i pa ti sir. *I mean* si i ti fer sa avek tou boug ki i zwenn ... I a telefonn li, i a demann li. *Shit! Deza Vandredi!* En semenn deza! Dwatet Tanya ti pe pran li pour en salo.

Mark ti zet en regar lo son mont - de er en kar. Laklas Zan-Iv ti fini de er edmi. I ti rearanz li en pti pe pli konfortab avek miray koridor lekol kot i ti pe apiye pour esper son dalon pour zot mont ansanm. Ti fer so, malgre divan vannswet ti pe vante. Mark ti mat son latet en pti gin pour les reyon soley bril son lapo figir, anmenmtan ki en pti divan dou ti kares li; en sansasyon so ek fre ki ti erotik dan li menm. Son lespri ti ale. Dan en pti lespas letan lavwa persan Madanm Dirip dan laklas akote, ki ti pe eksplik lanplwa sibzonktif dan lalang franse, ti dizoud dan lwen. I ti aret tann kriye manrmay ki ti pe fer sport lo laplenn deryer oditoryonm.

Pour en zoli fiy parey Tanya zis tonm anmoure avek li koumsa, pouf! Si i ti en smart boug parey Zan-Iv kekfwa. I'n fatigue war bann fiy feb ler Zan-Iv i koz avek zot. Me li, personn pa ti antren li! I vre ki fizikman, i ti napa nanryen spesyal. I pa ti ni gran, ni pti, ni gro, ni meg; en pti tre sinwan, erite par la dan son zanset; en nennen ase plat, lizye gri, seve nwan, drwat. I vre osi i ti en pti pe timid. Dimoun, bann fiy sirtou, ti toutan

konsantre lo laparans, lakok ki ou ti prezant avek zot. Salerla si zot ti konsantre en pti gin, zot ti pou remarke ki i ti koul. I ti annan en bon leker. Dan son fason pour li, i ti tre komik. I pa ti fer en ta welele pour atir latansyon lo li, me i ti annan laganm, son parol toultan byen plase. Enn ler i krwar, i ti tro kontan reve, me omwen dan son bann rev, i pa ti zis komik, i ti koul, i ti sarman. I ti en ero. Bann kwever ti grennen lo li. I pa ti zanmen begeye e vin rouz letan en fiy ti koz avek li.

Son respirasyon regilye, son lizye demi fermen, son lespri ti sorti lo Tanya; i ti pe apiye avek en miray dan en lasal pe get bann koup pe danse. I ti tir son brike lor, e alim son sigar. Son lanmen ti frot avek son pistol dan pos dyaket son sout. Atraver lafimen, i ti obzerv lasal. I ti en boug danzere ...

I ti pres pour mank Zan-Iv ler i ti pas lobor li. Mark ti redres li e otomatikman swiy lapentir blan ki ti'n kol avek son lebra.

“E Yo! La mon la. Ki dil? Mannyer tes Franse ti ete?” I ti demann Zan-Iv.

De zour Zan-Iv ti'n fatig li avek sa tes franse - *i'n je suis, tu es* tou lazournen. Tes Franse ti pour sa apremidi.

Me Zan-Iv pa ti reponn li. Zan-Iv ti pe vir son latet par isi, vir laba, paret pe rod kelken e i ti inyor li.

“Zan-Iv, *bro...*”

O menm moman Danyel ti aprobe, “E, Zan-Iv, ou pe monte?”

“Wi, me mon pe esper Mark. Ou'n war li?”

“Mark ti lib apremidi. Dwatet i'n fini monte.”

Mark ti fer en pti riye konfize e sakouy son lanmen devan zot figur,

“Ee.. *come on* bannla! Ki sa en nouvo bat latet sa?”

Son de dalon pa ti reponn li menm. I ti reste kouyon pour war zot vir lo zot pa e diriz ver baro lekol. Be ... e, ki ti pe arive? I pa ti ganny en konpran. Zot ti pran semen Mon Plezir. Konfize e en pti pe ofanse, Mark ti swiv zot deryer. Ou a dir en nouvo trik ki bann la ti pe zwe lo li ouswa i'n fer keksoz pour ofans zot? Me i pa ti rapel fer nanryen *well*, ti annan sa zafer Tanya. Ou a dir Zan-Iv in tann keksoz? Me Zan-Iv ti son *best friend*, si i ti'n annan keksoz, Zan-Iv ti en boug fran, i ti a'n dir li.

Danyel ek Zan-Iv ti reste Mon Plezir parey li menm, me li i ti reste pli lwen ankor ki zot. I ti kit grannrout e mont dan en pti santye ankor en bon bout avan ki i ti ariv se li. En non *stupid* sa landrwa ti annan. Sa ki li i ti war, ti napa okenn plezir dan mont sa montanny! Semen Mon Plezir ti fer li mazin en koulev ki ti grenp sa montanny avek son lake dan Lans Rwayal, son latet dan Lans Lwi; en semen later rouz, ki ti zis ase larz pour en veikil pase alafwa. Ou ti transpire gro konman ledwa an montan! Oke, wi, kekfwa son panorama letan ou'n ariv anler ti vo lapenn. Ou ti dekouver labe Lans Rwayal an antye!

Lapli ti'n fer en bon tonbe son lavey, larivyer ti plen. I ti tann delo pe devide dan ros. Mark ti kontinyen swiv Danyel ek Zan-Iv a en zistans. Zot pa ti vir deryer pour

get li, me kontinyen en konversasyon byen animen. Ki zot ti pe rakonte? Zot ti pe koz lo li? En lanmin lo son fron, i ti pret zorey. Zot ti pe diskrit foutbol!

Montanny ti konmans apik e i ti bezwen aplik li pour li monte. Pa normal kimannyer bannla pe koul! Zan-Iv ti swadizan son meyer zanmi! Depi ki Zan-Iv ti'n vin dan laklas katriyenm lekol Lans Rwayal, zot ti dalon; i ti ankor rapel li byen menm - en pti garson meg meg, pli pti ki li, me depi NYS, i ti'n fil en kou an gran, i ti'n depas li. I ti'n ganny en gran gabari e sport ti'n devlop son misk. I pa ti kapab konmpit avek Zan-Iv, me i pa ti tro mal, nonpli. Ou ti kapab konpran aköz bann fiy ti atrakte avek Zan-Iv. I ti mars avek souples en leopard, son lapo bronze, son seve gri, boukle, ki ti annan tandans tonm lo son fron; sa lizye moker, kouler gri-ver ti ase pour rann bann fiy gaga. Konpar li avek Danyel. Obor Zan-Iv, Danyel ti paret pti, kare, me osi byen miskle - en toro nwanr, pwisan, en pe efreyan ziska ler i ti riye. Son sourir ti transform son figir, son lizye ti ferm preski net, en trou-d-bote ti aparet lo sak kote son lazou. I ti korek Danyel *well*, normalman, letan i pa ti pe koul en mannyer!

I konnen plen dimoun pa ti konpran lanmitye ant Zan-Iv ki ti en tapazer ek li ki ti plito trankil, en *dreamer* konmsi, me zot ti konplemant kanmarad tre byen. Li, i ti toultan annan lide ki Zan-Iv ti met an aksyon. Ti annan enn de pti lavantir, ki'n met zot dan en ta problemm. Mark ti sourir, apre i ti remet son lanmin lo son fron.

Danyel ti ploy anndan kot li, Zan-Iv ti kontinyen. Zan-Iv ti annan ankor en bout pour li ale. *Yes*, i ti pou bezwen

koz avek li prezan! *No way*, i ti pou kapab kontinyen inyör li! I ti konn Zan-Iv, li. Mark ti mars pli vit pour rakoursi zistans ant li ek Zan-Iv. Arivan gal gal avek Zan-Iv, Mark ti soke ler Zan-Iv pa ti koz avek li menm. I ti ser son lalev - les li, i pa pou flat li, ki i fer li? Nanryen!

Apre ankor en lamars senk minit, Zan-Iv osi ti koup anndan se li. Mark ti get li dan kwen son lizye. Ni fer en zar get li, Zan-Iv pa ti fer! I ti kontinyen son semen. I ti kit grannrout e pran santye ki mont kot li. Ti annan landrwa zot ti'n bezwen fer mars peron dan lateras - 21 mars peron, i ti kapab mont lizye fermen. Letan lapli, sa later rouz ti fer en sel labou. Ou pa ti war lakaz kot i reste ziska ki ou ti pet lo ter; en pti lakaz blan, twa rouz avek en gran lavarang devan. Dan kote ek deryer lakaz, gran bwa ti konmanse. Apre gran bwa, Piton de Leboulis ti asiz parey en larenn lo son tron, pe sirvey sa kanton.

Konman Mark ti met lipye anba lavarang kot li, i ti tann telefonn pe sonnen. Dwatet son tantin pe gete si i'n ariv lakaz. I ti reste avek son tantin Lina, ki ti sef telefonis kot *Cable&Wireless*, lakonpanyen telefonn prensipal dan Sesel. Lakaz ti aktyelman pour li. Son tantin ti'n vin reste avek li wit an pase apre lanmor son manman, ler i ti ankor annan zis dis an.

Mark ti depese, tir lakle dan son sak, ouver laport devan pour li al reponn. Telefonn ti lo en pti latab dan en kwen salon.

“Alo...”

“E menn! Mon'n *knock* sa franse *one time*. Si mon pa



ganny en B, mon pa konnen! En, mon ti krwar ou ti pou esper mwan apre lekol.”

Mark ti sezi. Ti Zan-Iv lo telefonn e ti napa okenn laparans dyok dan son lavwa, me avan ki i ti kapab sirmont son sezisman e dir keksoz, Zan-Iv ti kontinyen,

“Desann taler nou ava al tap tap boul lo laplenn. Ou rapel sa pti kwever seve rouz? Mon'n konn son non - Tanya i apele. Kekfwa i a vin lo laplenn. Oke? Mon a war ou apre. Pas kot mwan.”

I ti apenn ganny letan dir wi avan ki Zan-Iv ti koup telefonn. I ti soupire; Tanya. I ti pou bezwen rakont Zan-Iv ...

Mark ti travers salon, pran koridor pour al dan son lasanm. En kote koridor ti annan lasanm Tant Lina, en lasanmben ek en pti stor. Lot kote ti annan son lasanm, dan bout devan lakaz, apre en lasanm pour konpanyen ki zanmen zot ti gannyen. Zis Zan-Iv ki ti vin pas lannwit kot li parfwa e zot ti plifere ris en pti kempbed akote son lili pour Zan-Iv dormi lo la.

I ti poz son sak ater lo bor son biro e tonm vant anler lo son lili.

Ki kalite trik Zan-Iv ti pe zwe?

## Sapit 2

Son lasanm ti ase pti. I ti'n ganny penn blan parey tou lezot lasanm dan lakaz. En ranze louver s ti vir lo devan e ou ti kapab war lanmer ble pe santiye dan soley dan lwen. Lot ranze lafnet ti dan kote lakaz ki ti vir ver lafore. Pour en rezon ki i pa ti tro konpran li menm, sa lafore avek son bann zwe lonbraz sinis ti toultan donn li frison e fer son seve drese. I pa ti zanmen al pronmnen laba, e i ti annan en tandans - enkonsyan - pour menm evit get dan sa direksyon.

Lo son biro ti annan son konpiter, ki son tantin ti'n fer li kado pour nwel. I ti konnen ki son tantin ti'n bezwen fer en bon seving s pour nabou aste li en tel kado e i ti vremen apresye sa. Son biro ti form parti en letazer ki ti kouver en kote miray antye, avek en larmwar dan kwen. I ti'n aranz son bann liv, a son porte, lo letazer pli ba. I ti'n met bann souvenir son lanfans lo sa de lot letazer pli o, en varyete pti loto, en koleksyon kannet dan en poban ek en larme pti solda ver an plastik dan tou sort pozisyon lager. De gran poster ti dekor lot miray - Kim Basinger demi touni lo enn, *X-file* lo lot. Son lili ti dan kwen anfas larmwar.

Mark ti get sa bann lobze avek lafeksyon e nostalzi. Ti annan detay son lanfans ki i ti rapel klerman. I ti rapel bann Dimans apremidi kot ti so, so. Soley ti zis fil li lanmenm dan en lesyel ble eklatan, san nyaz. Lanatir ti pli ver e pli tris ki labitid. I ti sov lakaz avek son bann komiks anba son lebra pour al rod lafreser obor larivyer. Gran pye Albizia ek pye lafous ti pous dan de kote larivyer e donn en bon lonbraz. Lalyann marya anpandan avek pye dibwa ti trenn dan delo. Delo fre e

kler ti pas par anba en gro glasi pour form en pti basen avan ki i ti kontinyen son desant rapid dan laform en pti kaskad. Anba ros ti annan angi ek gourzon. I ti mont anler lo sa gro glasi pour li lapes gourzon. I ti servi difil koko konman laliny avek en morso fey lewouy anmare dan bout pour labwet. I ti larg son laliny dan delo, apre tonm vant anler e ouver son magazin. Mark ti sourir tousel.

Me, apre lekspresyon Mark ti asonbri. I ti rapel osi latristes son solitud. I ti touzour tousel, tousel avek zis son limazinasyon konman konpany. I sipoze sanmenm sa ki'n fer li timid - i'n tro tousel. I ti envant bann kanmarad imaziner pour li zwe avek. Son manman pa ti zanmen les li al zwe kot bann lezot manmay dan kanton, e kantmenm i pa ti pou pous zot si zot ti vin zwe avek li, son manman pa ti ankouraz zot nonpli. Drolman, son zanmi imaziner prefere, pa ti en pti garson son laz, me en granpapa - Granpapa Tann. I pa ti kapab plas en figir lo sa granpapa, me i ti rapel tre klerman son non. Ti annan osi en eleman misterye ki ti toultan egziste dan lakour lontan - en tansyon ekspektan, bann mirmire dan lannwit, bann lonbraz ilizwar, sekre ki ou ti krwar ou pres pour dekouver me ki ti toultan esap ou. Mark ti frisonnen.

I ti zet en koudey lo revey lo son latab-de-nwi; kat er mwen en kar. Tant Lina ti normalman ariv kot lakour dan pti senk er sonnen. Sifo i leve, i al fer enn de pti korve avan, si i pou al lo laplenn avek Zan-Iv, sankwa Tant Lina i a fer en sel kankan apre.

Tant Lina ti strik, li. I pa ti parey son manman. I sipoze letan ou gran ser ou ti bezwen pli serye. Avek son gro

seve, ki i ti tenn nwanr pour kasyet son seve blan, son zoli lizye mov-nwanr kasyet deryer en gro linet bar lor; letan Tant Lina ti met sa linet lo bout son nennen, e get ou par lao, en sel regar ti ase pour fer ou *feel* en mannyer. Enn ler sifo i ti pran en roten, i ti bat ou.

Ou a dir akoz Tant Lina zanmen in marye? Enn ler i ti anvi demann li. Kekfwa en boug in kas son leker letan i ti ankor zenn? Konmela son lekor ti arondi avek laz, me letan i ti zenn, dwatet i ti ase korek. Anplis i ti annan sa sourir - en sourir ki ti rar parey zetwal filant; rar akoz ou ti rarman war li, rar akoz i ti en mervey ki ti dir tro kourt. Zan-Iv ti enn sa bann dimoun spesyal ki ti kapab fer Tant Lina sourir. I vre ki Tant Lina ti en pe vye mod dan son fason e i pa ti tro konpran Mark, me i pa ti en move dimoun. Pourvi ki i ti akord li respe ki i ti demande, ede fer bann pti korve kot lakour, zot ti debrouy byen ansanm. I ti manz aler, i ti mars prop, me ti napa sa rapor pros ant li avek son tantin, ki i ti annan avek son manman lontan. Pa ti fasil, konmsi, pour zis ale donn Tant Lina en *hug*.

Mark ti leve e ris tapi drwat lo son lili, apre i ti al lakwizin pour fer en tas dite. I ti grat lari deryer lakaz, anmas bann fey frisiter sek ki ti'n tonbe. I tir en morso pwason dan frizider pour met *defrost* - Tant Lina i a fer bouyon letan i vini. Apre i ti met son soulye football anba son lebra e i ti diriz an desandan pour al zwenn Zan-Iv.

“Zan-Iv, annou!” Mark ti kriye arivan dan bout lale. En pti moman apre Zan-Iv ti sorti. I ti pe manz en mang e i ti ofer li en bout. Zot ti desann. Apre ki son labous ti'n vid, Mark ti sey lev topik sa lensidan boner.

“Zan-Iv, ki ti arive taler?” I ti konmanse, en pti pe ezitan.

“Kan? Kwa ?” Lapant desant semen ti fors zot mars demi an tayan.

“Mon ti esper ou apremidi kot lekol ...”

“Be kot ou ti ete menn? Mon'n rod ou pàrtou.”

“Ki ou *mean*, ou'n rod mwan? Mon ti lanmenm dan koridor. Ou ek Danyel, zot fer konmsi zot pa war mwan!”

“Be, zanmen menn. Akoz nou a fer sa?” Ti annan konfizyon dan lavwa Zan-Iv. Me avan ki Mark ti kapab reatak li lo sa size, Zan-Iv ti lans dan en deba dernyen rankont lekip foutbol Sen Misel avek Sunshine, e Mark ti bezwen les sa topik tonbe.

Zot ti tap tap foutbol ziska dan pti sis er. Apre byen fatigue, zot ti tonm en kou anba pye kalisdipap lanmenm obor laplenn pour retir zot soulye e bwar en kola.

“En, ou'n realize ki ou annan en fàn?” Zan-Iv ti demann Mark toudenkou. I ti pe delarg son lase pour li tir son soulye.

Leker Mark ti sote - Tanya!

I ti war Tanya dan son lespri, Tanya avek son gran seve rouz ek bann pti pete denn lo son bout nennen; son pti leren fen ek son gro tete. Mon Dye! Sa tete! I ti dan lekol Biznes, e i ti vin vin get bann zwe sport lo laplenn Politeknik enn ler. Zan-Iv osi ti'n met leker lo sa kwever, me pour en fwa, se li ki ti'n fini fer sikse. I pa ti kapab anpes son lalev fer en pti sourir byen satisfè,

konmsi sat ki'n vol dile. I pou bezwen rakont Zan-Iv me, kimannyer Zan-Iv ti pou reazir? I ti en pe enkyet. Plito i rakont li en lot ler, dan en landrwa pli apropiye.

Semenn pase, son bi ti'n monte konmdi granmoun. I ti'n ganny sans fer konversasyon avek Tanya letan i ti'n al aste limonnad laboutik pandan ki Zan-Iv ti pe zwe foutbol. Zan-Iv ti zwe byen foutbol tandiski li, i ti napa en tro gran gran skil pour sa. I ti dan tim plito pour li akonpany Zan-Iv e bannla ti met li konman rezerv. Annefe, se plito Tanya ki ti'n swiv li laboutik e ti kler ki i ti enterese avek li. Zot ti koz koze. I ti anvoy latet e tre vit i ti ganny randevou son Sanmdi borlanmer. Randevou ti al tre byen. Randevou ti al plis ki byen e, i ti fini dan en fason ki i pa ti'n ni menm rev lo la. Tanya ti sedwir li konpletman. Apre an montan, i ti santi li en pti pe dezapwente. I ti'n vreman met leker lo sa fiy e i ti dezapwente pour dekouver ki i ti fasil, tro fasil. Wi, i pou bezwen rakont Zan-Iv ki i ti'n fini pase laba.

“Laba,” Zan-Iv ti kontinyen avek en laganm, “Mon krwar sa boug i fenmsi ou!”

Mark ti vir dan direksyon kot Zan-Iv ti pe montre. En ventenn met avek zot, Zorz ti pe apiye avek en pye koko. I ti pe get zot.

“Ar *shit*! Mon plito krwar ki i plis ou stay!” i ti replike, “Zan-Iv mon piti, ou soulye i bez pi!”

I ti bis Zan-Iv en kalot lo son ledò. Zot ti riye.

“Non, serye menn. Ou'n realize ki sa dernyen tan partou kot nou ale sa boug i la?” Zan-Iv ti dir li, “E, i toultan pe

koul lo ou.”

Mark ti fer en pti grimas degoute.

“Ou konn li?” Zan-Iv ti demande.

“Zorz. I dan trwazyenm lannen akademik. Ou konn li, ou. I reste la anba dan plato Lans Rwayal.”

Zan-Iv ti is zepol, an siny petet.

“I konmans nerv mwan sa boug. Annou al fer en pti koze avek li.”

“Akfer? Les tonbe menn.”

Mark ti ay agresivite dan okenn form. I ti anvoy son lanmen pour retenir Zan-Iv, me Zan-Iv ti'n fini leve e i ti pe mars dan direksyon bougla. Mark ti bezwen leve e swiv. Zan-Iv! I ti toultan pe met zot dan problemn! Pli ki zot ti apros Zorz, Mark ti realize ki Zorz ti pe get li, e zis li, avek en konsantrasyon total. I ti konmans santi li enkonfortab.

“Yo, ki dir?” Zan-Iv ti tap Zorz avek son ledwa lo son zepol, “Konmsi mon war ou pe koul lo nou for! I annan keksoz?”

Zorz ti vir an gran pour get Zan-Iv. Son figir degize, i ti kras avek Zan-Iv konmsi en sat maron, son lizye rouz ranpli avek laraz. Soke, Zan-Iv ti rekil en lepa. I krwar ki Zan-Iv ti'n oule zis anbaras Zorz e i pa ti pe ekspekte sa laraz fou.

Zorz ti retourn son regar lo Mark, en regar ki ti pe reyonn non par ladmirasyon, me en laenn vivan. Regar

Mark ti krwaz e retenir sa ki pour Zorz en long moman, apre Zorz ti devire, e san dir en mo, i ti ale. Mark ti santi kot disan i kit son figir en sel kou. I ti asire ki son figir ti'n vin blan. Ou ti a koup li, i pa ti pou sennyen! I ti santi konmsi Zorz ti'n zifle li en kalot dan son figir. Zanmen i ti'n deza rakontre laenn parey e sorti kot pratikman en etranze ki zanmen in ganny okenn kontak avek.

Zan-Iv ti tous li dousman lo son zepol, “Ouf! Menn, ki ou'n fer sa boug? Ras li son kwever?” Zan-Iv ti pe sey fer en pti dyok, me son lavwa ti tranble.

I ti'n perdi laparol, i pa ti reponn. Sok ti pe fer son lipye tranble. I pa ti'n fer Zorz nanryen, li. I pa ti ni menm frekant li!

Wikenn ti pas ase frankil. I ti fer fer bann pti korve kot lakour Sanmdi e Dimans apremidi, i ti *hang out* borlanmer avek Zan-Iv. Sanmdi, ler i ti desann pour li al fer konmisyon lasemenn avek Tant Lina, Zorz ti anba laboutik malbar. Dimans borlanmer, Zorz ti touzour dan zanviron.

### Sapit 3

Lendi bomaten Mark ti ouver son lizye dousman e plafon ti pran laform. I ti'n fer en bann kalite rev, ki ti glis dan fon son lespri zis konman i ti sey ratrap zot. Konfortab, i ti pas pas en kote lanmen dan son latet. Son seve ti pe konmans boukle, ti'n ler pour li pas en kou kot barbye. I ti rev en moman. Sa senk premye minit ant sonmey ek lev konpletman ti gou. Sa reyon soley, ki ti'n pik pik son popyer pour revey li ti sanz laform e vin gran seve blond boukle ki ti santiye dan soley. Gro lizye ble Kim Basinger ti donn li en regar sedwisan. Sa reyon dore ti desann pli ba pour kares son tete e kontinyen pour kre son lazam, long e ferm. Kim, ki ti'n asize, ti krwaz son lazam e avek en pti sourir sekre ti konmans tourn dousman an ron. Mark ti anvoy son lot lanmen anba son tapi e kares son lekor ...

Toudenkou, en kriye persan ti desir fabrik frazil son rev. I ti sot ater avek en lavites e ariv devan laglas avan menm ki i ti realize ki sete li menm ki'n kriye. Sa regar panike ki ti pe get li dan laglas ti fer li pli per ankor. I ti lev sa lanmen ki i ti'n kares son seve avek e ouver li dousman. Ti ranpli avek seve, son seve. I ti kriy ankor avek lorer. I ti tann tape lo son laport lasanm e lavwa son tantin ti demann li ki ti pe arive. Konmsi dan en kosmar, Mark ti al ouver laport, e i ti montre son tantin son lanmen plen avek seve.

“Mon ... mon seve,” i ti begeye, “i pe grennen.”

Son tantin ti pas lanmen dan son latet e vre, seve ti sorti par gro ponnyen. Pour en bref enstan, Mark ti apersevwar en regar ante pas lo figir Tant Lina, me apre

i ti rearanz son lekspresyon an en mask kalm. Tant Lina ti kalme li e fer li asiz lo lili pour li egzamin son latet kot son seve ti'n grennen.

“Napa nanryen.”

“Mon pa kapab al lekol koumsa,” Mark ti dir, panik dan son lavwa. “Manrmay pou sikann mwan.”

“Non, mon krwar plito ou al kot dokter. Mon pa war nanryen mwan. Li, i a kapab donn ou keksoz kont sa.”

De er-d-tan plitar Mark ti'n ariv lo ban dan klinik Lans Rwayal pe esper ners apel li anndan pour li war dokter. I ti'n met en kap pour kouver son latet. I ti get en kou lekol Politeknik lot kote semen, me nanryen pa ti anrezistre. Menn! I ti enkyet! Sa loder dezenfekten, ki pour li ti toultan vedir bakteri, maladi, ti pe kas son koul. Son leker ti pe bat for, son lanmen ti transpire. Akoz son seve ti pe grennen koumsa? Kanser latet! Dan son lespri, i ti war en nespes bibouk pe manz son laservel - loukimya ... Ki sa ki i'n deza tande lo sa maladi? I pa rapel, me i rapel pti fiy Madanm Hoarau ti gannyen e zot ti anvoy li sonnyen Larenyon. Ler i ti retournen son seve ti'n grennen. I pa ti viv lontan tou fason. I ti pas son de lanmen dan son figir e tap tap son lipye ater avek lenkyetid. Sa tantin obor li ti get li anba lapo lizye. Ou a dir i remarke ki i pres pour mor?

I ti bour son lanmen dan son pos pour anpes zot tranble e kontinyen tap tap son lipye ater. I a dir Zan-Iv pran son koleksyon CD si i mor; son T-Shirt “X-File” osi. Zan-Iv ti'n met leker lo la depi lontan; son *skateboard* ... I ti war son lekor ekspoze dan serkey dan palto ki i ti al maryaz

Pyer - en koleg travay son tantin- lannen pase; Tant Lina pe plere; Zan-Iv pe dir ki i ti en bon dalon; son kouzen Robin, ki i pa ti siporte, pe fouy dan son bann zafer pour gete ki i kapab pran. I ti pres pour sot dan plafon ler ners ti kriy son non.

Mark ti antre anndan kot dokter. Dokter Naydou ki ti pe konsilte. En zonn mens kor dan son karant an, tre malbar. Lasann konsiltasyon ti pti, imid e pouri; verdigri lo miray, en vye sez dibwa ki ti brannen ler Mark ti asiz lo la. An kontras, dra byen blan, kanze, aranze avek presizyon, lo sa pti kad ki ti servi konman lili.

“Mon pe mor ...” i ti deklare san reflesir, “Non, non, mon oule dir mon seve pe grennen ... la, ek la, ek la,” Mark ti tir son kap pour montre kote. Dokter ti egzamin son latet e poz li detrwa kestyon.

“Depi kan ou'n remarke ki ou seve in konmans grennen?”

“Bomaten ler mon leve.”

“Ou'n pas okenn nouvo lakrenm ouswa dyel ladan?”

“Non, mon pa pas nanryen dan mon seve. Mon zis lav avek sanmpou de fwa par semenn.”

“Ou lekol?” Dokter ti fer li detas son semiz, i ti ekout son leker. “Respir for!”

“Wi, Politeknik.” Mark ti respir for detrwa fwa.

“Kimannyer ou pe kop avek lesan laba, okenn problem?”

“Pa mal. Kontabilite i en pe difisil. Non, mon napa okenn problem partikilye.” I ti reatas son semiz.

“Dan lakour? Tou i korek?” Dokter ti fer li met son lebra dwrat pour pran son tansyon.

“Be ... er ... wi. Mon reste avek mon tantin. Nou oke.”

“Ou paran, oli?”

I ti get sa dokter en kou, bafouwe - Be dir mwan, ki tousala i annan pour fer avek son seve grennen? Toudmenm i ti reponn,

“Mon papa ti perdi lo delo sale ler mon ti annan senk an, mon manman ti mor wit an pase. Omwen i'n ganny deklare mor me person pa konnen. I ti zis disparet. En zour bomaten, ler mon ti leve, i pa ti la.”

Mark ti lite pour gard son lavwa kalm, konmsi i pe resit litani. En lavwa ki ti kasyet tou bouwersman, langwas sa memwar ki i ti'n sey anter dan fon son lespri, me anven, akoz i ti toultan repet later pour ant li.

“Ou mazin li?” Dokter ti retir son kouta-kouta e grif en kou lo son fayl. “Tansyon i normal. Mont en kou lo balans.”

“Mon rapel li, wi. Me si ou pe demann mwan si mon mazin li bokou *well*, par ler.” I ti tir son soulye e mont lo balans.

“Ou konnen, par ler *stress* i kapab fer ou seve grennen. Ou'n santi ou anba okenn presyon abnormal resaman?”  
Dokter ti not son pwa e zot ti reasize.

“Non.”

“Mon pou refer ou avek spesyalis lapo, i a pli kapab ed ou. Me mon pou bezwen osi en esantiyon disan pour elimin okenn danze en maladi kelkonk.”

Dokter Naydou ti telefonn Dokter Gabriyel ki ti en dermatolog pour met en randevou pour li, ki i ti mark lo en pti kart ver e donn li. Ti dan de semenn.

“Ou paret en pe pal. Ou fer sport?”

“Yep! Mon zwe futbol.”

“Lapeti kimannyer i ete?”

Mark ti fer en pti riye, “Tou lazournen mon lafen.”

“I normal, ou ankor pe grandi. Mon pou donn ou en pe pilil vitamin.” Dokter ti fer preskripsyon pour pilil vitamin. “Pas kot ners dan lasanm akote, i a tir ou disan.”

Mark ti respir for. Sa bann zafer pikir pa ti pour li!

“I tre probab ki ou seve i a repouse dan enn de semenn. Me toudmenm al war Dokter Gabriyel!”

“Savedir i pa nanryen grav. Mon pa pou mor?” Mark ti demann sa kestyon ki ti pe enkyet li.

“Byensir ou pou mor, me pa konmela!” Dokter ti riye,  
“Pase Vandredi, ou a get rezilta disan.”

Aprè ki ners ti'n tir en pti tib disan, - pa pou fermal, zis en pti pike - zistwar ki ners ti toultan rakont ou, avan ki i ti anter en zegwir dan ou lavenn e i ti demann ou anvoy ayo manman. Mark ti sot deor e get atraver kot Politeknik. I ti fer en kou lide. Eski i ti pou al lekol? Non, i ti ankor tro boultverse. I ti pran semen Mon Plezir.

An montan i ti tap tap koudpye premye pti koko ki i ti zwenn, swivi par en legren bodanmyen apre ki pti koko ti'n tonm dan rigol. Son lespri ti lwen, son figir trouble, son lizeye sonm. Kestyon Dokter Naydou lo son paran ti'n relev kosmar sa bomaten.

Ti zis en semenn apre son laniverser dis an. Soley ti an plen dan son lasanm ler i ti ouver son lizeye e i ti toudswit realize ki i ti an retar. “Manman,” i ti lev asize avek en orib presantiman maler. Son leker ti tonm dan son vant.

Ti annan en keksoz mal, mal.

I pa ti rapel kwa. I ti leve e diriz ver lasanm son manman ki ti zis apre pour li. I ti ouver laport dousman avek en lanmen tranblan. Grensman gon laport ti rezonn for dan silans lakaz e fer li sote. I ti antre. Lili ti ankor an dezord e lanprent latet son manman ti ankor lo zorye, me son manman pa ti la!

“Manman, manman,” i ti kriye, konpletman afole, en lafreyer glase pe ser son leker. I ti tay dan koridor e diriz ver lakwizin, me lakaz ti vid. I ti tonm lo sofa dan salon e konmans plere konmsi ti pou napa demen. I ti konnen,

san konnen kimannyer, ki son manman pa ti'n al en pti moman laboutik, ni kot vwazen. I ti konnen ki i pa ti pou war li ankor. Apre en bon moman son larm ti sek tousel e i ti ganny prezans lespri pour telefonn son granmanman.

En lasyer fre ti koul dan ledo Mark malgre lasaler soley onz er bomaten. I ti sakouy son latet pour rezet sa memwar e respir for detrwa fwa. Apre i ti konsantre lo bann pti son lanatir pour kalme li. En marten ti fer en kriye persan; en tourtel, anler dan pye bodanmyen, ti demann Pyer si i ti oule koko. Sa de zour soley ti'n ase pour fer larivyier desann. Apenn si i ti antann delo dan ros. Malgre ki larivyier pa ti lwen avek semen, bann gran fey vya ek banbou ti'n maske li konpletman.

Loder pwason fri sorti kot lakaz Madanm Hoareau ti fer son vant gronnyen e i ti realize ki i ti lafen. I ti aret en kou kot laboutik malbar pour aste trwa sanmoussa ek en kola.

## Sapit 4

Laboutik Msye Tanbi ti enn sa bann vye laboutik malbar ki ou ti preski nepli zwenn Mae. I ti en vye lakaz an bwa, ki ti'n ganny penn en gro ver sal avek trwa gran laport de batan, ki ti en ver pli pal, devan. Dan milye ti annan en gran vitrin kare. Lapousyer plizyer lannen ti'n akimil lo la e manrmay ti'n desin pti tonton avek zot ledwa lo son vit. Ti annan en letaz avek lavarang anler.

Lansenny "Msye V. Tanbi - Retailer of goods, tobacco and liquor" ti'n pal e tonm par kote. Listwar ladvertisman dan zanr "Gran bal dan sant kominoter Lans Rwayal" ti'n ganny kole progresivman lo kanmarad lo magazen. Laplipar ti'n desir par bout. En poster ble ek rouz klate avek en sat nwanr marke "Ever-ready long life" depi lannen swasann dis ti ankor lo laport. Dan vitrin, tou sort aytenm ti lo disple - difil kouler, bwat dipen plastik, menntolatoum, bwat lapoud "My Fair Lady", lodkolonny "Entere", lodekalm, bwat zegwir, tousala ranpli avek lapousyer.

Mark ti antre anndan, dir pardon bal disik devan laport, koule pour pa tap latet avek seo plastik anpandan, pour avans kot kontwar. Loder lansan, alimen lo tablet dan kwen devan portre *Krishna*, loder pwason sale anba kontwar, melanze avek en varyete aroma zepis ti ouver en pti lafnet lo Lenn. Anndan ti sonm e ankonbre. Vye Madanm Tanbi ki ti deryer kontwar sa zour - en vye podanm katreven e kek lannen ki ti kontan blag blage avek son bann kliyan. I ti konn tou dimoun dan kanton. Normalman premye kestyon ki i ti pou'n demann Mark se konman sava Tant Lina, me la i ti zis zet en regar lo li. Son figir ti vin en kouler safran e i ti konmans kriye,



“*Fout! Fout!*”

I ti pik son sari e tay deryer konmsi i ti'n war malfezan. Son garson Akbar ti sorti nennen ouver avek en lespatil dan son lanmen,

“Ki annan? Ki annan?” i ti demann li, enkyet, me i ti is zepol an siny i pa konnen. I ti demann Akbar son konmisyon trwa sanmoussa pwason ek en kola.

Pli Mark ti mazin lo reaksyon Madanm Tanbi, an montan, pli i ti realize ki ti annan en keksoz ki pa tro kole la. *Fout, Fout*, kisisa *Fout*? An arivan kot laboutik Msye Raja pli o, i ti antre anndan e poz li sa kestyon,

“Msye Raja, kisisa fout?”

Msye Raja ti fer en gran sourir san ledan devan, “Dimoun ki'n mor, malfezan. Kot ou'n tann sa?”

“Er.. Madanm Tanbi ki'n dir mwan sa.”

“*He, he, he...*” Msye Raja ti kakaye, “Sa vye lakord i konmans war nanm!!”

I ti remerisi Msye Raja e resorti dan soley eblouisan. Larepons Msye Raja ti konfiz li plis. Akoz Madanm Tanbi i a get li e krwar ki i ti en nanm? I pa ti ganny en konpran, kekfwa tantin ti pe konmans ganase.

Sa swar son tantin ti raz son latet kler pour kasyet bann trou vid.

“Ou konnen Mark, Dokter i annan rezon. Vre ou pal.

Ou'n megri osi sa dernyen tan.”

Ya. I ti'n remarke li osi. Depi semenn pase, i ti'n bezwen pers en lot trou dan son sang pour tenir son kannson.

Lanmen pour li al lekol, Mark ti met son kap devan deryer e get son lekor dan laglas. Aktyelman, i pa ti mal ditou avek latet kler. I ti met son pti senglas ron lo son nennen. Ya! I ti mega koul!

Kot lekol, manrmay pa ti ni antren li. Raz latet kler ti lanmod. Me premye ansenyan ki ti antre dan laklas sa bomaten ti anvoy li kot “Head of School”. Latet kler pa ti ganny konsidere en stil seve apropiye pour en etidyan, me apre ki i ti'n eksplik son problemm avek en not sorti kot son tantin, zot ti aksepté.

Lasemenn ti pas vit e son Vandredi Mark ti en pe etonnen pour ganny apele dan biro Madanm Pile, Konseye Etidyan Politeknik.

Madanm Pile ti get li drwat dan son lizye. Ti kler ki i ti pe sey evalye laverite son parol. Alors Mark ti sey gard en lekspresyon serye e senser lo son figir, me malgre li, i ti santi son lekor pe vin rouz. Son lizye ti say en pti gin laba, parey en boug ki koupab. Me i pa ti koupab, li! I ti sey ankor,

“Madanm Pile, mon asir ou mon ti la dan laklas. Mon'n tann tou leksplikasyon Msye Martin; mon pa konnen akoz i pe dir mon pa ti la. Kekfwa i'n tronp mwan avek enn lot...”

Son lavwa ti kase. *Shit!* I ti *sound* parey en pti manrmay

primer ki pres pour gele akoz Mis in dispit avek li. Me i ti tre boulverse par sa lensidan. Konmsi i ti napa ase problemn!

“Mark, mon **oule** krwar ou, me i annan de lezot etidyan ki'n fini konfirm avek mwan ki ou pa ti dan laklas kalkil yer. An plis, pa premye konplent ki mon'n gannyen lo ou. Ou'n pran ou en manni sov serten laklas, sirtou laklas kalkil Msye Martin.”

Msye Martin ti Profeser Matematik, en zonn angle mens kor avek bann tre e fason en pe feminen. En bon ansenyan, ki konport li konmsi i ti pe fer teat avek bann pti sote par isi, bann egzazasyon mouvman son lanmen letan i ti pe eksplik son kalkil.

“De term in pase depi ki ou isi, zanmen nou'n tann wenk lo ou, me sa dernyen tan, mon pe zis ganny konplent! Ki i ariv ou? La, ou'n raz ou latet kler, ou pe konport ou dan en fason grannwan,” Madanm Pile ti kontinyen.

“Non Madanm Pile. Mon seve mon'n raze akoz in grennen. Mon pe pas kot klinik taler pour mwan get rezilta tes disan pour konnen akoz mon seve i grennen. Apre mon annan randevou avek dermatolog semenn prosenn.”

“Ar ...”

“Be dir mwan, ou oke kot ou tantin?”

“Wi, wi. Nou oke nou de. Mon napa problemn mwan, zis sa zafer seve.”

“Mark, mon pou donn ou ankor en sans. I reste zis de semenn avan vakans. Mon pa oule tann nonmen ki ou'n sov laklas ankor. Ou konpran mwan? Si ou annan problemn kelkonk, pas kot mwan, nou a diskite. Me si mon tande ki ou'n sov leson, gar-a-ou!”

“Be Madanm Pile ...”

“Mark, mon pa siport dimoun ki rakont mwan mansonz. Mon pa oule tann okenn leskiz.”

Mark ti anval son protestasyon e sorti deor. Zan-Iv ti pe esper li,

“Ki dil?”

“I dir ki mon mank laklas, ki mon'n mank laklas kalkil yer. Mon pou al demann Msye Martin si mwan menm ki ti mank son laklas yer!”

“Be Mark, bos plat menn, ou pou ganny plis problemn ankor si ou al argimant avek li ki ou ti la kan ou pa ti la.”

Mark ti fini araze e i ti kriy avek Zan-Iv,

“Be mon ti la! Ou konnen mon ti la! Mon ti pe koz avek ou zis avan laklas konmanse.”

“E, *chill* menn! Pa nerve, les tonbe...” Me Zan-Iv ti donn li en regar drol. Zot ti diriz ver zot prosen laklas, ki ti lenformatik.

Toudmenm i pa ti al argimant avek Msye Martin, i ti deside plito koz avek li avan sak leson pour fer li note ki i la.

Plitar Mark ti pas kot klinik. Ners ti dir li ki fodre i refer tes disan akoz sepa kwa ki'n al mal avek sa enn premye. I ti bezwen les retir son disan. Ti vreman pa son zour! Me lazournen pa ti ankor fini. I ti sot deor e war Zan-Iv plake lo miray Politeknik anfas klinik, pe esper li. Zan-Iv ti sot ater konman i ti war li.

Toudenkou zot ti tann akselerasyon brit en masin loto e en gro *jeep* nwanr ti aparet dan en nyaz lapousyer, parey en gro toro anraze, apepre en santenn met avek zot. Sa *jeep* ti demare avek en lavites enkrwayab direkteman ver zot. O dernyen moman, Zan-Iv ti pous li dan rigol e sot apre li. Avek en lekla metalik, *jeep* ti pas santimet avek zot.

“Sa boug i fou!” Mark ti eksklamen. I ti'n kros son zenou kot i ti'n demi tonm dan rigol. Zot ti get sa drayver kot i ale, ziska kot semen Mon Plezир ti baliz avek grannrout. San ralanti, sa *jeep* ti fer en you-tern lo grannrout, ki ti fer larou kriye, e repran semen Mon Plezир. En loto ki ti pe mont dan direksyon Takamaka ti bos en gran fren pour evit en aksidan. *Jeep* ti vin lo zot ankor. Drayver ti'n met sa pti rigol etrwat anba li e i ti kler ki i ti pe target zot. Zan-Iv ti reazir vit. I ti sot anler lo miray, me Mark, panik ti paraliz li. Parey en sov souri dan laklerte tors, i ti war son lekor pe get drwat dan blan lizye drayver *jeep*. Ti Zorz!

“Mark!”

Lirzans dan lavwa Zan-Iv ti penetre son kosmar. Mark ti reisi bouze e zet son lekor kont miray. *Jeep* ti zis frot avek li. Ti annan en grensman metal lo beton ki ti fer son ledan vibre. Laglas dan kote *jeep* ti kraze. Ankor en

demi tour, Zorz ti retournen. I ti rap sa miray depi kot i ti vini, san pran kont si kote *jeep* ti pe ganny mitile, son bi sete pour derap Mark kot i ti'n kwense. Tapaz vit kraze ti frisonnan.

Mark ti santi Zan-Iv graponn li par son zepol e ris li anler lo miray. *Jeep* ti'n fini ariv kot zot ti ete. Zot ti sot lot kote dan en touf zarbis. I ti tann tapaz feray lo beton, ki ti kontinyen, kontinyen ... apre en silans total, ki ti fer son zorey sifle. Me sa pa ti dir lontan; lasirenn vaskar ti fer en irle, en loto lapolis ti ploy anndan dan semen Mon Plezир. I ti pez en fren dan kote *jeep* kraze. Mark ek Zan-Iv, ki ti'n zis ganny kros kroze, ti taye pour fer letour par baro pour al gete ki ti pe arive. Zot ti atan pour war de gard sot ater. Dimoun anba klinik, dimoun anba bèstòp tousala ti pe taye pour vin gete. En kote larou *jeep* ti'n tonm dan rigol, son saylenser ti'n debwete.

Mark ti war Zorz debarke, fer en zar oule tonbe, apiy en kou avek *jeep* pour li reganny lekilib. Fron Zorz ti'n fann e disan ti pe koul dan son figir. Avek en gro lakle larou dan son lanmen, i pa ti ni antren lapolis, me parey en robot, Zorz ti pe vin lo li! Son leker ti bat dan son vant, son disan ti vin fre. Mark ti get isi, get laba pour trouv en keksoz pour defann son lekor avek, me i pa ti war nanryen. Granmersi en gard ti atrap Zorz par deryer e ras li sa lakle. Zot ti met Zorz dan minot, pous li dan vaskar, e drayver ti kondwir li kot Kordgard Lans Rwayal, en santenn met avek kot zot ti ete. Sa lot gard ti mars sa pti bout apye avek li ek Zan-Iv.

Mark ek Zan-Iv ti donn levidans lo sa ki ti'n arive. Zorz pa ti oule reponn okenn kestyon gard. Mark ti tann gard pe dir ki *jeep*, ki Zorz ti'n servi, ti en *jeep* vole. En koup touris ti'n fek vin raport perdi. Zot ti'n park pa tro lwen,

kot restoran Kaz Kreol pour zot al bennyen borlanmer. Zorz ti ganny sarze pour vol ek latanta mert. Lapolis ti ferm li dan kaso pour lannwit.

An montan zot ti diskrit en pe lo kwa ki'n kapab fer Zorz azir dan en tel fason.

"I bezwen pe servi tyalas." Zan-Iv ti konklir.

"Wi. Be akoz i ti pe target mwan? Mon pa tro krwar ki i annan en problemm avek ou, mwan. Mwan ki i oule!" Sa ti bouwers li e rann li malad. I ti fikse Zan-Iv an esperan ki li, i ti a konpran keksoz, me Zan-Iv ti zis is zepol. I pa ti konnen li osi.

Son lannmen byen bomaten Zan-Iv ti telefonnen pour demann li si i'n tann nouvel.

"Kwa? Ki'n arive?" Mark ti demande, enkyet.

"Zorz in touy son lekor."

"Kwa!" I ti eksklamen, soke.

"Well, rimer pe dir ki i'n touy son lekor. Lapolis in trouy li mor dan kaso bomaten. Zot pa ankor konnen kwa ki'n touy li."

## Sapit 5

Apré ki Zan-Iv ti'n koup telefonn, Mark ti reste lontan dan mazinasyon. I ti retras ankor enn fwa, tou fwa ki i'n war Zorz e sey reflexir lo kwa ki i'n kapab fer pour ofans Zorz sitan ki i'n oule touy li. I ti santi li koupab, me pour kwa egzakteman, i pa ti konnen. Son apremidi, i ti pas kordgard pour war si zot in ganny plis lenformasyon lo lanmor Zorz. Bernar, tonton Danyel, ki ti *on-duty*. I pa ti ankor tann nanryen li, me i ti fer Mark espere pandan ki i telefonn Kordgard Santral pour gete si zot in ganny okenn lenformasyon. Rapor letopsi ti'n fek antre. Zorz ti'n mor sibat avek en latak leker prodwi tre probableman par sok ou laterer ekstrenm. Bizar! Ki sa ki'n kapab donn en zenn garson sportif, an plenn sante latak leker?

Ti napa nanryen ki i ti kapab fer. I ti ava ekout mesaz pour konnen ki zour lanterman. I ti diriz lo laplenn pour al praktis foutbol parey labitid. Lavi i drol, ou ti kapab ozordi vivan, anmoure e demen mor ouwsa ou'n disparet misteryezman. Sa panse ti kit en gou anmer dan son labous.

Dan pti sis er edmi, ler i ti ariv se li sorti zwe foutbol, Mark ti trouv en mesaz pe *flash* lo son konpiter dan son lasanm,

**BIPIP ...**

Non! Ti demann li kriye. Son leker ti vin fre, i ti pali en sel kou. I ti ris sez, asize e fikse son regar lo lekran konpiter konmsi ipnotize. Bipip... pti non gate ki son manman ti'n donn li lontan, si lontan, dan en lot lepok. Larm ti ranpli son lizye e dan son lespri i ti revwar lafas

Son manman pe riy anmor. I ti pe sakouy li lo son zenou e redir li

“Little Bo-peep has lost her sheep ...”

Mark ti repete, “Lit' Bipip has los' sheep ...”

I ti annan apepre trwa an, i mazine, e vi ki sa ti son pti poenm prefere, son pti non Bipip ti reste. Lanmen son papa ti pran li lo zenou son manman e anvoy li anler ...

Mark ti sakouy son latet e refikse lo lekran devan sa mo, ki ti paret pe ganny sali dan sa dyok ki kelken ti pe zwe lo li. En laraz ti mont dan son latet. Lekel ki ti pe fer en dyok koumsa? Apard kekfw Tant Lina, i pa ti krwar ki i annan kelken ki ti konn sa pti non, e Tant Lina pa ti zanmen tous son konpiter. Deryen fwa ki i ti'n servi konpiter li, ti Vandredi swar pour fer son *homework* komers e i ti asire ki avan ki i ti'n kit son lasanm boner pour al zwe foutbol, son konpiter ti òf. Toudmenm i ti leve e al lakwizin pour kestyonn son tantin. Tant Lina ti pe netway karot ek leti pour fer salad.

“Tant Lina, ou'n vin dan mon lasanm ou?”

“Non.”

“Robin in pas la?” Robin ti piti son tonton Gilber. Tonton Gilber ti dezyenm piti, apre Tant Lina e avan son manman, dan sa fanmiy. Robin ti annan kenz an e i ti en latet fermal.

“Non, i pa'n pase, akoz?”

“Mon konpiter i alimen e i annan en mesaz lo la.”

Tant Lina ti aret koup sa karot ki ti dan son lanmen e lev latet pour get li,

“Ki mesaz?”

“Pa en mesaz vreman, plito en mo e mwan mon pa'n servi konpiter depi yer swar.”

Tant Lina ti swiv li dan lasanm pour vin gete. “Bipip” ti ankor pe flash lo lekran; pe apel li.

“Emma...” Tant Lina ti soupire.

“Kwa?” Mark pa ti'n tro konpran ki son tantin ti'n dir. Ou a krwar i ti'n tann li nonm non son manman.

“Nanryen, mon pa konnen, mon pa'n war personn mwan.”

Mark ti anvoy son lanmen e tenny son konpiter.

Sa swar i ti sote dan pti de er bomaten an kriyan. Omwen, dan son rev i ti pe kriye. I ti pe kriy son manman e leko son lavwa ti ankor pe rezonn dan son latet. I ti frisonnen e respir for. Ti annan en pe letan, i pa ti'n fer sa rev, pres en an, i mazine. I ti'n konmans fer sa kosmar apre disparisyon son manman. Par ler en bon pe letan ti pase, i pa ti ganny sa kosmar, me apre i ti kapab ganny li detrwa zour kou sir kou. Parey labitid, ti difisil pour sezi detay sa rev. I ti sey konsantre lo la, me parey lafoumbal devan soley loror, son rev ti glis dan kolin son lespri an kitan zis bann morso eparpiye; lenpresyon

ki i ti ancor pti, en lalin bennyen dan disan. I ti pe taye, taye osi vit ki son pti lazanm ti kapab anmenn li pour ratrap son manman dan lwen. I ti war silwet son manman dan en lalimyer aveglan, ki ti pe rann li sou. I ti gele, “manmi, manmi ...” Apre sa, laform sa gro bebet ki ti aparet dan labrim; laterer ki ti anvair son nanm.

I ti annan en *feeling* ki si i ti kapab mazin tou detay son rev, i ti a ganny en lendikasyon lo disparisyon son manman. Me sak fwa ki i ti sey fors son lekor, i ti zis ganny en latet fermal terib.

I ti pran en moman pour li kalme son leker ek son respirasyon. Apre i ti realize ki i ti lafen. I ti'n byen manze boner, malgre i ti ancor en pe boulderse par mister sa mesaz lo son konpiter, me kantmenm sa, la, i ti santi li lafen. I ti leve e desann ater san met lalimyer.

Tayls ti fre anba son lipye e i ti rod son savat. I ti pe avans ver lakwizin kan i ti antann grensman fotey e apersewar en lonbraz dan lader lalimyer sekirite anba lavarang. I ti avans kot lafnet e dekal rido. Son tantin ti pe asize dan fotey. I ti paret dan en gran traka. Mark pa ti deranz li, me al dan lakwizin e rapaz tou sa ki i ti war dan frizider pour fer en *sandwich* enorm avek. I ti fer desann sa avek en ver dile.

Apre en moman i ti remark Tant Lina pe apiy avek kad laport pe obzerv li. I ti paret about pour dir li keksoz, me parol pa ti sorti. Mark ti lev son sousi an enterogasyon. Labous Tant Lina ti bat ancor pour koze, me apre i ti zis sakouy son latet, devire e al dan son lasanm.

Son lannmen Dimans, Mark ti konmans son lazournen par prepar en gro *breakfast*. I ti konmans par en bol otmil, swivi par dipen griye ek dizef, sosis ek beconn. Son tantin ti get li avek letonnman, “Mon Dye Mark, ou a toufe! Kot ou met tousala?”

Mark ti sourir avek labous plen.

“Pourtan pli ale ou vin pli meg. Dimoun a krwar mon pa donn ou manze! Ou pal.”

Son lapeti ti kontinyen ogmante dan en fason enkyetan. I ti anvi manze tou lazournen. Par ler aswar i ti leve dan lannwit tou tranpe, pe tranble, avek lafen pe ronny son anndan. I ti pou fou si i pa ti ganny keksoz pour manze deswit. I ti trenn son lekor dan lakwizin pour al devor sa ki i ti trouve dan refrizerater. Ti ariv bann lensidan kot i ti kanmi e degoute par lafason ki i ti pe reazir, me ti pli for ki li. Son tantin ti'n demann li de fwa oli savon dan lasanmben ki i ti'n fek ranplase e Mark ti reponn ki i pa ti konnen, me i ti konnen. I pa ti'n kapab anpes son lekor manz zot.

Tou le onz er zot ti abitye aste en berger ek limonnad e al asiz lo ban devan oditoryonm pour manze, zot de Zan-Iv. En zour i ti'n aste de berger. I ti devor zot an de morso, e met son kola ogoulo. Apre i ti fikse Zan-Iv ki ti pe manz pour li dousman, pe koze anmenmtan. I ti sey vir laba, me i pa ti kapab tir son regar lo sa berger. Lasaliv ti vin dan son labous. Dan en bout son lespri, i ti priye ki Zan-Iv ti ava aret koze e fini manz son dipen, me Zan-Iv ti rakonte menm. Son leker ti bat for, son lanmen ti transpire. I ti konmans tranble, apre i ti zis sot dan lanmen Zan-Iv, aras li son berger, e anvale. Zan-Iv ti get li bousbe. Pour enn fwa i ti'n perdi laparol. Mark ti bes son lizye.

I mazine ki Zan-Iv ti'n war konfizyon ek laont lo son figir, akòz i pa ti komant lo son aksyon. I ti zis leve, tap li lo son ledò, e dir li,

“Yo, i'n ler pour nou al tyek sa lenformasyon dan *library*”

Soulaze, i ti leve e ansanm zot ti diriz ver bibliotek.

En swar son tantin ti debiste li pe manz pwason sale ki i ti gard anba dan kabinet pour letan napa bouyon. I ti regard li, son lizye trouble, san dir en mo, me apre sa Mark ti trouv refrizerater toultan byen stoke.

En zour apre lekol, i ti anfen trouv en keksoz ki ti bous sa trou dan son lestoman. Gide par son nennen e son lensten, i ti zis dir Zan-Iv esper li en pti kou e i ti vire e diriz borlanmer olye mont dan leo. Ti letan vannswet e gomon ti'n tonm an gran kantite lo lans. Ou ti santi sa lodè pi dizef gate depi kot ou vini dan lwen. Sa lodè ti pe atir li e son vant ti gronnyen. Borlanmer, divan ti for. I ti fwet sirfas lanmer e garni laroul avek girlann lekim blan. Pye koko ti balanse. Mark ti poz son sak ater, i ti avans dan batan laroul pour li anmas en ponnyen gomon ki ti ankor fre. I ti gout en pti fey e pa ti sirprann pour war ki i ti vreman bon. I ti ranmas en bon ponnyen e al asiz li kot i ti'n depoz son sak, e konmans manze.

En moman apre i ti war Zan-Iv aparet. I ti pe mangonnen depi kot i vini,

“En, mon fatigue esper ou, ki dil?” apre soke,  
“Be..Mark, ki ou pe fer? Ou pe manz gomon?”

Mark, ki anfen ti pe santi son lafen rekile, ti donn Zan-Iv en gran sourir e ofer li en pe.

“I move bon, menn. Goute!”

Zan-Iv ti frisonnen, “Yak! Ou fou, ou! Mon konnen ki ou bann fanmiy sinwan i manz gomon, me pa koumsa!”

Mark ti zis sourir.

“Akòz ou pa met de banbara avek?” Zan-Iv ti kontinyen sikannen, me son konfizyon e lenkyetid war Mark konport li koumsa ti aparan lo son figir. Me Mark pa ti trouv mo pour eksprim sa soulazman ki i ti pe resanti. I ti santi li move korek. Pour movi Zan-Iv, i ti fer krwar i seryezman konsider manz de banbara, apre i ti sakouy son latet,

“Non, mon pa krwar i pou bon!”

Zan-Iv ti reste ebete en moman, apre i ti war en pti lekla visye dan lizye Mark e i ti sourir. Mark ti pe donn li kouyas. I ti tonm ater lobor Mark pour esper li fini son piknik. Avek en pti pe ezitasyon, i ti anvoy son lanmen e pran en pti bout pour goutè. Yak! I ti kras deswit. I ti anmas de brans e donn Mark, “En, met sa dan ou sak ou a gannyan pour dezennen demen!”

Lasemenn ki ti swiv ti ganny karakterize par son vizit kot dermatolog. Dokter Gabriyel ti egzamin son latet, ki ti'n prop net, ni sours seve pa ti reste. Dokter ti paret etonnen,

“Ou dir ou ti annan seve avan?”

Me wi Dokter, mon seve fek grennen, i annan de semenn.”

“Me pourtan mon pa war ni sours seve dan ou latet. I parey pour en dimoun ki pa'n zanmen annan seve, e ki pa pou zanmen ganny seve. Mon dezole, ou seve pa pou pous ankor.”

“Kwa? B..be kimannyer?”

Dokter ti poz son lanmen lo son zepol an senpati, “Mon *sorry* zennonm, me napa nanryen a fer, ou seve pa pou pous ankor!”

Mark ti sorti dan lasal Dokter konpletman ebloui. Parol Dokter ti zwe e rezwe dan son latet parey en rikord reye - napa nanryen a fer, ou seve pa pou pous ankor; napa nanryen a fer, ou seve pa pou pous ankor. I ti pou reste sov tou son lavi. Pandan de zour i ti deprimen. Pa ti demann li koz avek personm, menm pa avek Zan-Iv. I ti al lanterman Zorz. Lapenn manman Zorz ti desir son leker. I pa ti kapab get bann keksoz koumsa. Me apre, wikenn ti aprese e son bon limer ti repran.

## Sapit 6

Dimans, Zan-Iv ti debout en kou deor e get lo labe Lans Rwayal. Soley ti'n lev lo en lesyel si ble ki i ti kas son lizeye e rann li sou. Detrwa pti tas nyaz ti'n ganny penn dan enn de landrwa, me apard sa soley ti'n araze. Ti'n annan en pti grenas lapli lo granmaten, e la tou keksoz ti paret pli nef. Ti annan en gran kalm. En pti tapaz i pa ti tande. Divan ti'n tonbe, ti reste zis en pti labriz dou. Zan-Iv ti respir for e les loder lanmer ranpli son poumon, kalme son lespri e remet son nanm an lekilib. I fer lide telefonn Mark e dir li annou al borlanmer apremidi. Kekfwa sa i a tir Mark dan sa move limer ki in ladan resaman.

Depi sa zafer Zorz, an plis son problenm seve, Mark pa ti parey son labitid. Yer menm, ler i ti pe koz avek li, i ti demann li en kestyon, Mark pa ti reponn. I pa ti ni menm tande ki i ti'n dir li. Lapliparditan i ti dan en mazinasyon kelkonk. Mark ti annan en problenm, me vi ki i pa ti ankor rakont li kwa, i pa ti oule tro kestyonn li nonpli. I konn Mark li, fodre les li abord son problenm li menm. Si i atak li, i pou antre dan son lakok, e pa dir li nanryen.

Pa zis sa, pran sa zafer koz lalang avek Madanm Pile. Menn! Mark zanmen ti koz lalang. Konbyen fwa, zot in ganny problenm akoz Mark pa kapab rakont en pti manzonz nanryen ditou. Ti annan en bann keksoz drol pe pase. Mark en ler i dir ou i pou vin en landrwa, apre i pa vini. Ler ou demann li kot i ti ete, i ensiste ki i ti vini, i ti esper ou, e pa dir li nanryen en i a manz ou. Fransman, i ti trakase.

Mark ti annan en serten naivite avek li, ki ti fer li, Zan-Iv toultan oule protez li. De lot kote, san Mark, i ti pou'n fer en bann betiz dan son lavi. Mark ti toultan ekout li, donn



li bon konsey. I ti donn li en sans valer dan li menm ki son papa ti'n fer son mye pour detri. Parey labitid sak fwa Zan-Iv ti mazin son papa, son labous ti fer en grimas, gou anmer. I pa ti kapab *get-on* avek son papa. Son papa ti tro dominer, tro otoriter. Tou dimoun kot lakour ti bezwen fer sa ki li i dir, sankwa tanpet ti leve. I pa ti kontan kimannyer son papa i tret son manman, lafason ki i ti toultan say avek son granmanman, en vye tantin byen kankan, ki ti ede met diskor dan lakour. Pa parey Tonton Kayor. Tonton Kayor ti koul. Ti inital mazin lo tou sa la, i ti a zis gat son bon limer. I ti antre anndan pour al telefonn Mark.

Apremidi, zot ti desann borlanmer. Mark ti paret oke. An desandan, i ti rakont Zan-Iv sa nouvo zwe konpiter ki i ti'n gannyen. Lanmer ti kalm, en ble tirkwaz, tase tou sort kouler par kostim-de-ben bann marmay ki ti pe zwe dan batan laroul. Leko zot riye ti egey ler. Pli lwen, de garson ti pe fer lakours plans-a-vwal. Mark ti tir son triko, tonm vant anler lo lans. Zan-Iv osi ti kas son semiz, me li i ti tay dan delo.

“Annou!” I ti kriy avek Mark. I ti tre konsyan ki son labote fizik ti pe atir regar de trwa zenn fiy ki ti'n asize pa tro lwen. I ti naze ziska dan fon blan, koule e devire. I ti repet delo, sakouy son latet pour klersi son lizye, e get ver lans. Mark pa ti'n swiv li. I ti war li dan lwen, plat ater, kartye fannen konmsi i ti'n trouv en nouvo metod priy lesyel.

Zan-Iv ti koule, naze, koule, naze. I ti koz en kou avek Misel ki ti pas obor li lo son plans-a-vwal. I ti get ankor en kou lo lans pour war si Mark ti pe vini, me non, i ti ankor plat ater! I ti sourir ... Mark, la al gete ki i ti pe reve! Zan-Iv ti konmans naz ver lans avek lentansyon

pour al trenn Mark dan delo.

Kouran ti pe pous li dan sid, alor i ti aret en kou, naz sirplas pour li oriyant son lekor. Son lizye ti rod Mark lo lans, me toudenkou i pa ti war li. Dimoun ti pe ale vini, me Mark pa ti parmi zot. I ti get dan batan laroul, me ti paret annan zis pti marmay la. I ti kontinyen naz pli pre e letan i ti zis detrwa met avek ater, kot i ti ganny pye, i ti debout en kou e rod Mark. Non, i pa ti la. I ti mars ver lans e la, apre i ti war li touzour alonze kartye fannen ater. I pa ti'n bouze. Zan-Iv ti konfiz en kou. I ti a'n zire ki Mark pa ti la en moman avan. Toudmenm i ti apros li an misouk e i ti pe graponn li par son sevir pour trenn li dan delo, kan i ti remark son figir. I ti larg son lipye,

“Mark, ou figir!”

Mark ti ouver son lizye e proteste ki Zan-Iv ti pe zet delo lo li.

“Mark, ou figir in pwake,” Zan-Iv ti repete.

Mark ti mat asize e tat tat son figir, “Kwa? Mon pa santi nanryen, mwan. I pa fermal.”

“Be gete, la, ou lebra, ou lestoman tou. I'n anblouti konmsi ou alerzik avek keksoz.”

Mark ti egzamin son lekor, me i pa ti paret pe konpran leta son degenn.

“Vini, sorti dan soley. Annou al klinik. Ou pa byen.” Zan-Iv ti santi li vreman enkyet.

“Be mon santi mwan oke, mwan.” Mark ti proteste, me

Zan-Iv pa ti oule tann parle. I ti ensiste ki Mark i pas klinik. Me apre, li menm li Mark ti soke kan i ti war son leta dan laglas. Ners ti donn Mark en tib lakrenm pour pas lo li e dir li vin war dokter son lannmen si son figir ti ankor anfle.

Mark ti al alonz lo lili kan i ti ariv se li. I pa ti dan douler, me *still* ti soka leta ki son lekor ti ladan. Granmersi Zan-Iv ti avek li letan ti'n dekouver sa. En pti sonmey ti pran li e ler i ti reouver son lizye, son lasanm ti dan fernwanr. En moman apre, i ti ganny eklere brefman par en kou-d-zekler ki ti enprim tou lobze dan lasanm an nwanr ek blan lo son lespri e donn li ilizyon ki i ti'n pri dan en vye portre.

En kou-d-van ti soufle son rido anler e anvol detrwa papye ki ti lo son biro. Gronnman loraz ti roul atraver lesyel. Mark ti leve e al ferm son lafnet. I ti reste debout en moman pour get deor. Zekler ti ilimin lakour deor, pye fransipann, pye papay, pye koko an nwanr ek blan. Mark ti tann lapli kot i vini, en son ki ti fer son leker akselere e donn li lanvi kriye san rezon. I ti tranble e retenir son respirasyon an atandan ki sa premye gout i tap kont son lafnet.

I pa ti bezwen esper lontan. Lapli ti fwet avek laraz kont vit e divan ti irle toultour lakaz, pe sey rod en zwen pour antre. Tol lo twa ti krake. Ankor en kou-d-zekler, ankor en portre, me safwasi an miltikolor, lefe dispersyon lalimyer dan bann gout delo. Loraz ti eksprim son mekontantman, bokou pli pros. Mark ti obzerv sa defile tanperanman lanatir, ki ti reflekte sa bann santiman bouldersan, enkyetan ki i ti'n resanti sa dernyen tan. I ti respir for pour kalme batman son leker ki ti tro rapid.

Apre i ti travers lasanm pour al apiy lo bouton lalimyer obor laport, me zis konman i ti pas devan laglas son larmwar, en lekla zekler ti aret letan. En portre alanver, imobilize, paret dir en leternite. Son refleksyon ti tranble, deforme e dezentegre. Mark ti swiy son lizye pour klersi son vizyon. En dezyenm lekla ti swiv vit lo sa enn premye, portre lasanm ti ankor alanver, me san son refleksyon. En segonn lafreyer paralizan, apre lenkrwayans, finalman en pti riye pres avek lafoli.

Mark ti esper en trwazyenm kou-d-zekler pour konfirm sa ki son lizye ti'n war, me son lespri pa ti oule aksepte. Trwazyenm mwannik ti reanmenn li *still-life* lasanm, san li. Mark ti fer en pti kriye, epi lans atraver lasanm pour pez lo bouton lalimyer. Lasanm ti bennyen dan lalimyer dore, resofan, me leker Mark ti fre, fre. I ti trenn son lipye ver larmwar, son respirasyon ti kourt.

“Pa vre, pa vre...” i ti resit anba son lalenn. I ti ferm son lizye, e anvoy son lanmen pour tat devan li. I ti tat laglas.

“Pa vre, pa vre, pa vre!” I ti ris lalenn trwa fwa.

I pa ti lozik, pa dan lord larealite, alor pa posibil! I ti fors son lekor ouver son lizye e i ti kas en riye pli pres avek lafoli ki sa enn avan. Son refleksyon ti la, dan laglas, parey son labitid. Lemonn ti revin drwat. Tou ti annord. I ti tonm lo son lili e riye ziska son larm ti koule. Son limazinyasyon ti pou touy li. Menn, letan i ti pour rakont Zan-Iv sa.

I ti swiy son lizye e leve pour li al dinen. I ti pous lefe ki laglas ti'n montre li en figir byen pal, preski transparan, dan fon son lespri. Lenportans se ki son lekor ti'n retourn son normal, san okenn tras sa alerzi pli boner.

Lanmen Kim Basinger ti lev li dan pti sis er edmi parey labitid. Ti pran li detrwa segonn pour realize ki ti en zour konze piblik e ti napa lekol. I ti rearanz li anba son tapi pour pran swen avek Kim. Apre, soulaze, me osi avek en pti tas laont, i ti leve vitman, tourn son servyet toultour son leren e al dan lasanm-ben pour al *shower*. Byen prop, i ti retourn lo son lili, pour li kontinyen lir sa liv ki i ti'n konmans lir ti annan en semenn.

Se letan son lanmen ti poz lo son liv ki i ti remarke. I ti ris son lanmen e ouver li dan lalimyer soley ki ti filtre ant zwen rido. Wi, i ti'n byen war; lapo ti'n konmans pouse ant son bann ledwa, ki ti paret pli long e mens ki labitid. Ti en pti lapo mens e transparan. Reyon soley ti travers li fasilman. Son leker ti bat for. I ti lev son lot kote lanmen e ekart son ledwa pour egzaminen. Lot kote osi ti parey; en pti lapo mens ti konekte son bann ledwa ansanm, en pe parey pour en kannar.

Mark ti frisonnen. Mon Dye, ki ti pe ariv li? I ti pe degize; premyerman son latet, la son lanmen. Bann bren lafreyer ti konmans defile e pikot dan son vant, parey zegwir dan en boubou sansib, ovif.

I ti fors son lekor leve pour li al fer sa ki son lavey i ti'n tro per pour li fer; al egzamin son lekor dan laglas. I ti debout li touni e regard byen. I ti paret drol, me kwa egzakteman ki ti diferan, pa ti fasil dir. I ti pas lanmen dan son figir, son latet ti'n ralonzi, me kekfwa akoz prezan i ti kler. Son lizye sinwan ti toultan en pti pe an bye, me la, i ti'n vreman fann dan banbou. Son pipil - i ti'n pli gro? Petet non, i fek lev dormi apretou, sanmenm son lizye ti paret drol.

I ti debout en kou drwat avek son de lebra koste. Son lebra ti paret pli long ki normal. I ti'n megri e byen pal. I ti pas lanmen lo son lestoman, me pez kimannyer i ti anvi, i pa ti santi son bann kot. Pa posib! Son lapo ti listre anba son lanmen. Son plim! Plim ki ti'n konmans pouse lo son lestoma ti'n grennen. Menm bann plim ki ti lo son lazanm ti'n grennen. Anbarase, i ti remarke ki son organ seksyel ti'n rakoursi. I ti tyonbo son bout e sey ris li drwat. Ti ankor annan detrwa pti plim lo la, me i ti pli parey en pti garson trez an ki en grannwanr diswit an. Mon Dye! Si Tanya ti war li koumsa, zanmen i ti pou oule li ankor!

Dan laglas son lizye ti reflekte son lafreyer, son tourman. Son lemond ti pe degrengole. Son lafreyer ti deploye parey lapat zourit e etal dan tou son manm. I ti trangle li e kwi son trip. Ti annan keksoz mal avek li. Ou a dir i'n sot konmeraz dimoun, prezan i pe degize?

I pa ti tro krwar dan sa bann zafer siperstisyon, me Tant Lina ti toultan asir li ki sa i egziste. Bonnonm dibwa i kapab fer dimoun en bann malis. I ti tranble. Lekl ki i ti pou kapab diskrit tou sa avek? Son tantin? Zan-Iv? Dokter? I ti fek sorti kot dokter e zot pa'n war nanryen mal avek li. *No way* i ti pou tir li touni devan son tantin. Sa ti kit zis Zan-Iv, me i ti kapab imazin reaksyon Zan-Iv ler i ti pou get son pti belenbi. Non mersi, i a gard son problem pour li menm.

En nyaz depresyon, nwanr e lour, ti pez lo li. I ti anvi zis kokiy li pti pti e dormi ziska ki sa kosmar ti a pase. I ti

pas lamatinen dan son lasanm devan son konpiter, lapliparditan san menm war lekran devan li. I ti santi li deprimen, konfize.

Ler i pa ti sorti pour li vin dezennen, son tantin ti tap laport,

“Mark, ou oke? Manze in pare.”

“Mon pa lafen.”

Sa lanvi manze ki ti'n dray li sa de dernyen semenn ti'n disparet. Ver pti apremidi lasanm ti konmans vin tro pti pour li. Mark ti leve e al telefonn Zan-Iv.

“Zan-Iv, ki ou pe fer? Monte.”

“Be ... er ... mon ti'n dir Danyel mon pou pas kot li pour mwan donn li lanmen aranz sa vye karkas minimok ki son papa in donn li. Akoz ou pa desann ou?”

“Non, mon ... I oke. Mon a war ou demen.” Kantmenm i ti sey gard son lavwa normal, tansyon ki i ti pe resanti ti aparant dan son lavwa. Ti annan en poz lour, apre Zan-Iv ti demande,

“I annan keksoz ki'n arive? Ou pli malad?”

Malad? Mark ti konfiz en kou, me apre i ti rapel son alerzi lavey.

“Non, non. Mon figir in oke depi yer swar.”

## Sapit 7

Apre ki Mark ti'n rakrose, Zan-Iv ti reste en moman dan mazinasyon devan telefonn. I ti konn Mark tre byen e la, son lensten ti dir li ki keksoz pa tro korek avek son dalon. I ti deside les tonbe Danyel e mont kot Mark. An montan, son lespri ti lo Mark. Mark ti'n sanze. I ti nerve pour en nanryen ditou konmela, e Zan-Iv ti konsyan ki i ti trankil, pli trankil ki labitid. Ti annan keksoz pe fatig li.

“Msye, madanm,” Zan-Iv ti kriy bonzour depi ki i ti ariv dan zarden. Ti napa repons. Pour en moman, i ti ganny lenpresyon ki ti napa personn la. Zis Mali, gro matou Tant Lina ki ti la, pe ronfle lo paye anba lavarang. I ti ouver en kote lizye pour get li. Me apre Tant Lina ti tir son likou par lafnet lakwizin,

“Ou sa Zan-Iv?”

“Wi,” Zan-Iv ti fer letour deryer kot lakwizin e Tant Lina ti ouver laport pour li.

“Ou dalon i dan son lasanm. I laba depi bomaten, ni sorti pour vin dezennen i pa'n oule!”

“Mon ava al get li.”

Zan-Iv, ki ti en viziter frekan kot Mark, ti alez e santi li se li dan sa lakour. I ti al direk kot lasanm Mark e san menm tap laport, i ti antre. Mark ti lo son lili, son lanmen anba son latet, pe get dan plafon.

“E Yo! Leve ou a pipi! Ki arive?” I ti plak li lo bout lili.

Mark pa ti reponn, me kontinyen get dan plafon. I ti swiv regar Mark pour gete ki sa ki ti si enteresan dan plafon, me i ti war zis mark ki kaka lezar ek lezot zensek ti'n kit deryer. Ti'n ler pour repenn sa plafon.

“Yo!” Zan-Iv ti apel Mark ankor dousman. Pa repons. Silans ti trennen. Toudenkou tapaz konpiter Mark kot i demare ti rezonn tre for dan sa pti lasanm. Zot tou le de, zot ti sote.

“B ... Be ...” Zan-Iv ti tatonnen.

Mark ti leve, sot ater e ariv devan lekran dan en sel mouvman rapid. Zan-Iv ti swiv li. Zot ti gete, ebete, kot sa konpiter ti pas dan son bann prozedir demaraz labitid, me zis avan nyaz ble program Windows ti konmanse, lekran ti vin nwan e sa mo BIPIP ti aparet.

“Ou war ...” Mark ti dir.

“Kwa? Kisisa Bipip? Kimannyer ou fer li vin onn litousel?” Zan-Iv ti kestyonnen, ebete.

“Pa mwan sa.”

Bipip ti fer mwannik lo lekran e tou le de ti fikse li, fasinen. Apre lekran ti tennyen avek en dernyen mwannik. Mark ti retourn asiz lo son lili. Zan-Iv ti swiv e asiz obor li.

“Zan-Iv, i annan en keksoz pe arive, mon pa konpran,” Mark ti dir dan en lavwa grav, enkyet. “Pa premye fwa mon konpiter i vin onn avek sa mesaz lo la; me pa sa ki mon ti oule dir ou. Get mwan!”

Zan-Iv ti get li.

“Ou pa war nanryen mal avek mwan?”

“Er ... non!”

“Get mwan byen!” Mark ti ensiste e i ti lev debout devan li dan zis en pti kannson sport, san semiz.

“Well, ou latet i kler, i fer ou paret en pti pe drol; ou lestoman, menn, ou a fer dimoun degout poul!” I ti sey fer en pti dyok, me Mark pa ti riye. I ti sey klersi son lespri e reget Mark parey en dimoun ki ti'n war li pour premye fwa, apre i ti dir dan en lavwa tranblan, me avek son fransiz labitid,

“Menn, si mon ti'n zwenn ou en zour swar, mon ti pou taye! Ou parey enn sa bann zonmbi ki annan de semenn depi ki'n kit simityer!”

“Egzakteman! Get sa!” Mark ti lev son lanmen e montre li sa lapo ki ti'n pous ant son ledwa. I ti soke.

“Mark menn, ou annan en problem serye!”

Mark ti reasiz obor li e bes son latet dan son lanmen. Konfizyon ek tourman ki Mark ti pe santi ti pez lo li osi.

“Mon pa konnen ki mon pour fer,” Mark ti soupire.

“Kekfwa en maladi, al kot dokter.” I ti sizere, me san gran lespwar.

“Mon fek sorti kot dokter lot fwa. Mon pa anv i al ankor.

Tou fason ki mon pou dir li? Dokter mon krwar mon pe vin en zombi? I a bez mwan lazil!”

Pour en moman ti annan en gran silans. I ti pe sey asimil problemn Mark, me i pa ti ganny en konpran.

“Be ki sa zafer konpiter vin onn i annan pour fer avek tou sa?”

“Mon pa konnen, en zour semenn pase mon'n vini sorti zwe foutbol, mon konpiter ti onn avek sa mo lo la.”

“Ou annan okenn lide ki savedir?”

“Bipip i pti non gate ki mon manman ti donn mwan letan mon ti ankor ptipti akoz mon pa ti kapab dir *little Bo-peep*.”

“Kwa!” Zan-Iv ti eksklanmen e, kantmenm i ti realiz gravite sa sitiasyon, i pa ti kapab anpes son lekor war son kote komik. Avek en frison egzazere, son figir grimase, i ti fil son latet dan figir Mark,

“Ou ... ou... ou... Manmi pe vin sers ou ... ou ... ou ...”

“Aret donn grenn, menn!” Mark ti proteste, me Zan-Iv ti kontan pour war li fer en pti sourir. Selman ti annan en pe sans dan sa ki i ti pe dir. Li, i ti senserman krwar dan en lemond spirityel, kot nanm bann dimoun ki ti pres avek ou ti kapab oule, pour en rezon ou enn lot, pran kontak avek ou. En lide ti konmans formen dan son latet.

“Mark, kekfw son nanm i a pe sey kominik avek ou.”

Zan-Iv ti propoze, konpletmen serye safwasi, “Ki nou bezwen se en *ouija board*. Mariz i annan enn. Son manman ti anmennen sorti Dyoubay. Les mwan organiz sa.”

“En *ouija board*? Pour sey kominik avek mon manman? Ou krwar sa pour marse?” dout dan lavwa Mark,

“Kot ou konnen Mariz i annan sa, ou?” I ti azoute.

“Lotrozour, dan son lasanm...ar... pa demann kestyon, zonn!”

“Be nou pa konn servi..”

“I fasil. En kantite fwa nou'n war dan film.”

“Sa dan film.”

“Dwatet Mariz i konnen li.”

Pour enn fwa se Zan-Iv ki ti'n ganny en lide fou, me Mark pa ti tro an faver.

Tant Lina ti tir likou dan lasanm,

“E, mon'n fri gato bannann, zot oule?”

“Ar, Tant Lina, ou menm ou kwever ki dan mon leker, ou!” Zan-Iv ti sikann Tant Lina.

Zot ti leve pour al manz gato bannann dan lakwizin. Zan-Iv ti koz koze avek Mark ziska dan pti sis er. Apre i ti desann se li.

## Sapit 8

Apré dinen sa swar, Mark ti get televizyon ziska ki stasyon ti fermen. Apré i ti asiz lontan anba lavarang lo balistrad dan mazinasyon. Vizit Zan-Iv ti'n relev son limer. I pa ti'n konpran plis, me tou ti'n nepli nwanr. Lannwit ti ranpli avek mazik. Loder fler fransipann ti flot dan son direksyon tanzantan. En mousfe ti valse ant son fler ek fler papay. Grele ek grenwiy ti donn lamezir. Dan lwén, son laroul kot i kraz lo brizan ti konstan.

Lalin pa ti ankor leve, me parey en lesarp dyamante, zetwal ti'n etale avek en lensousyans anfantil. Zot ti paret telman pre, ou ti a krwar ou zis kapab anvoy ou lanmen pour ranmas zot. Mark ti sourir. I ti tann lavwa dous son manman pe rakont li,

“Ler Bondye ti'n deside plas zetwal dan lesyel pour kler zonn aswar, i ti met zot dan en gro korbey e sorti deor dan zarden en swar pour aranz zot enn par enn byen annord. Me par maler i ti tap son lipye avek en ros, mank lepa e plannen ater. Son korbey ti anvole e zetwal ti fannen partou dan en dezord eklatan.”

Letan son fes ti'n fermal lo balistrad, i ti bouz dan fotey e la, sonmey ti ganny li.

*Lalin ti leve, bennyen dan disan.*

*“Manmi, manmi..” Son leker ti pe anvole, i ti mank respirasyon. Lonbraz en sat ti koup devan li. Sansib ti kros son lipye. I ti konnen ki sa gro bebet ti pres pour aparet...*

Mali ti swazir sa menm moman pour glis ant son

lazanm, e Mark ti sote e anval son kriye. I ti pe tranble e santi lasyer fre kot i koul dan son ledò.

“Miaw,”

I ti anvoy lanmen anba fotey e ranmas Mali, apré reavans lo balistrad. I ti apiy son ledò avek poto e konmans kares Mali. Sa mouvman repete ti kalme li e Mali ti ronfle avek plezir. I ti soupire, en isman lalenn ki ti sorti dan fon son nanm. I ti ferm son lizye, apré reouver li en sel kou an gran apenn en minit pli tar. I ti'n tann kriy son non. I ti get isi, get laba. Pa ti paret annan en nanm vivan.

“Mark..” en lavwa feminen ti pe kriy li.

I ti lev debout e sorti deor. Lannwit ti'n nepli dou e kalm, me ti'n pran en ler menasan. Nyaz ti'n akimile, zetwal ti'n disparet. Ti annan en silans epe, mor.

Laserpoul ti monte lo li.

“Mark ...” sa lavwa ti apel li irzan. I ti sey idantifye dan ki direksyon sa lavwa ti pe sorti, me ti paret toultour li.

I ti debout en kou imobil e les son lizye rod sours sa lavwa dan sa fernwanr enpenetrab avek en konsantrasyon total. I ti pe rod plis avek son lespri ek son lensten ki avek son lizye. Toudenkou i ti santi konmsi en kou-d-zekler ti desir son lespri e en lalimyer briyan ti eksploz deryer son lizye. I ti ferm son lizye e tenir son latet dan son lanmen en moman, an mordan son lalev pour tenir sa douler. Douler ti pas vit e letan i ti reouver son lizye, pye koko ti pran laform, apré zarbis ek larestan zarden. Mark ti ganny lenpresyon ki i ti plennlin, tou keksoz ti kler, me avek en lekla metalik.

“Mark ...” i ti tann ankou, me pli dousman, elwannyan, avek en drol lefe konmsi leko dan larozwar, e la, Mark ti konmans soupsonnen ki sa lavwa ti dan son lespri e pa eksteryer.

Kantmenm sa, i ti otomatikman avans ziska finisyon zarden. I pa ti war persomm. Toudenkou, en zve dife rouz, ble ek ver ti atir son latansyon. I pa ti konpran kwa, me i ti estimen ki i ti lwen lo labe Lans Rwayal. Kekfwa en avyon? I pa ti paret. Lalimyer ti zis lo sirfas lanmer e non pa parlao. En bato? Pour en bon senk minit sa bann lalimyer ti sanz kouler lorizon, sanz kouler sirfas lanmer, apre zot ti disparet. I ti debout ankou en kenzenn minit la, pe fikse losean, apre i ti konmans ganny fre e i ti antre anndan. I ti al dan son lasanm e tonm lo son lili epwize. Lavi ti'n vin tro konplike!

Mardi Mark ti lev avek en sansasyon ki son lapo lizye ek son fron ti pe brile. Ar wi, ti'n ariv ler pour li leve pour al lekol! Senk minit, ankou zis senk minit, apre i a leve. I ti vir kote pour kasyet sa reyon soley ki ti pe tap lo son figir pe revey li. Me, i pa ti dormi ankou senk minit akouz i ti santi son zorey ek likou pikote konmsi i ti tro pre avek dife. Douler ti tro for pour li inyore e i ti lev asize.

I ti pas son lanmen deryer son likou e son lapo ti so, so e fermal. *Shit!* I ti avans devan laglas pour war ki i ti gannyan, me lasanm ti ankou tro sonm. I ti al ouver rido pour les soley antre, me i ti bezwen referm rido deswit akouz kot soley ti tap lo son lapo, i ti santi li pe brile. I ti alim lalimyer pour gete ki ti pe ariv li. Son figir ek son likou ti'n anfle kot soley ti'n tap lo la, parey sa zour borlanmer, me safwasi, i ti fermal. Ti annan en boutey *Baby Lotion* dan son larmwar. I ti pas lo li, apre ki i ti'n tap delo fre dan son figir. I ti asiz en kou lo bout lili pour sey reflexir ki i ti pou fer. I ti annan legzanmen

kontabilite sa bomaten e legzanmen komers apremidi. Merkrede i ti pou annan tes angle, dezyenn parti demyen legzanmen avan vakans Vandredi. Si i sanz li byen e kasyet son lekor, kekfwa i ti a kapab al lekol. I ti leve, ouver larmwar, retir en semiz lanmans long, jeans pour li mete. I ti abiye, atas son semiz ziska son likou, met soset pour kouver son lipye. I ti kalkile ki son bonnen i a kouver son firgir e ki i a met son lanmen dan son pos.

Mark ti sot deor, e i ti vit realize ki sa pa ti pou marse. Son kap pa ti kouver son figir ase e douler ti tro for pour li tenir. I ti reantre anndan e ferm rido. I ti pour bezwen mank lekol. I ti napa swa. I ti retir son kap e tonm asize lo sofa, son figir dan son lanmen. Son tantin ti'n fini al travay e i ti santi li tousel, tousel avek son problemm.

Larm ti ranpli dan son lizye e vers an silans ant son ledwa. I ti is leker. Kimannyan i ti pou pas en lazournen san ki i bezwen sorti deor dan soley? Apre i ti leve, al dan larmwar kot son tantin ti met bann dra, i ti pran detruwa pour li blok bann trou lafnet kot soley ti penetre. I ti pik zot an plas avek pin. Answit, i ti pas son short ek triko labitid. Me kantmenm sa, ler ti'n ariv dan pti dis er, i ti ganny so, so. I ti bezwen met bann vantiler plafon dan sak lasanm onn. I ti pas son lazournen pe get film.

Ler son Tantintin ti rantre lakour sa swar, Mark ti'n anferm li dan son lasanm. I pa ti reponn ler son Tantintin ti bis lo laport pour dir li vin ed li avek bann korve, ni ler i ti retap ankou pour dir li ki Zan-Iv ti lo telefonn. I pa ti anvi koz avek person. Akfer i ti pe viv, i pa ti konnen. Lavi li menm ti napa sans. Ou ti ne, pas dan en bann problemm, apre pour ou mor. I ti pas li en lanvi fou pour penn son lasanm mov parey Adrian Mole.



Tar dan lannwit i ti sorti pour al rod manze. Apre i ti debout en moman anba lavarang pe get borlanmer, pe mazine si i ti pou war sa bann lalimyer kouler ki i ti'n war son lavey. Me ti napa nanryen. Lannwit ti trankil e dous, avek son karakter labitid.

Lannmen i ti reste dan lakaz take ankor, pe esper soley tonbe. Lazournen ti long. Letan ti trennen. I ti dormi, lir, dormi ankor. I ti priye ki sa problemm lapo ti tanporer parey son problemm lafen. Dan pti kat er Zan-Iv ti telefonnen, mersi Bondye! Zanmen i'n deza osi ere pour antann lavwa Zan-Iv.

“E Yo! Kimannyer ou ete?”

“Mon pa byen. Sa problemm lapo anfle ki ti arive lotrozour borlanmer in rekonmanse. Mon pa kapab sorti dan soley, i brile.”

Zan-Iv ti fer en pti son senpatik, apre i ti kontinyen,

“Mark, mon'n fini organiz sa *deal* avek Mariz. Nou pou vini tanto.”

“Menn, mon pa konnen. Mon pa tro krwar sa pou ede.”

“Annan konfyans dan Tonton Zan-Iv. Danyel pe organiz enn de pti labyer. I pou gou!”

Mark ti remarke ki pour Zan-Iv sa ti zis enn son bann lavantir fou, me li osi i ti'n fatige e agase litousel dan lakaz tou lazournen. Alors i ti agree.

## Sapit 9

Mark ti tann tape lo son lafnet dan pti dis er edmi.

“Mark, Mark,” I ti tann lavwa Zan-Iv pe kriy li dousman.

I ti dekil rido e ouver lafnet pour get Zan-Iv.

“*Shsh!* Mon tann ou. Ou oule lev Tant Lina?”

Deor dan zarden, i ti war Zan-Iv, Danyel, Mariz ek pti ser Mariz, Maria pe esper li. Zot ti paret byen eksite, pe rikannen dousman. Mark ti friz son lizye pour bar laklerte tors ki Mariz ti pe klat dan son lizye.

“Anmenn en bwat zalimet. Nou'n annmenn labouzi, me nou'n bliy zalimet.” Mariz ti dir li.

Mark ti pas obor laport Tant Lina lo bout lipye, pran en bwat zalimet lo kabinet lakwizin e sorti par laport deryer.

Enn par deryer lot, bannla ti pran pti santye ki diriz ver lafore. Ler i ti realize kot zot ti pe ale, Mark ti aret en sel kou an gran e i ti santi Danyel, ki ti zis deryer li, bat lo li.

“Kot nou pe ale?” I ti demande, enkyet.

“Pa tro lwen avek isi i annan en gro ros. I vid anba la. I a zis bon,” Zan-Iv ti reponn.

*Oh no!* Pa dan lafore! Son lipye ti lour en sel kou.

“Akoz nou pa reste lanmenm deryer lakaz. I pou oke, la. Si nou pa fer tapaz Tant Lina pa pou tann nou.” I ti sizere.

I ti pe sey gard son lavwa kalm taler bannla pou araz li si zot konpran ki i ti per me son ton ti o parey pour en pti fiy.

“Ase landor, menn. Laba pou pli koul. Ki sa ou per dandosya?” Danyel ti dir li, an pasan par devan li.

Danyel, li, i ti annan en lalanp bobes fer avek en bwat dile vid dan son lanmen kote i ti'n ganny sa Mark pa ti konnen, lontan ou ti'n aret war lalanp bobes Mae. Me dan laklerte sonm lalanp Mark ti war zis blan lizye Danyel ek lekla son ranze ledan devan, ler i ti monk li avek son sourir enpertinan.

Mark ti soupir for pour kalme son batman leker ki ti'n akseler toudenkou e i ti swiv zot malgre li. Kimannyer i'n les Zan-Iv bat son latet pour antre dan en lavantir kouyon koumsa? I ti sey dir son lekor ki i ti en grannwanr e ki ti napa nanryen pour enkyet, me i pa ti kapab anpes son lekor vin plizanpli per.

Lafore ti imid. Lafoumbal ti'n desann ba e tou keksoz ti angli. Pye dibwa, kouver avek lalyann filant, ti paret pli pres, pli etoufan. Son lizye ti balye brousay pour swiv tou mouvman lonbraz feyaz, ki ti transform an mons dan lalimyer lalanp bobes Danyel, paret pe apel li. Son zorey ti apik pour tou krakman brans pye dibwa. Bann pti glisman zensek dan lapay, kriye grele ek lezot son lannwit ti tris en sel kou kot zot ti pase. Mariz ti fer en kriye kan i ti pas dan en lakaz bib ki ti kol kol dan son seve, swivi par en pti riye anbarase.

Letan zot ti ariv kot gro ros, Mark ti pe transpir gro konman ledwa. Later anba sa ros ti anpoud. Mous mason ti'n konstri en lavil avek later rouz anba lavarang sa ros. Bannla ti plak zot an ron lanmenm ater. Mark ti asiz li ant Mariz ek Danyel. Mariz ti alim trwa labouzi e kol zot lo bann pti ros anba sa gro ros, apre i ti tenny tors. Danyel ti ras trwa kann labyer dan sa sak jeans ki ti lo son ledò e donn sakenn enn. Bann fiy ti refize, zot ti'n anmenm zot pti bwat dyous. Mark ti relaks enpe e i ti ekout son bann dalon a sourdorey. Zan-Iv ti pe rakont malfezan.

“Mon tantin ti'n deza reste St. Elizabet, li. Menn, ou war aswar la, zis zot war pti konmiyon ranpli avek tang pase dan koridor dortwar ...”

Mariz ti enteronp Zan-Iv, “Pe tar. Si nou pou konsilte *ouija board*, annou fer li.”

E avek en ton serye, Mariz ti demann li,

“Alors Mark, ou krwar ou manman pe sey pran kontak avek ou?”

Mark ti is zepol “Zan-Iv ki dir sa. Mon pa konnen, mwan.”

“Bon. Nou a gete. Koste Maria. Danyel, avanse! Fodre nou form en ron.” Mariz ti tir sa bord dan sak e plas li ater dan milye.

Mark ti'n deza tann nonm en *ouija board*, me zanmen i ti'n deza war enn. Ti en bord an kartron gro ble, preski nwanr, avek lekritir lor liminan lo la. Dan milye ti annan

de kare, marke “Yes” ek “No”, anserkle par trwa ranze let alfabet. Dan son kat kwen ti annan bann senbol drol; en sat lo en kar lalin; kek konstelasyon zetwal ki Mark pa ti rekonnet; en bann senbol Ezipsyen e de serpan anpaye ansanm.

Mariz ti plas osi en pti blok nwanr lo bord. Ankor ti annan bann senbol grave lo la. Maria ti aranz bann labouzi pour kler lo bord. Tou ti trankil. En kar lalin ti'n leve, me i ti'n kasyet deryer en gro mas nyaz e i ti zis benny lafore dan en larder epe, kouler krepiskil. Dan en lavwa grav, Mariz ti konmanse.

“Mon averti zot. Kominik avek en *ouija board* pa en zwe. Nou pe sey pran kontak avek Manman Mark, alors fodre nou konsantre. Asiz pres ki zot zenou i tous avek pour kanmarad obor zot. Plas zot ledwa lo sa blok, me pa pouse. Mwan mon a demann keston. Pa kas nou serk nenport kwa ki arive. Pa tir lanmen lo blok.”

“Zot in pare?” Mariz ti demande dousman.

“Wi,” Zan-Iv ti reponn. Lezot ti balans latet.

“Mark, kimannyer ou manman i apele?”

“Emma,” I ti soufle, per pour reponn for e kas sa silans epe ki ti'n etabli.

“Emma, Emma, ou la?” Mariz ti demande. Son lavwa ti rezonn for dan zorey Mark e fer son leker bate.

Tou ti espere. Person pa ti koze. Mark ti santi tansyon mont o dan ler.

Emma, Emma, ou la?”

Toudenkou Mark ti etonnen war sa blok ki zot lanmen ti lo la glise atraver bord pour aret lo kare “Wi”. Son leker ti anvol dan son lagorz.

Maria ti proteste, “Zan-Iv, ou'n pouse! Mon'n santi ou pe pouse.”

Leker Mark ti retonm dan son vant.

“Mon pa'n pouse mwan. I'n bouz limenm.” Zan-Iv ti replike, me i ti pe fer en pti sourir bandi.

“Zan-Iv, pa konmanse!” Mariz ti reprimann li, “Konsantre!”

“Emma, Mark i la. I pare pour ekout ou. Ou annan okenn mesaz?”

Nanryen pa ti arive. Mariz ti rebran, “Emma, Emma, ou tann mwan?”

Mark ti konmans perdi konsantrasyon. Son lizye ti tap lo en lakaz bib dan kwen e i ti admir detay son bann brendil listre, tise dan en patern eternel. Dan milye en bib ti pe obzerv zot avek son gro lizye malfeter. Lavwa Mariz ti rekil dan lwen. Toudenkou, i ti antann son en lapel kot i tap dan later e later kot i ganny vid dan en trou lo plastik.

“Zot tann sa?”

“*Shshhh!*”

Mark ti sey konsantre ankor lo lavwa Mariz ki ti'n pran

en ritm ipnotizan, me son lizye lo lakaz bib, son lespri ti ale. I ti tann ankore sa lapel ki plonz dan later, kot later i fannen lo plastik... en son ki ti fer li mazin simityer. I ti vir isi, vir laba, fikse for dan fernwanr, me i pa ti war nanryen. Lezot ti pe konsantre lo lavwa Mariz. En lafreyer ti atak li. Son leker ti bat for dan son pwatrin. Sa son lapel ti anlifye e rezonn dan son latet, ziska ki i ti tann zis sa. Lakaz bib ti disparet dan son lizye; dan son plas i ti war liyer laflanm en lalanp bobes, poze lo en ta later rouz, silwet en fanm pe pelte later dan en trou... son manman? En gele dezespere ti akonpany sak kout lapel. Lanmen Mark ti konmans tranble, en leokri ti formen dan son vant, me avan ki i ti ouver son labous pour li kriye.

“Manman O!” en sat maron ti irle, sorti anler lo ros ki zot ti anba la. Anmenmtan en sov souri ti anvol par lao zot latet. Lasasen! Tou dimoun ti demare, pe anvoy lavwa, dirizan ver lakour!

An arivan dan zarden kot Mark, zot pa ti kapab tenir! Zot ti roule dan zerb, pe kas bann gran gran riye, pe sikann kanmarad. Personn pa ti oule retourn dan bwa pour al sers ouija board ek labouzi. Alafen Zan-Iv ek Danyel ti dakor pour ale.

Ti nek dan pti de er sonnen ki bannla ti antre se zot.

## Sapit 10

Aprè ki son bann zanmi ti'n ale, Mark ti tonm lo lili, son sourir ankore lo son figir. I ti sey dormi, me sonmey pa ti vini. Sa lensidan sa fanm pe pelte ti trakas li. Kantmenm bann manmay ti'n fer riye lo sa sat maron ek sa sov souri, personn pa ti'n mansyonn tann kout lapel. I krwar zis li ki ti'n eksperyans sa. E pe ezitan, i ti'n menm demann zot si zot ti'n tann keksoz avan sa sat, me personn pa ti'n tandè. Ti drol. I ti war sa lasenn kler dan son lespri, e *feeling* ki i ti gannyen, konmsi konmsi ti en memwar e pa en laparizyon dandosya. Eski i kapab en keksoz ki ti'n ariv li dan son lanfans e ki i ti'n bliye? Sankwa akòz i ti'n deswit devinen ki sa fanm ti son manman? I ti fer son lespri travay pour plis detay en levennman parey e i ti sey rekonsilye sa avek son lafreyer irasyonnel pour sa lafore, me tousala ti fer en melimelo dan son latet ziska ki anfen sonmey ti bag li. Me zis avan, i ti ganny lide pour al fouy en kou dan bann zafer son manman ki zot ti'n met dan stor pour gete si i pa ti a trouv keksoz pour ed li konpran tousala. I ava osi retourn dan bwa demen i pou bezwen esper fernwanr fer selman avek sa problemn lapo *well*, tanto plito, vi ki i ti deza granmaten. I ti annan en *feeling* ki larepons sa bann keksoz ki ti pe ariv li ti trouve dan sa bwa, me i ti pou annan kouraz pour al laba litousel?

Kantmenm i ti'n al dormi byen tar, i ti sote byen boner. I ti tann Tant Lina pe trafike dan lakwizin. Loder kafe so ti filtre ziska dan lasanm kot li, sa ti tant li pour li leve e al rod en pe.

Lina ti pe asize lo latab dan lakwizin pe bwar son kafe, avek en bout tost dan son lanmen ler Mark ti aparet, son figir pal, boufi avek sonmey. Son lazann ti zis de baton

lolipop dan son pti kannson sport. Son latet kler ti'n ralonzi, son lebra long e fen.

Son leker ti sere. Sa garson ki i ti'n gardyen deza wit an, ki i ti kontan kantmenm i ti realize ki i pa ti eksprim son lanmour tro byen. Larm ti vin dan son lizye. I ti per ki i ti pou perdi li; perdi li parey i ti perdi Emma.

Emma, son pti ser adore depi premye zour ki son manman ti rantre avek li sorti lopital. En pti ser ki lontan i ti a pe espere. Emma, parey en reyon soley, i ti egey tou dimoun ki i ti zwenn. I ti ranpli avek en lazwa de viv, ki ti fer ou sourir san rezon! Tre diferan avek li menm li, ki ti annan en karakter plito serye. Ti annan letan, ler Emma ti'n ganny laz pwente ki, ki i ti ekperyans en pti zalouzi kimannyer Emma ti fasilman atrakte bann garson e eklips li konpletman.

Me tou sa ti avan nesans Mark. Ou ti a krwar son lansentman ti'n fer li matir en sel kou an gran e avek matirite, Emma ti vin pli trankil, tro trankil. I pa ti sir si ti aktyelman matirite ki'n fer sa ouswa, parey i ti soupsonnen, ti plito lenfliyans Dominik. Antouka, Emma ti retire, i ti aret frekante, e ti annan menm en lepok kot dimoun ti pe fann rimer ki i ti fol. I ti koz tousel anler laba dan son bwa Mon Plezir.

I ti rapel pas kot Emma detrwa zour avan ki i ti disparet. I ti pe asize obor lavarang, pe get dan vid. I ti soke. Emma ti'n nepli Emma, i ti'n deperir. I ti'n perdi son zoli seve gri boukle, ki i ti'n koup kourt, alagarson, depi son laniverser 35 an, de mwan avan. Son latet ti'n kler! Son lizye, en kouler mov nwan en tre ki zot ti annan an komen ki ti normalman ranpli avek lavi, ti'n dan fon; son figir kler byen pal, tro pal. Sa rob ble pal ki ti lo li ti'n anval li parey en lavwal, degre ki i ti'n meg. I ti paret

ratresi. Lina ti al debout obor li vi ki i pa ti'n reponn son bonzour, ni vire pour get li. I ti poz son lanmen lo son zepol e demann li dousman,

“Emma, ou oke? Ou pa paret byen. Ou oule mon anmenm ou kot dokter?”

Emma ti sourir trankilman,

“Mon byen. Mon tre byen. Dokter pa pou kapab fer nanryen pour mwan.”

Lina ti kares son latet e pas lanmen lo son fron pour war si i pa ti ganny lafyev, me son fron ti fre, tro fre.

“Be, Emma ki i ariv ou?”

“Dominik in vin sers mwan. Mon pou ale.”

Son parol ti fer sote leker Lina.

“Emma, Dominik in mor depi lontan,” Lina ti sey dir li zantiman.

“Wi, no ... on, Mark pa pou kapab vini li. I ankore tro pti. Ou a vey li pour mwan? Promet ou a vey li pour mwan.” Emma ti atrap son lanmen e ser li for.

“Wi. Me ou pa pe al okenn par ou. Nou ava al kot dokter. I a sonny ou.” Lina ti dir li.

“Nou a vin sers li apre, ler i pli gran. Dominik i krwar ki i pou sanze apre, me i pa asire kan.” I ti kontinyen konmsi i pa ti'n tann parol Lina.

Lina ti sey konvenk Emma pour vin avek li, me Emma ti refize, ensistan ki i ti byen. Lina ki ti'n mont kot Emma sa zour pour vin dir li ki Mantant, Madanm Tonton Tiber, ti byen malad, ti bezwen ale. Me i ti dir dan li menm ki i a fer zot manman vin get en kou Emma. Malerezman Mantant ti mor sa zour menm e dan tou bann deroulman ki ti swiv, son lespri pa ti retourn lo Emma ziska kot simityer, kan i ti realize ki Emma pa ti'n vin lanterman. Son lanmen i ti bezwen al travay e dan milye lamatine, son manman ti telefonn li pour dir li ki Emma in disparet.

Lina ti is leker e son lizye ti swiv Mark kot i ti al ferm rido lafnet pour blok larder soley.

“Ou ankor pe ganny sa problemn?”

“Wi. Mon krwar mon ava sey al kot dokter. Mon pa kapab kasyet dan lakaz tou mon lavi.”

Lina ti get li avek en lekspresyon pansiv, ezitan,

“Mon pa krwar ou devret al kot dokter, i pa en problemn pour dokter sa. Ou manman osi ti pas dan sa bann problemn avan ... avan ...”

“Kwa? E ou pa dir mwan nanryen?”

“Mon pa asire si i annan okenn koneksyon. Selman ti annan en bann keksoz drol ki Emma ti pe pas ladan sa lepok, me ki i pa ti oule koz lo la. Mon a rakont ou sa ki mon rapel tanto.”

Lina ti leve e poz son lanmok vid dan sink.

“La, mon bezwen al travay.”

Aprè ki son tantin ti'n ale, Mark ti bwat en dezyenm tas kafe e manz de bout dipen. I ti kit son tas sal dan sink pour li al abiy li en pe pli byen. Answit, i ti fer son korve blok tou lalimyer soley ki ti antre dan lakaz e met vantilater onn dan tou lasanm. Finalman, i ti antre dan stor kot zot ti'n annas bann zafer personnel son manman.

I ti lev premye bwat kartron, met dan milye kot ti ankor annan en pe plas e plak li ater lanmenm pour li konmans fouye. Premye bwat ti ranpli avek en bann lenz blan anvlope dan tet- dorye; rob maryaz son manman, en rob pti baba, blan swa en rob nesans, swa en rob batenm. Ti annan en tapi labab avek brode dekoupe. Loder naftalin ti anvoye. Lapousyer ti fer li eterne. Mark ti referm sa bwat kartron e i ti al sers en lot.

Sa enn ti ranpli avek detrwa vye albonm portre, plizyer liv, en labib, plizyer lanvlop ranpli avek vye portre. I ti tir detrwa pour li gete. Dan en ta, ti annan li ankor pti baba, en lot ta, portre premyer konmiyon son manman, portre maryaz en dimoun ki i pa ti konnen, me i ti rekonnèt son manman, Tant Lina ek Tonton Gilber ankor pti pti. Dan fon bwat kartron, i ti dekouver en pti liv kouler gro ble avek nyaz ble pal ladan. Ti en dairy. I ti frot son lebra semiz lo son kouvertir pour swiy lapousyer. Lannen “1979” ti'n ganny ekri an kouler lor ki ti'n konmans dekoke. Ti annan en pti lok dore ki ti gard sa pti liv fermen, me i ti'n rouye e Mark ti kas li fasilman. Zis par anndan lapo, dan milye, i ti lir non son manman: Emma Zedeon, Mon Plezir.

## Sapit 11

“Ti annan en pe letan depi ki mon ti'n remarke ki mon mari pa ti mon mari...”

I ti lir sa premye ekstre dan dayri son manman, date le 12 Mars 1979. Avan sa ti annan zis de randevou dantis le 26 Zanvye ek le 7 Fevriye. Mark ti feyte larestan paz e i ti war ki dayri ti plen avek lekritir son manman, ptipti e byen prop. I pa ti lir plis, me leve kot i ti'n plak li ater e tap son fon “jeans” pour tir lapousyer. Mark ti al direk dan son lasanm, tonm vant anler lo son lili pour li konmans lir sa dayri.

Ti annan en pe letan depi ki mon ti'n remarke ki mon mari pa ti mon mari. Annefe en bon sis mwa, me mon ti ere, pli ere ki mon'n deza ete dan mon lavi, alor mon pa ti oule tro kestyonn mon lekor lo kwa ki ti fer mwan dir sa. Mon mari ti'n sanze, sanze konpletman. Mon oule dir, fizikman i ti ankor parey; sa gran zonn bon gabari ki mon ti'n marye avek. Souvann fwa, lo granmaten, mon ti admir son latet lo zorye obor mwan en lekspresyon dou lo son figir ki ti'n relaks dan son sonmey, parfwa en pti sourir lo son lalev. Son granpapa ti'n sorti rezyon kanton lasin e i ti'n erit son tre azyatik. Mon ti kares son seve nwanr pikan dousman e mon lanmour pour li ti ser mon lagorz e gonfle mon leker. Wi, fizikman Dominik ti ankor parey, menm sa lanvi lo son fes kote gos ti ankor la. Se son karakter ki ti'n sanze; pa zis son karakter, me osi son bann manni, son mannier fer.

Mon'n sey plas lepok egzakt ki Dominik ti konmans sanze e mon krwar ti Zilyet lannen pase. Mon rapel sa zour ki nou ti'n dispit nou ti dispit bokou sa letan epi i ti vire, i ti ale. Mon ti pe ekspekte li retourn tar, zis pour li vin dormi parey son labitid apre ki nou ti'n dispit, me

apenn dis minit pli tar i ti reaparet, ser mwan dan son lebra e demann mwan pour pardonn li. Son lalev ti so lo pour mwan e toudenkou en laflanm ti alimen antre nou. San tir son labous lo sa ki pour mwan, nou ti konmans kas lenz kanmarad depi anba lavarang menm e nou ti apenn ganny letan ariv lo lili pour satisfere sa pasyon ki ti'n flanbe. Nou ti fer lanmour konmsi ti napa demen; avek nou lekor, nou leker ek nou nanm...

Ler satire, nou ti flot ater, mon ti sourir e demann li an dyok kote i ti'n ganny sa nouvo teknik. I ti riye e ser mwan pli for,

“Ou zoli, zoli, plis ki zoli...” e i ti rekonmans anbras mwan lo mon lizeye, lo mon nenen, partou lo mon figir.

I ti desann pli ba, mon tete ... e nou ti rekonmans ankor.

Mark ti ferm dairy e pous li laba, konmsi kelken ki'n ganny pri avek son lanmen dan poban konfitir. I ti santi li anbarase. I ti pe lir panse e lavi prive son manman. I ti lev en kou, fer en ale vini dan lasanm, apre dayri ti tant li ankor ki son manman ti oule dir par 'son mari pa ti son mari'? Kimannyer i ti kapab ere si i pa ti son mari? Avek en pti regar misouk, i ti asiz obor lili e rebran dayri. I ti kontinyen:

Mon sipoze depi sa letan menm, enkonnyaman mon ti'n remarke ki i pa ti mon mari. Son fason anbrase ti diferan, son fason fer lanmour ti diferan, sa pasyon ki ti eksploze ant nou sak fwa ti diferan, sa tandres ki i ti montre mwan ti diferan.

Sa bann mwan ki ti sviv ti ranpli avek pasyon, en lanmour entans, san ekivalan, plis menm ki lepok ki nou ti pe pwente e preske viv dan pos kanmarad.

Me mon ti remark bann pti keksoz drol toudenkou i ti'n paret bliye kot serten keksoz i ete dan lakaz; kot nou met servyet lakwizin, dan ki tirwar nou met kwiyer ek fourset. Me keksoz ki ti vreman frap mwan pour premye fwa se zour Tonton Tiber ti pas en kou kot mwan.

Mark ti alonze e aranz li pli konfortab.

Ti en zour Sanmdi, mon ti pe lave deryer lakaz kan mon ti tann "bonzour msye, madanm." Vi ki mon ti konnen ki Dominik ti devan dan zarden pe netway dan fler, mon pa ti bouze me kontinyen dekras mon lenz. Mon ti tann Dominik reponn bonzour e demann sa dimoun ki i ti bezwen.

"Be ... Ki sa ou pa rekonnet mwan?"

Mon ti toudswit rekonnet lavwa Tonton Tiber, me kantmenm sa mon pa ti bouze. Mon ti aret bat sa pyes lenz ki ti dan mon lanmen lo ros pour mwan ekout zot konversasyon.

"Ki ou?" lavwa Dominik ti reflekte son konfizyon.

"Mwan. Tonton Tiber. Ou oule dir mwan mon'n telman sanze depi ki mon'n pas isi...Kan? ...detrwa mwan pase? Ase donn mwan don Dominik!

"Ar.. wi, wi. Byensir, Tonton Tiber." Dominik ti fer en pti riye kanmi.

Mon ti etonnen e konfize. Dominik ti pe sirman sikann Tonton Tiber. Kimannyer i kapab pa rekonnet Tonton

Tiber. Ti nou Tonton prefere. Tonton Tiber ti annan laganm aktyelman, i ti en pe bet bet, me i ti annan leker alamen. Depi premye fwa menm ki Dominik ti rankontre li, zot ti tonm dakor toudswit.

Ti avan nou marye. Nou ti al vizit li lo son laferm Valdendor en zour. Nou ti pas par dan bwa sorti Mon Plezir. Avan nou ti ariv kot son lakour, nou ti zwenn li dan semen. Mon ankor war li dan mon lizye. I ti pe anmas koko dan son senbou, son gran kouto dan son lanmen, son sak goni koko lo son ledò. Son figir ride avek leksperyans lavi, son seve ti'n fini blan. En zoli sourir ti alim son figir kan i ti war nou,

"Be si pa mon pti Emma!" I ti larg son sak koko ek son gran kouto ater e ouver son lebra gran pour anbras mwan.

Son loder transpirasyon zepise; taba, kannel ek gouyav mir ti pikot mon nennen.

"Konman sava ou manman mon piti? 'Ou dan lakour i byen?"

"Wi. Ton Tiber, mon'n anmenn mon pretan pour rankontre ou."

Mon ti bos Dominik, ki ti'n reste alekar, devan. Zot ti donn ponnyen-d-men, get kanmarad drwat dan lizye, pe evalye kanmarad dan sa fason zonm i annan tandans pour fer. Zot ti paret satisfè avek sa ki zot ti war akòz Ton Tiber ti donn Dominik en gro kalot lo son zepòl e sakouy son lanmen pli for.

"Alors ou oule marye avek mon pti Emma?" I ti get mwan avek lafyerte dan son lizye.



Mon ti bes mon lizye e fer en pti sourir anbarase.

“Be wi,” Dominik ti reponn dan en lavwa ferm, li osi i ti pe regard mwan avek lanmour dan son lizye.

Mon ti rouzi. Tonton Tiber ti riye, en riye ranpli avek lavi. Nou ti koz koz ankor en pe.

“Annou diriz dan lakour. Mantant i la. Mon ti pe anmas mon karo koko pour fer delwil.” I ti re-is son sak koko lo son ledò.

“Be Ton Tiber, akòz ou pa plis ou koko lanmenm?” Dominik ti montre lo en pike koko lanmenm obor parmi en ta labour koko.

“Be non mon piti, si mon a plise i a tro lour!”

Dominik ti reste konpletman kouyon en moman, apre mon ti remark sa lanvi riye ki ti pe tranble son lekor. Ti premye doz lozik Tonton Tiber ki i ti'n gannyen, mwan mon ti abitye avek sa. Tonton Tiber ti spesyal. Nou ti swiv deryer, Dominik larm ti pe koule lo son lazou degre i ti pe sey ser son riye. Mon ti get li gro lizye par kote, me mon osi mon ti pe ganny difikilte retenir mon riye!

Tonton Tiber ti larg sa romans “Lirondel est zoli..ye. Vole, vole mon ker.”

Nou ti nepli kapab, nou ti riye, riye ...

Mark ti sourir dan li menm ler i ti lir sa ekstre. I ti'n tann

nonm Ton Tiber enn ler Tant Lina ti dir en lekspresyon, apre azoute “konmdi Tonton Tiber” me i pa ti rapel li. I ti mor letan Mark ti ankor ptipti.

Mon ti avans devan pour akey Tonton Tiber e mon pa ti pas okenn komanter lo reaksyon Dominik. Mon ti pran en desizyon enkonnsyan Mon pa ti anvi konn ni lakòz, ni pourkwa mon pa ti anvi kas sa bon rapor ki nou ti'n etabli. Me ziska ki tan ou kapab ferm ou lizye kont laverite? Mon sipoze sanmenm sa ki'n fer mwan konmans ekriir dan sa pti liv ki Lina ti donn mwan pour nwel. En keksoz ki mon'n dekouver se ki mon kontan ekri. I ed mwan met mon bann panse an plas e sa i kalme mwan. Sirtou la ki mon ansent, mon trouv mwan avek bokou letan lo mon lanmen. Mon pas mon letan anba lavarang pe get lo Labe Lans Rwayal. Mon fer fer mon leyet, me tanzantan mon lespri i ale. Mon frot mon vant e sey mazine kimannyer mon pti baba pour ete. Ou a dir i a ganny lizye son papa? Lo granmanten mon'n santi li bouze. Mon ti lev Dominik obor mwan pour li ekoute. Mon pa kapab eksplik sa lazwa profon ki mon resanti kan lanmen Dominik lo mon vant e mon piti pe bouze par anndan. Nou tou lede nou anvi en pti garson, me pa fer nanryen si i en pti fiy, nou pou kontan li otan. Nou'n fini desid lo en non. Nou pou apel li Mark.

Toudenkou Mark ti lev latet, i ti'n tann en tapaz ... grensman sa pti-baro ki donn lo semen? I ti ekout ankor. Soufle melodi en sanson John Witz ti ranpli ler, enteronpe par en lavwa zonn ki ti kriy, “Msye, madanm”.

## Sapit 12

Ki sennla? I ti sot ater e avans kot lafnet. I ti dekal rido en pti gin pour get deor. Fakter, kare kare dan son kannson kourt gro ble ek son semiz ble pal ti dan zarden pe apros lavarang. I ti pe triy en bann let dan son lanmen, pe soufle. Mark ti bouz vit pour al ouver laport devan pour li. Fakter ti'n bese pour pous let anba laport ler Mark ti ouver laport an gran. I ti lev latet. En seri lekspresyon ti travers son figir; sirpriz, swivi par konfizyon pour ganny ranplase par lafreyer. Seve Fakter ti literalman drese, i ti larg en kriye e debouse avek en lekspresyon lorer telman komik ki Mark ti kas riye. Pov fakter! I'n ganny sok pour war li abiye latet ziska lipye dan sa letan so. Jeans, semiz gran lanmans, soset, bonnen, menm en mouswar anmare, stil cowboy, pour kasyet son figir, zis son lizye ki ti deor. Dwatet Fakter pa'n rekonnnet li.

Souriyen, Mark ti bese e ranmas sa lanvlop gri ek bill elektrik ki Fakter ti'n kit ater. Tou le de ti'n ganny adrese lo Tant Lina. I ti poz let lo latab lasal-a-manze, pran en kola dan *fridge*, debouse, avan ki i ti retourn dan son lasanm. I ti bwar en gorze limonnad, poz son boutey lo latab-de-nwi. I ti mazin ankor fakter, riy tousel, epi i ti avans en pti gin pour li war sa degizman lenz ki'n fer fakter per, dan laglas e i pa ti war nanryen. I ti is en lalenn efreye. En silans epe, opresan, ti akable son nanm; lanfer ti ouver en pti lizyer e larg en lafoumbal glase ki, parey en serpan, ti glise e anpay li. Son leker ti sere, son lipye ti mor. Son vant ti napa fon. Dousman, en son ti penetre.. tik tok, tik tok, revey lo latab-de-nwi.

*“Si le loup y etait, il vous mangerait; si le loup n'y est pas, il vous mangera pas”*

Sa pti sanson ki zot ti zve ronnn lontan ti monk li. I pa ti bezwen demande kot lelou ti ete, ni ki i ti pe fer. Lelou ti la, i ti dan son lasanm. I ti'n vin pour li. I ti tann son respirasyon kourt, santi son lalenn pi. Son lizye rouz ti'n fikse dan son kre ledor. Si i ti bouze, i ti pour lanse! TIK TOK, TIK TOK, TIK TOK, son revey ti amplifye. Lafoli ti pe tap lo laport son lespri. I ti donn son lespri lord pour fer son lipye avans pli pres avek laglas. Lespri ti obeir, me lipye ti refize. Avans pli pre, pa avans pli pre ti zis en detay, i ti war tre byen kot i ti ete... refleksyon tou lobze dan lasanm eksepte sa ki pour li!

Tranblan, i ti lev son lebra e retir son bonnen. Bonnen ti tonm lo lili e i ti reaparet. I ti delarg son mouswar e les li tonm ater. De le moman ki i ti large, mouswar ti reaparet e i ti flot ater dousman parey en fey mor dan divan.

Toudenkou, son lanmen ti pran en lavi pour li menm. Parey de pti kolibri, zot ti anvol isi, kas bouton son semiz dan lespas segonn, anvol laba, detas son kannson, bos anba. Son lipye ti degaze pour sorti ladan. Jeans ti aparet ater. Son ennderwer ti swiv.

Tik tok, tik tok, tik tok... letan ti akselere. Son aksyon ti lo *fast forward*. Apre i ti debout touni devan laglas i ti vremen envisib! I ti mazin film *L'Homme Invisible* lo televisyon SBC e i ti ot en pti riye. Sa pti riye ti vin en pti gele, ki ti vin en pli gro gele, ki ti aret en sel kou! I ti fors son lekor anba kontrol. Si i ti les son lekor ale, i pa ti pou nabou arete. I ti pran en gran respirasyon e larg li dousman. Son lalev ti fer en dernyen tranble. Laport lanfer ti refermen, lelou ti dekile, revey ti ralanti e rebran son ritm normal.

Eski i ti'n vin en nanm? Kekfwa i ti'n mor lo son lili e i pa

ti'n menm realize. I ti zet en regar lo lili pour konfirm sa, me non, ti napa okenn lekor mor lo lili. Enn de levennman osi ti tonm an plas. Zour ki Zan-Iv ek Danyel ti'n fer krwar zot pa'n war li. Kekfwa i ti'n vin envisib e ti vre ki zot pa ti'n war li! Lot zour osi kan Madanm Tanbi ti kriy nanm ler i ti antre dan son laboutik. I demann son lekor ki sa ki Madanm Tanbi ti war. I'n war keksoz pe bouze, i pa'n war personn? Ouswa i'n war li pal, preski transparan? I pa ti konnen, me sirman ti annan keksoz pour fer avek li vin envizib!

Akoz par ler i ti vin envisib? I'n ganny andoye? son vant ti vin labrez so, lelou ti lo son talon. Dousman! Dousman! Pran en gran respirasyon mmm pa mazin lo la. I ti sey fors son lespri dan en lot direksyon. Envizib! Menn, en bann keksoz i pou kapab fer prezan! Antre dan kabinen pti fiy, vol labank, travel dan bis san peye, posibilite ti enorm! Ou a dir dokter in fer leksperyans kelkonk lo li letan i ti ancor pti baba? Zwe avek son bann *genes*? Ou telman war lo televizyon konmela! I ti respir for ancor. Ase bet don! I ti reprimann son lekor. Sesel pa fer bann keksoz koumsa. I ava al fer per Zan-Iv. Sa lide ti fer li sourir. I ti tonm ancor lo son lili, me i ti tro eksite pour li kontinyen lir *dairy* son manman. I ti konmans fer tou sort kalite lespri, laplipar plito komik e banal. Be kimannyer ou ete letan ou envizib? I ti santi son lekor ti ancor la. I ti annan en pwa matla ti anfonse kot i ti pe alonze. I ti sot ancor ater e al ancor devan laglas. I ti ouver rido en pti gin, avek prekasyon, pour li ganny plis lalimyer e la, i ti realize ki soley ti nepli annan en lefe negativ lo li. I ti is rido gran ouver e ouver lafnet. I ti lev son lanmen e met devan son lizeye. Devir li par isi, vir lo kote, pour esey konpran kimannyer i ti ete. Premye kou, i pa ti war nanryen, me apre i ti

konmans remark en laform parey en delo kler ki bouze ler son lanmen ti bouze. I ti retourn devan laglas. I ti valse par isi, detourn son lekor par laba. Ankore depandan kot lonbraz lalimyer i tonbe ler i ti bouze, i ti kapab war en nespes silwet son lekor. I pa ti konpletman envisib. Ou ti a krwar i'n fer avek delo kler.

Mark ti tat tat son figir, tras laform son nennen, son labous, son lebra, son lestoman. Tou ti santi parey labitid drol! Son lanmen ti desann pli ba, kontour son vant listre, son trou lonbri pa ti la e... oops! Son manm enportan ti'n disparet. I ti plat parey en poupet ant son lazanm. *Oh shit!* Kennsel antre dan kabinen pti fiy!

I ti konmans eksperimant avek kwa ki i ti kapab fer letan i ti dan sa laform. I ti vir lakle dan laport larmwar napa problem. Anmas en kreyon lo latab, oke. Sa kreyon ti disparet. Tous latab, i pali en pti git kot i touse, me i pa ti disparet.

Ou a dir i ti pour kapab pas dan en miray? I ti avans kot miray obor laport e apiy li avek son lanmen, napa nanryen. Kekfwa fodre i vin avek plis lafors, i ti pran son ler e bat dan miray boom! I ti ganny zis en latet fermal kot son fron ti'n tape.

Mark ti retourn ancor en kou lo lili, atrap *dairy* son manman, sey ouver ancor, apre met laba. I ti lafen. I ti zet en koudey lo revey e realize ki midi ti'n sonnen, sanmenm i ti lafen. Kestyon: Eski i ti pou kapab manze dan sa laform? I ti pou ganny gou? Ouswa manze ti pou disparet avan ki i ariv kot son labous? Sa ti pou grav! I ti leve pour li al lakwizin. Letan i ti pe prepar en sandwich, i ti remark son refleksyon dan lekla kouto ki i ti pe servi. I ti'n reaparet! Dir granmersi, i ti a kapab *enjoy* son sandwich anpe!

Apenn ki i ti plak li lo sez e lev son sandwich pour li met dan son labous, ki Zan-Iv ti antre. Zan-Iv ti sezi.

“E ou la, Mark, gran pervert, ki ou pe fer touni gran lizour?” i ti demande.

Mark ti vin rouz. I ti'n fini bliye ki i ti touni!

“Er ... er ...” i ti begeye, “ou pa'n al lekol?” i ti sanz topik.

“Menn! Epi mon a koz avek ou, la mon annan en lanvi kaka. Pret mwan en pti kou kabinen, mon krwar ki mon'n manz keksoz ki'n deranz dan mon vant.”

I pa ti esper larepons Mark, me i ti pas an pasan pour li al dan twalet.

Mark ti leve li osi pour al met en lenz lo li. I ti eksite. I a rakont Zan-Iv ki i vin envisib, i pa ava rakonte? Zan-Iv ti pour krwar li? Tousala ti tro bokou pour li gard anndan, i ti pou bezwen rakonte. Apre ki i ti'n remet son jeans ek en triko, i ti asiz en moman lo lili pour esper Zan-Iv. I ti tann Zan-Iv *flush* kabinen, tann li lav son lanmen e en pti moman apre i ti antre dan lasanm.

“Ar ... mon santi mye prezan,” i ti pe frot son vant, “Mark?” I ti resorti e diriz ver lakwizin.

“Mark?” i ti kriy ankor.

Mark ti sourir. I ti get li dan laglas wi, i ti'n al ankor. Prezan i pa ti pou bezwen rakont Zan-Iv, i ti a montre li.

“Mon isi,” i ti kriye. Me i pa ti paret ki Zan-Iv ti'n tande. I ti tann li kot lakwizin, pe apel li.

I ti swiv Zan-Iv e sey ankor, “La, mon la.”

Me Zan-Iv pa ti tann li. I ti get dan lakwizin, pa war li, tourn lo son pa, konmans travers salon pour al get anba lavarang. I ti pas lanmenm la devan li.

“Mark, ki bor ou'n fer?” Zan-Iv ti kriy pli for.

Mark ti avans pres avek Zan-Iv e i ti kriy dan son zorey. Napa lefe. I ti annan en problemm. Zan-Iv pa ti pe tann li! I ti konsantre en kou, kekfwa i ti pe mal antreprann sa. I ti swiv son lensten e safwasi i pa ti sey koz avek son labous, me al tir sa parol depi dan son vant e prozekte li avek son lespri,

“Zan-Iv!” Son lavwa ti rezonnen konmsi i ti pe koz dan en mikro. Zan-Iv ti fer en sote!

“E ou la Mark, ou a donn mwan en latak leker!” I ti vire pour koz avek Mark an kwayan ki i ti zis deryer li, me i pa ti war personn.

“Be ... Kot ou ete?”

“Lanmenm la obor ou.”

En sourir malis lo son figir, Mark ti gete kot Zan-Iv ti dous pe rod li.

“Oli ou? Ase donn mwan grenn, zonn.” Konfizyon, en pti latras dout dan lavwa Zan-Iv.

Mark pa ti kapab reziste fer en pti dyok lo Zan-Iv.

“La, Zan-Iv” i ti soufle dan son zorey. I ti'n fini ganny foul kontrol lo son lavwa,

“Mon envizib!”

“Rakont mwan en lot! Ase menn, kot ou ete?” Zan-Iv ti pe konmans panik. I ti bes anba sofa pour gete si Mark pa ti pe kasyet deryer.

“Mark?” lafreyer ti evidan dan son lavwa.

“Mon la, devan ou. Vey sa.” I ti reponn e i ti tir son triko e larg ater. Triko ti reaparet devan lize Zan-Iv.

Zan-Iv ti vin blan.

“En, mon pa zwe bann fars koumsa, mwan” Son lavwa ti pe tranble. I ti pe rekil ver laport parey krab. Zan-Iv ti'n fini per!

Mark ti kas en riye laganm. En pti sourir konfize, ezitan, ti aparet lo figir Zan-Iv. I ti poz en kou, kot i ti'n graponn ponnyen laport pour li demare.

“Mark?”

“Wi, menn. Mon vreman envizib! Mon'n fek dekouver taler. Napa nanryen pour enkyet. Vini, vin gete.”

Zan-Iv ti larg laport e fer en pa ver son lavwa, fikse devan li, “Mon pa war ou menm.”

Mark ti atrap son lebra. Zan-Iv ti fer en kriye. Son seve ti drese,

“O *shit!* Mon krwar mon anvi kaka ankor!” e i ti vire pour li sorti.

Mark ti sakouy li en pti gin,

“Konsantre menn, ou war mon lanmen la? I zis devan ou figir. Veye, letan mon bouz li, ou pou war.”

I ti bouz son lanmen, vir li devan deryer, devan deryer.

“*Wow!*” Zan-Iv ti eksklanmen, “Ou sa?” Son lavwa konpletman emerveye. I ti anvoy son lanmen e atrap sa ki pour li.

“Ou fre,” Zan-Iv ti dir li, ankor ebete, “Konmsi delo sorti dan *fridge*. Kimannyer ou'n fer sa?”

“Mon pa'n fer nanryen mwan. Mon'n zis vin koumsa, koumsa menm! E mon pa krwar i premye fwa ki i arive.”

“Be ou war kler?” Zan-Iv ti kontinyen atrap li e i ti pe tat tat li partou.

“Wi. Parey avan.”

“Kimannyer ou santi ou? Ou pa per?”

Mark ti fer en riye gou, “La aprezan non, me taler ler mon ti dekouver, mon ti oule sek avek lafreyer. Mon pa konnen, i drol, me prezan, mon santi mwan alez. Konmsi.. konmsi i normal pour mwan koumsa.”

## Sapit 13

Zan-Iv ti annan en ta kestyon pour li, e Mark ti reponn kimannyer i kapab. I annan i pa ti ankor konn larepons li menm. I ti donn Zan-Iv tou detay tou sa ki'n ariv li. I annan i ti'n deza koz lo la avek Zan-Iv avan, me zot ti rediskite.

“Mark, be akoz tousala? Akoz ou vin koumsa? I bezwen annan en leksplikasyon!”

“Mon'n sey mazin lo la. Sel keksoz ki mon'n mazin se ki en dimoun in fer mwan malis ouswa, mon pa konnen mwan, dokter in fer kek eksperimantasyon lo mwan ler mon ti ankor pti baba!”

Ti annan en silans kot i ti pe sey pran kouraz pour li dir sa ki i ti vreman krwar, apre i ti azoute dan en pti lavwa,

“Ouswa en maladi irediter. Bomaten Tant Lina ti dir mwan ki seve mon manman osi ti'n grennen zis avan i ti disparet. Kekfwa i pa'n mor. Kekfwa i zis envizib.”

“Wi, me kote i'n ale?” Zan-Iv ti demann kestyon lozik, “Si ou nabou koz avek mwan, li osi i ti ava koz avek ou!”

Toudenkou Zan-Iv ti graponn son lebra,

“Mark ou pe reaparet! Mon Dye!” Zan-Iv ti frissonnen, son seve ti drese malgre li.

“Vin gete!” I ti trenn li dan lasanm-ben. I ti soka pour war sa tranzisyon. Son lenz ti aparet avan, san son lekor, apre, parey en zimaz ki ti pe ale vini, i aparet byen

pal, I disparet dousman, i aparet ankor pli for e disparet ankor ziska ki i ti revin byen solid.

“Sanmenm Fakter ti dir son lipye anmenn li si i ti'n war ou koumsa pe aparet disparet devan li!” Zan-Iv ti ekskklanmen.

Zan-Iv ti al plak li lo twalet. Mark ti apiy lanmenm avek miray. Ti annan en poz pandan ki zot ti dan mazinasyon. Apre Zan-Iv ti dir,

“Be, ou konnen ki mon ti vin fer aktyelman kot ou? Bomaten lo televizyon ti pe donn en dokimantasyon lo kominikasyon par konpiter. I'n fer mwan mazin lotrozour ler ou konpiter ti vin onn tousel. Dapre sa ekspert, ou kapab met en konpiter onn e kominik avek sa konpiter, si ou annan en kart modenm. Ou anvoy komann par difil telefonn ouswa *wireless*, swa par reyon enfrarouz ouswa transmision radyo.”

“Zan-Iv, ki ou pe rakont mwan?!” Mark ti demande, en pe enpasyan, “Ou konnen napa modenm dan mon konpiter!”

“Wi, me si i annan en dimoun pe servi ou konpiter, kekfwa zot in fer egzaktteman sa. Zot in met en modem ladan san ou konesans!”

I ti get Zan-Iv dan son blan lizye Kimannyer i pa'n mazin sa?

“En, ou pa tro kouyon ou!” avek en lekspresyon pansif lo son figir.

“I annan en tourn-a-vis dan tirwar lakwizin.” Mark ti azoute.

Zan-Iv ti al serse e zot ti al devis konpiter dan lasanm.

E wi, ti annan keksoz an plis dan konpiter. I pa ti parey en modenm standar ki ou ti kapab aste dan nenport laboutik konpiter anvil. I ti bokou pli pti. I ti ganny konnekte avek bord prensipal konpiter par en difil kler, plat e en lot difil ki ti al lo enn pti *gadget*, plake anba son biro.

“Dapre mwan sa en lantern,” Zan-Iv ti'n ariv lo menm konklizyon avek li, “Lala nou malfezan!”

Mark ti bousbe, “B ... Be kimannyer? Lekl?”

“La, mon zero, mon osi! Me selman mon a dir ou ki lekkipman koumsa zanmen mon'n war, mwan,” Zan-Iv ti replike.

“Ou oule mon dekonnekte?”

“Non,” I ti deside, “kekfwa sa dimoun i annan plis pour dir mwan!”

Zan-Iv ti revis lakok konpiter an plas. Toudenkou zot ti tann kriy Mark. Zot ti sezi e get kanmarad, zot lizye pe reflekte zot lenkyetid.

“Mark! Zan-Iv!”

I ti rekonnet lavwa Danyel.

“Danyel,” i ti dir avek Zan-Iv, soulaze.

“Nou isi!” I ti kriy for.

I ti atrap lebra Zan-Iv e dir li irzan, “Pa koz lo sa bann zafer. Mon pa oule i konnen.”

Zot ti diriz ver lavarang pour al rankontre Danyel.

“Mon ti doute ou isi,” Danyel ti dir avek Zan-Iv. La, zot ti konmans koz lekol, legzanmen, ki li, i ti'n manke.

“Yo, mon lafen. Mon pa ankor dezennen. Napa nanryen dan kastrol?” Danyel ti demann li,

“Mon ti krwar mon a ganny en keksoz an montan, me Tanbi in fini fermen letan mon monte,” i ti kontinyen.

“Non, mon pa'n kwi manze. Mon kapab fer en sandwich pour ou si oule,” I ti ofer.

“Anvoye menn, mon vant pe gronnyen!” Danyel ti frot son vant.

Zot ti al lakwizin pour al rod keksoz pour manze. Mark ti tir dipen, margarin ek fromaz dan refrizerater. I ti bos bwat pli anba kot zot met legim e retir de tomat. I ti tir trwa disef osi e dir avek Danyel met pwalon lo dife pour fer lonmnet. Sakenn ti atrap en bout e zot ti konmans prepar sandwich.

Toudenkou, Mark ti war Danyel ti ploy an de, fer en nespes sekous konmsi i ti pe ganny en kriz epilepsi. I ti ris bann gran gran lalenn avek difikilte konmsi i ti pe toufe. Son figir ti vin ble.

“Danyel!” Mark ti panike.

Zan-Iv ki ti pli pres avek Danyel ti donn li en kalot lo son ledò. Danyel ti is ankor en kou-d-lalenn, apre i ti graponn sa kouto byen fite, ki Tant Lina ti servi pour netway pwason, ki ti lanmenm la lo sink e vin lo Mark avek. I ti sey pwanyard li, me malgre sa latak inatandi, Mark ti reazir par lensten e say par kote. Ebete, i ti get Danyel, ki san en mo, ti atak li ankor, me erezman son bann mouvman pa ti tro byen kordinen e i ti zis bles li lo son lebra. Mark ti sey rekil vit par deryer, me i ti mank lepa e demi tonm asizan. Danyel ti vin lo li menm, son kouto leve, pare pour pwanyard li.

Dan en panik, Mark ti zet en regar enploran lo Zan-Iv pour fer keksoz vit. Zan-Iv ti get isi, get laba pour trouv en mwayen pour aret Danyel. I ti anmas en kalou pilon fer avek granit e tap Danyel deryer son latet. Danyel ti kolaps e larg kouto. Mark ti respire, soulaze. Apre i ti ganny prezans lespri pour ranmas sa kouto deswit. I ti leve e get Danyel avek mefyans.

Danyel ti pe tranble ater konmsi en dimoun ki ganny lakranp. Apre i ti leve, son figir tou ver e tay dan lasanm-ben. Mark ek Zan-Iv ti swiv li avek prekasyon. Zot ti tann li pe vom, vom. Apre i ti lav son figir e sorti deor pour get zot. Son regar ti tourmante, i ti paret pre pour gele. I ti ouver labous pour koze, me parol pa ti sorti. I ti zis tranble parey en fey dibwa, sakouy son latet e sorti an tayan. Zot ti swiv li deor e Zan-Iv ti sey kriy li, me ni vir deryer i pa ti vire.

Mark ek Zan-Iv ti reantre anndan e al sey netway blesir Mark dan lakwizin. Koupe pa ti dan fon. Zot ti lav avek detol, epi pans'avek koton ek plaster. Tou le de garson ti tre trouble par sa lensidan. Zot pa ti ganny en konpran.

Kimannyer Danyel i kapab vin la, donn zot lanmen fer sandwich, pe koze parey son labitid, apre zis sot lo Mark e atak li koumsa? Zot ti diskite, me ti zis ankor en mister pour azout avek tou bann lensidan ki ti'n arive oparavan. Zot ti koz ankor en moman, apre Zan-Iv ti dir Mark ki i pou bezwen ale. I ti'n promet son papa pour li netway dan son bannann.



## Sapit 14

Apré ki Zan-Iv ti'n ale, Mark ti fer en pti sonm. Ou ti a krwar, son kosmar labitid ti deryer son popyer, zis pe esper li ferm lizye.

Lalin bennyen dan disan, silwet son manman pe mars ver sa gro bebet. Son rob pe anvole dan divan. Li deryer. "Manmi, manmi ..."

I ti sote pe respir for e pas en lanmen tranblan dan son figir. Apré en moman, i ti anvoy lanmen e repran zournal son manman, ki i ti'n pous akote lanmenm. I ti vir lo paz ki i ti'n kraz en pti bout dan kwen pour mark kot i ti'n arive. I ti kontinyen:

Dominik osi zanmen i lwen dan mon panse. Son konportman i vin pli etranz. Par egzanz, i pa oule mon al konsilte. I ensiste ki i pa nesese. Kimannyer i pa nesese? Nou ti ava konnen si nou pti baba i byen. Manmi, ki en bon fanmsaz, i say avek li, i dir mwan ki fanm lontan pa ti al konsilte. Ti napa dokter, me sa pa ti anpes zot ganny zot piti an bonn sante e san problem. I dir mwan pa trakase i a get mwan ler mon letan i ava arive.

Mark ti vir paz.

Mon krwar sa i tro lo mon lespri, yer swar mon'n fer en drol rev. Mon reve ki mon lo latab lasal-a-manze, touni. Dokter pe egzamin mwan. Mon sey mat mon latet pour mwan get li, me mon pa war li. Mon santi zis son lanmen lo mwan. En lot Dokter ou en ners ti pe tenir mon latet en plas. Zot pe koze, me mon pa konpran ki zot pe dir. Mon oule konnen si mon pti baba i byen, me zot pa tann mwan. Sa ki etonn mwan se sa laterer ki mon'n resanti.

Mon'n debat pour zot larg mwan, me parey dan kosmar kordonnyen soule, pli ou debat, pli ou pa kapab fer nanryen. Apré mon krwar mon rev in pran en lot lapant, en keksoz pour fer avek Lina.

Larestan sa paz ti vid. Sa detrwa paz ki ti swiv ti ranpli avek bann desen pyero pti baba. Mark ti sot zot. Lot paz ti konmans avek en nouvo topik.

Yer swar, mon'n sote dan mon sonmey, mon'n vire pour may Dominik, me i pa ti la! Mon ti ekout for pour gete si mon tann li dan lasanmben, me lakaz ti trankil. Letan ti so sa dernyen tan. Ler dan lasanm ti lour, kantmenm nou ti kit louvers ouver, pa ti ede. Avek sa gro vant, mon pa ti trouv en pozisyon konfortab. Mon respirasyon ti kourt. Enn ler mon ti bezwen dormi touni. Mon ti bat isi, bat laba e souvannfwa, deranz Dominik dan son sonmey, me i pa ti zanmen mank pasyans avek mwan. Depi ki mon ti'n tonm ansent, i ti tret mwan avek en tandres ekstra. Mon ti telman ere, ki par moman mon ti per. Ti annan en lekla ekstra dan mon lizye e en sourir dou, an permanans, lo mon figir.

Fakter ki ti pas la yer ti dir mwan,

"Zot, be pa prezan ki ou vin en zoli pti keksoz!"

Mon ti riye reve li, i pa pou zanmen pas lo ros Dominik! Me pour retourn lo Dominik... i pa ti dan lakaz. Mon ti leve e al rod li dan lasanmben, dan lakwizin. Mon ti dekal rido salon pour get anba lavarang, i pa ti la nonpli. Kote Dominik ti'n ale? Mon ti sorti deor e al asiz dan fotey pour esper li. Mon ti esper li en bon pe letan ti bezwen apepre enn er-d-tan, mon pa'n get ler avan ki i ti pet dan kote lakaz ki vir lo lafore. I ti sezi pour wat mwan la pe esper li, me i ti aranz son figir deswit.

“Kot ou sorti?” mon ti demann li.

“I fer so, mon pa kapab dormi. Mon'n leve e al fer en pti marse. Lannwit i vreman zoli tanto, lesyel i kler, ou kapab war tou kwen liniver.”

Mon ti leve e avans dan zarden. Ti vre lesyel ti manifik e imans. I ti fer mwan santi ptipti, perdi dan sa liniver e san lenportans. Dominik ti vin par deryer mwan e ser mwan dan son lebra,

“Me ou, ou pli zoli ankor,” i ti kontinyen.

Mon ti sourir. Mon ti debout koumsa en moman, berse dan lebra Dominik, berse dan dra saten lannwit.

Pa tro lontan apre, kouler lannwit ti sanze, zetwal ti tennyen enn par enn, lorizon ti vin en pti mov tann. Apre, premye reyon soley ti penn lesyel dore. Lannwit ti tay deryer montanny, me i ti kit en latras fre e angli lo mon leker; en latras dout e en presantiman maler.

Lisifer ti'n met en premye lipye devan mon laport.

Pli tar dan lazournen, Lina ti monte pour vin war mwan. Me sa ti zis en leskiz, i ti vin gete si mon konnen. Apenn si i ti'n demann apre mon lasante, ki i ti lans dan son zistwar.

“Mon ti zwenn Andre yer, ou konn li Andre? Garson Madann Telermon ki reste obor legliz. I travay kot Kostenn avek Dominik. I ti pe demann mwan nouvel Dominik Dominik in kit travay kot Kostenn?” I ti kestyonnen dan menn lalenn.

Mon leker ti sere.

“Er ... Non.”

Mon ti demann mon lekor ki direksyon sa zistwar ti pe pran.

“Be Andre i dir mwan ki i annan plizyer mwan ki i'n kite. I ti pe demann mwan kot i travay konmela.”

“Kwa? Dominik in kit travay? Ase bet don. Avek kwa nou ti pou viv?”

Mon ti denye sa ki Lina ti pe dir mwan, me mon leker ti lour en sel kou. Ou a dir Dominik in lalang avek mwan? Me tou le bomaten i ti sanze i ti ale e i ti retourn dan pti senk er diswar. Non, i pa ti posib. Sa dwatet en kankan ki Lina ti pe konmanse par lazalouzi. Mon ti tre byen avek mon mari e li i ti napa en zonm, malgre ki i ti pli vye ki mwan. Me apre mon ti onte. Lina pa ti pou envant en zistwar koumsa zis pour bles mwan i ti tro kontan mwan.

Lisifer ti ferm laport deryer li.

Mon pa ti kestyonn Dominik lo sa zafer kit travay toudswit, mon ti ankor pe mazin lo la, e pe sey konvenk mon lekor ki i pa ti vre. Mon ti devret annan konfyans dan Dominik. I pa ti pou koz lalang avek mwan. Me, en pti lavwa ti tourmant mwan, i'n fer li plizyer fwa dan lepase, kantmenm resaman i ti'n sanz son latitid konpletman. Epi, kot i ti'n ale yer swar?

Mark osi ti aret en moman pour li mazin lo la. Son papa ti pe tronp son manman? I ti vir paz.

Dominik i kontinyen kit mwan aswar e retourn lo granmaten. Mon leker i lour. . . lour. Mon sourir in anvole dan divan. Plizyer fwa in lo bout mon lalang pour mwan demann li kot i ale, me mon per son larepons. Mon pa anvi tann li koz manti avek mwan. I pou tro fermal, mon plifere reste dan dout. Kekfwa, i annan en leksplikasyon parfetman inosan. Kekfwa vre i pa kapab dormi aswar e i al promnen. Me mon realize osi ki la, ki mon'n nepli kapab satisfere son bezwen seksyel dwatet i al rod soulazman kot en lot. Mon sey dir mon lekor ki i pa enportan. Letan mon a fini ganny piti, i ava arete, akoz i kler ki i ankor kontan mwan en kantite. Me sa pa ti anpes mon larm verse:

Lekritir lo sa paz ti'n pali par plas. Ti aparant ki son manman ti'n plere ler i ti pe ekri sa. Larm ti'n tonm lo la.

Dominik, osi in remark mon sagren, in demann mwan detrwa fwa ki mon gannye, me mon'n ser mon ledan e zis sakouy mon latet. Par ler osi mon ganny lenpresyon ki li osi i annan keksoz pe fatig li, ki i anvi dir mwan, me a sak fwa, i sanz son lide e i koz lo lot topik. Lo nou pti latab manze ariv ler dinen ti nepli salere. Latmosfer ti fre, lesanz parol ti bref, zis pour leneser.

Lisifer ti'n plak li atab, en gro sourir lo son figir. Pli tar i ti pou fer li konfortab ant mwan ek Dominik lo lili.

## Sapit 15

Mark ti tann en tapaz deor e avan menm ki i ti'n ariv kot lafnet pour li gete, i ti rekonnèt lepa Tant Lina anba lavarang. *Shit!* Ti pli tar ki i ti krwar. Tant Lina ti'n fini arive sorti travay e li i ti ankor pe fil li lanmenm lo lili. I ti poz *dairy* lo son zorye, e sorti pour li al get Tant Lina. Tant Lina osi ti'n fini antre anndan, pe kriy li,

“Mark, Mark, ou la?”

“Wi, Tant Lina, mon la.”

Zot ti rankontre dan koridor.

“Kimannye ou ete?”

“Pa mal. Aktyelman, mon krwar mon lapo in aret brile. Mon'n kit lafnet ouver apremidi antye, pa'n fer mwan nanryen.”

“Tre byen.”

Zot ti diriz ver lakwizin pour al fer dite. Mark ti rakont son tantin ki i ti'n trouv zournal son manman dan bwat kartron dan stor e ki ti annan en bann keksoz enteresan ladan.

“Wi. Mon rapel sa zournal. Mwan ki ti donn li en zour nwel. I ti kontan ekri ladan. Mon pa rapel trouv li ankor apre sa. Ou dir ti parmi son bann zafer?”

“Wi.”

Zot ti koz koze, me zot pa ti abord topik ki ti lo lespri zot

tou le de. Nek aswar apre dinen ki Tant Lina ti relev son konvèrsasyon ki i ti'n konmanse sa bomaten. Tant Lina ti rakont Mark kimanyer fason fer Emma ti'n sanze zis avan son disparisyon. I ti rakont zot. dernyen konvèrsasyon.

“I ti'n meg, pal, e li osi son seve ti'n grennen.”

“Ou krwar en maladi ki mon'n erite? I ti al kot Dokter?”  
Mark ti kestyonnen.

Mark ti sey mazin son manman sa lepok, me i pa ti kapab. Son lespri pa ti form limaz son manman. I ti annan detrwa memwar li letan i ti ankor pli pti ankor, me pa zis avan ki i ti disparèt. Pourtan i ti rapel sa bomaten tre byen.

“Non, i pa ti al kot Dokter. Omyen mon krwar pa, e apre ki mon'n reflesir lo la tou sa lannen, mon pa krwar ki i ti malad nonpli. Ti annan en keksoz pour fer avek Dominik. Mon rapel byen letan ki Dominik ti pe fer lakot Emma. I ti sarman, napa fason ki ou pa ti pour tonm dakor avek li. Nou ti byen. Me apre en serten tan, fransman mon pa ti kapab toler li. Mon ti malalez avek li. Mon pa kapab eksplik ou, i ti fer mwan mazin en lezar gri dan en koksis, de gro lizye ki pe get mwan dan en trou nwanr.”

Tant Lina ti fer en pti sinye regrè avek Mark pour son parol inapropo, e depese pour kontinyen,

“Me i ti kontan Emma,” - en silans - “zis, mon krwar, i ti tro met kontrol lo li. Emma pa ti kapab fer nanryen san son permisyon e mon ti toultan per ki i ti pou arive si en zour Emma ti deside dezobeir li. Mon ti evite pas kot Emma sirtou kan mon ti konnen ki i ti pou kot lakour. Mon regrèt sa enfiniman, kekfwa si mon ti'n pas pli

souvan, Emma ti a'n konfyè mwan sa ki ti lo son leker. Kekfwa i pa ti ava'n di ... Disparèt.”

Lavwa Tant Lina ti tranble avek lemosyon e larm ti marse dan son lizye.

“Mon Papa? Ou mazinen ki ti arive avek li egzakteman? Mon'n toultan ganny dir ki i ti perdi lo lanmer.”

“Apre ki i ti'n kit travay Kostenn, i ti al al enn de pti zournen lapès avek pti Pyer. Al lev kazye. Aparaman, en swar i ti'n deside al lapès bekin. I ti pret bato pti Pyer san son permisyon e i pa ti retournen. Emma ti ariv dan lakour sa zour bomaten nennen ouver. I ti rakont nou ki Dominik ti'n al lapès aswar e i pa ti'n retournen. Ou ti annan dan ou pti senk an, mon sipoze. Nou ti al deklar li perdi avek lapolis. Bann peser dan kanton ti al rod li, me ni van, ni nouvel. Bato pti Pyer ti ganny ranmase, vid, andeor Tokos. Emma ti vremen aflize.

Tant Lina ti aret koze, son regar fikse dan lepase. Mark ti kalkile si i a rakont li sa ki ti'n ariv li, me apre i ti deside ki sa ti pou zis fatig son tantin plis. Letan ti evidan ki ti napa nanryen pour azoute ankor, omyen nanryen ki zot ti pare pour azoute, Mark ti leve e al dan salon. I ti met televizyon onn e asize pour ekout nouvel, me ti napa nanryen dan nouvel ki ti pli etranz ou pli trazik ki son prop lavi. Son lespri ti ale. I ti sey pyeste ansanm tou sa ki i ti'n aprann, me ti mank tro bokou bout. I ti al dan lasanm pour li kontinyen lir *dairy*:

I annan plis ki de semenn mon pa atrap mon pti liv pour ekrir. Tro bokou keksoz pe trouble mwan. Mon lavi in devir anba lao e pour bann rezon konpletman inatandi. Mon'n tonm dan en kosmar, mon nepli konnen kot mon pour vire. Mon lespri i sey asimil sa ki mon'n war, sa ki

Dominik in dir mwan, me i tro enkrwayab, mon lespri i refize aksepté. Mon pou fol! Me les mwan konmans depi konmansman.

De semenn pase, pour premye fwa, zis konman Dominik ti leve obor mwan pour li ale, mon ti tann li. Mon lensten ti dir mwan bosplat. Mon pa ti ouver mon lizye. Mon ti tann li pas son kannson, met son triko. Mon ti tann laport lasanm kot i fermen, klik, deryer li. En laraz ti mont dan mon latet. Dominik i kapab pran mwan pour pli kouyon ki li? Mon pa ti rezonn pli lwen. Mon ti sot ater, ras mon dezabiye, anverg lo mwan, bour mon lipye dan mon savat e graponn sa tors ki nou ti toultan kit lo latab-de-nwi. Mon ti swiv li. Mon ti tann li pe ouver laport devan, mon ti kal dan lakwizin. En pti moman apre mon ti war son silwet kot pe diriz dan bwa. Mon ti detak laport lakwizin e mon ti pran deryer li. Sa swar mon ti pou konnen kot Dominik i ale. I ti swiv sa pti santye ki mont dan bwa e mon ti ekspekte li koup atraver, atraver pour li retourn lo grannrout, me non, i ti kontinyen mont an montan menm. I ti pe mars vit, mon ti ganny difikilte pour swiv. Mon ti tap mon lipye dan rasin dibwa e mank en las depik pour mwan plannen ater. Mon dezabiye ti pri en kou dan brans dibwa, me mon ti persiste. Mon pa ti fye alim mon tors, mon ti per ki si Dominik ti vir deryer, i ti pou war mwan. Me li i ti pe marse, alez, konmsi sat dan fernwan!

Kot Dominik ti pe ale? Pli ale mon ti vin pli bafwe. Ti napa lakaz dan sa direksyon. Ki sa i'n dir fanm esper li dan bwa? Pour pronmnen, i pa ti pe pronmnen li, son lepa ti tro vit, avek en bi definiif. Nou pa ti ariv lwen. I ti pet dan en kleryer kot en gro ros. La, i ti get isi, get laba mon ti madre atan deryer pye dibwa epi i ti antre anba sa ros e

alonz ater! Mon ti reste kouyon. Ki i ti pe fer? Mon ti kal lanmenm e kontinyen get son demaraz. Me letan ti pase e i pa ti bouz ankor. I ti'n ganny sonmey? Fanm ti pou vin zwenn li la? En bon demi er-d-tan ti pase, person pa ti vini e Dominik ti ankor imobil ater. Mon ti konmans enkyet. Mon leren ti'n dou, mon lipye ti'n angourdi. Mon osi mon ti'n sren an krwayau ki nenport moman en fanm ti pou aparet, me dousman mon ti konmans konpran ki mon ti'n atrap seval par lake ti napa okenn fanm. En pti lafreyer ti tous mon leker. Mon ti apros Dominik avek prekasyon.

“Dominik, Dominik,” Mon ti kriy li dousman.

Me i pa ti reponn. Mon ti kler tors lo li, laraz ki ti'n anmenn mwan ziska la, fini oublie. I ti'n vir par kote. Mon ti tous li dan son kre ledò avek mon lipye. I pa ti bouze menm. Mon leker dan mon lagorz, mon ti tonm azenou obor li. Mon ti graponn son lebra e devir li.

Dominik ti'n mor!

Dan laklerte tors mon ti war son figir dekonpoze, kouler lanmor. Son labous, son lizye gran ouver, me san lavi. Mon piti ti fer en devire dan mon vant, en douler ti pran mwan. Si zis sa lavwa dan mon latet ti kapab aret kriye, mon ti a kapab rezonn en kou. Mon ti pas lanmen dan son figir; i ti fre. . . fre. Mon ti lev son latet e poz li lo mon lazanm. Mon ti kares son seve. Mon douler vant ti for, mon piti ti tap mwan par isi, tap mwan par laba. Ou a krwar ki soudan i ti'n war lespas mon matris tro pti pour li e i ti pe desire pour li sorti. Ar wi Mon Dye, ed mwan! Sa ki dir douler sagrinasyon ou santi avek ou leker i fo, vre sagrinasyon ou santi dan ou vant! En lasid bwiyen ki ti fer fonn ou trip. Mon ti bers mon mari, mon ti bers mon piti, larm pe

devide lo mon figir. Mon pa konnen konbyen letan apre - mon ti'n perdi konsep letan mon ti santi en lanmen pe kares mon figir, pe swiy mon larm. Mon ti arive konsantre ase pour konpran ki Dominik ti'n leve. I ti pe get mwan avek latandres labitid kekfwawa plis ki labitid dan son lizye!

Mon leker ti anvole. Mon ti retrouv mon lavwa e konmans gel for. Dominik ti mat asize e ser mwan dan son lebra a son tour.

“Do ... Dominik. Ou ti'n mor.”

“Non Ker, mon pa'n mor mwan.”

En laraz, melanze avek soulazman ti touf mwan. Mon ti pous li laba e konmans ansonm li. Mon ti ansonm li gran gran kalot dan son figir, lo son lebra, partou kot mon ti gannye. I ti bar bar son figir e sey graponn mon lanmen pour anpes mwan tap li.

“Pa zanmen fer sa ankor!” mon ti kriy avek li, apre ser li dan mon lebra.

Apre ki mon ti'n reisi kalme mwan, Dominik ti atrap mon lanmen e nou ti diriz dan lakour. Lizour ti pe fer. Avek sak lepa ki nou ti fer, lazwa retrouv Dominik vivan ti sed laplas a konfizyon ek kekyon. Dominik ti'n mor. Mon ti'n atrap li sepa konbyen letan dan mon lebra, sirman, mon pa'n tronpe! Alors ki mannye la i ti vivan?

“Dominik,” Mon ti demann li en pe ezitan, “Ki'n arive egzaktman avek ou laba ater?”

Dominik ti aret en kou e get mwan. “Mon a rakont ou letan nou ariv dan lakour. Depi lontan mon ti devret dir,

ou, me mon'n napa kouraz. E la, nou pti baba pres pour ne. Ou pou bezwen konnen tou fason. Mon zis priye ki ou a kontinyen kontan mwan kantmenm.”

“Byensir, mon pou kontinyen kontan ou.”

“*Sb ... Sb ...*,” I ti poz son ledwa lo mon labous, “Ou pa konnen kwa. Mon'n fer en keksoz terib, terib, zis par lanmour pour ou.”

Dominik ti pe fer mwan per. Kwa ki i ti'n kapab fer ki ti si terib? I pa ti dir plis, me reatrap mon lanmen pour kondir mwan dan lakour.

## Sapit 16

Mark ti ferm sa zournal en kou. I ti respir for. I ti zet en koudey lo revey. Ti dis er dis. Ti'n ariv ler pour li al dan bwa. Anmenmtan ti en fason prolonz lir sa ki son manman ti'n sirman devwale dan bann paz ki swiv. I ti anv konnen, me i ti per, per. I pa ti konnen lekel ki ti pli for, son lanvi konn laverite oubyen son lafreyer. I ti sot ater e avans kot lafnet, safwasi kot lafnet ki vir dan bwa. I ti get laba. Dan laklerte zetwal ou ti war zis silwet bann pye dibwa. I ti frisonnen. Ki sekre sa lafore ti pe kasyet?

Mark ti sorti deor. I ti pran son kouraz dan son lanmen, alim son tors e i ti mont dan bwa. Son leker pe bat dan son vant, i ti konsantre zis lo santye ki i ti lo la. I pa ti get ni a drwat, ni a gos, me i ti konsyan bann gran pye dibwa, pe debout silansye konman temwen son pelerinaz. I ti santi loder later mouye ek fey pouri. I ti tann glisman zensek anba lapay, lezel en sovsouri kot i anvole sorti dan en pye dibwa. Pa ti pran li lontan pour ariv kot sa kleryer kot zot ti'n zwe zis son lavey, malgre ou ti a krwar ki en bann letan ti'n pase depi sa swar.

I ti tenny son tors e asiz anba gro ros, imobil. I ti sey konsantre lo sa memwar. Premye kou, i ti tann zis batman son leker ki ti rezonn dan son latet ek kriye grele ki ti fer son zorey soufle. Apre, dousman, i ti konmans tann kou-d-lapel; en kou-d-lapel, later lo platik, en gele. Lalimyer en lalanp bobes. Silwet son manman kot i lev lapel anler, plonz dan later e vid later dan trou, lo plastik, enteronpi par en mouse, en gele. Son manman ti pe anter en keksoz, keksoz ou kelken? Kisisa ki ti dan plastik?

I ti konnen kisisa ki ti dan plastik, me zis sa panse ti brouy son vant, fer li transpir fre. Son lespri ti oule rezet sa memwar, me i ti fors son lekor mazin. En swar ...

*I ti ouver son lizye an gran. Lalin ti kler dan lasanm. En tapaz ti'n fer li sote dan son sonmey. Son labous ti sek. I ti anv delo.*

*"Manman, manman, mon swaf" me personn pa ti tann li.*

*I ti leve pour al rod son manman. Dan koridor i ti tann bann mirmire dan lakwizin. Son pti leker pe anvole, lo bout lipye, i ti pous laport ouver en pti lizyer. Dan laklerte lalanp son manman ti'n azenou ater pe zigot plastik par plas avek lakord. En lanmen blan avek en tatou serpan lo la, ti sape e tonm ater; en lanmen ki ti'n kares son latet en milyon fwa, en lanmen ki i ti konn tre byen. Son manman ti rebour lanmen dan plastik e anmare.*

Wi, i ti konnen ki annan dan plastik - son Papa!

Mark ti tranble. I ti ganny lanvi degobiye. Son manman ti'n anter son Papa laba, anba sa pye kalisdipap. Kimannyer i t'in transport son Papa ziska la, i pa ti rapel klerman. I ti'n swiv li dan bwa san ki i ti apersevwat. Mark ti larg en gran lalenn. Son Papa pa ti'n okenn noye. I pa ti konnen kwa ki'n fer son manman fer sa, sirman i ti annan en bon rezon. I ti pran en desizyon, i pa ti pou koz lo la avek personn!

En tapaz lo son gos ti kas son konsantrasyon. Son latet ti pivot an gran dan sa direksyon. Son en brans dibwa sek ki'n krake anba lipye. Son leker ti konmans bat for. Son swa ti drese. I ti pa ti tir son lizye dan direksyon ki i ti'n tann tapaz e i ti konmans rekil ver santye, dousman. I ti'n vire pour li retras son semen kan i ti tann kriy li. I ti arete.

“Mark, Dadi sa, esper mwan. Maaa .. rk, ou tann mwan?”

Wi, i ti tann li. Me i ti osi konnen fek konnen annefe ki i ti'n mor, antere laba anba pye dibwa. Son seve ti drese. Dan kwen son lizye, i ti war en lonbraz, en mouvman ant bann pye dibwa. I ti dir son lipye anmenn li!

“Mark! Espere!” me lavwa ti'n fini vin zis en leko dan lwen!

Mark ti ariv dan zarden, pe touse, or lalenn, pe ploy son vant. Bar ti'n apiy dan son kote e apenn si i ti kapab respire. I ti aret taye, me i ti depese pour li antre par laport deryer. Me laport ti take e i ti napa lakle *Oh shit!* Son tantin ti'n ferm laport deryer li. I ti fer letour devan pour war si par sans ti napa louvers salon ki ti ouver. Me avan ki i ti ariv anba lavarang, i ti remark zwe lalimyer lwen lo lanmer. I ti arete pour li obzerv lafason ki zot ti balye losean rouz epi ver, zonn, ble, me kouler pli dominan ti rouz. Mark ti tro epwize pour li tard lontan deor. I ti tir de louvers e glis anndan. I ti tonm dan son plas, ferm son lizye e tonm dan en sonmey profon, san rev. Nek lannmen ki i ti atrap *dairy* son manman ankor.

Arivan dan lakour, mon ti met boulwar lo dife pour fer en tas dite. Apre sa sok ki mon ti'n gannyen, ti'n demann mwan enn. Apre nou ti al asiz obor kanmarad anba lavarang pour bwar. Apre enn de gorze, mon ti get Dominik avek en regar ekspektan. Mon ti pe esper li donn mwan en leksplikasyon. I ti grat son lagorz, e paret pe esey rod mo pour li konmanse. I ti anvoy lanmen e atrap sa ki pour mwan pour ganny kouraz.

“Mon pa.. mon pa Dominik,” i ti konmanse, “Mon apel

Malabek.”

Mark ti is lalenn. Trwa pti mo. Trwa pti mo i kapab aras ou, ou idantite. Napa nanyen ki ti reel dan son lavi. Tou ti en fars, en fars kriyel ki desten ti pe zwe lo li. I ti nepli Mark Zedeon, piti Emma ek Dominik Zedeon. I ti en fenomenn, en lenkoni! “Malabek..” i ti soufle dousman. Sa non ti roul lo son lalang, etranz, misterye.

Mon ti santi disan kit mon figir en sel kou. Mon lanmen ti ploy koudpwen dan sa ki pour Do., sa ki pour Li.

“B ... be kimannyer?”

“Mon pa sorti isi. Mon pa menm ras avek ou.”

La, i ti konmans rakont mwan ki i sorti en planet ki apel Nizou, sepa Nidou. I ti eksplik mwan kote me mon pa ti ni menm tande! Mon ti per ... per. Mon ti sey tir mon lanmen dan sa ki pour li diskretman, me i ti atrap mwan for e frot mon lanmen anmenmtan ki i ti pe koze. Mon lanmen ti'n glase. Dan mon lespri ti annan zis en keksoz,

“Ar wi, mon Dye, mon Dye... zis les mwan sorti la vivan. Pa les li touy mwan.”

Ler i ti remarke ki mon pa ti pe ni menm ekout li, ki laterer ti'n paraliz mwan, i ti aret koze. Zantiyman, i ti atrap mon figir dan son de lanmen e regard mwan dan mon lizye. Mon regar pa ti oule krwaz avek sa ki pour li. Mon lizye ti say par kote.

“Emma, Emma. Pa per mwan. Mon ankor parey. Mon pa pou zanmen fer ou ditor.”



Do ... Dominik, ki ou'n fer avek Dominik?"

Son figir ti asonmbri. "Mon ti bezwen son lekor. Mon'n bezwen touy li."

Mon lizye ti vin bel, mon lalenn ti kourt, mon leker ti pe defons mon pwatrin.

"Tou fason, i ti pe fer ou malarez. Mon pa ti kapab les li kontinyen fer ou malarez. Ou pa bezwen li ankor."

"Wi, me i ti mon mari!" mon ti anvi kriye, "mon ti kontan li!" me zis en pti gele terifye ki ti sorti.

"Emma, Emma, get mwan!" i ti ensiste. I ti tyonbo mon figir for e anpes mwan vir laba. Mon ti oblize tenir son regar entans. Dousman mon leker ti large, mon ti relaks. Son regar ti adousi e mon ti rapel ki i ti kontan mwan, ki nou ti kontan kanmarad. Keksoz ti pou oke. Apre en moman i ti larg mon figir e konmans kares mon seve. Ti annan en moman silans, apre i ti repran,

"Mon pa ti ekspekte ki nou ti pou kapab fer en piti ansanm, vi ki i annan serten diferans dan nou anatomi. Ou kapab imazin mon sirpriz ler ou ti dir mwan ki ou ansent."

Mon ti fini konnen kot i a pe vini, e mon leker ti ser ankor, mon vant ti brouye. Mon piti! Sa pti innosan ki ti dan mon vant. O mon Dye!

"Fransman, la, mon pa ni konnen kimannyer i pou ete;

parey ou ouswa parey mwan." Dominik ti kontinyen.

"Ki ... Ki mannyer ou ete letan ou pa.. ou pa dan lekor Dominik?" parol ti sorti avek difikilte dan mon labous.

Limaz son laform letan i ti envisib ti *flash* dan lespri Mark. Wi, i ti deza konnen kimannyer son Papa ti ete. Omwen la, i ti'n ganny en leksplikasyon pour sa.

"Mon krwar i bon nou antre anndan si oule mon montre ou."

Nou ti antre anndan. Do.. I ti asiz lo sofa mon ankor annan difikilte pour apel li Malabek enn pti moman apre mon ti war lekor Dominik ploye, me mon pa ti war Li. Mon leker ti pe bat dan mon lagorz. Tou sa bann leksitasyon pa ti bon pour mon piti. Souden, mon ti tann Li dan mon zorey,

"Mon la."

Mon ti vire e get kot lavwa ti sorti, me ti napa nanryen.

"Konsantre," i ti dir mwan, "mon lekor i fer avek 90% ammonia dan laform likid. I pa fasil pour ou war. La! Vey letan mon vire."

Vre, mon ti reisi apersevwar li. En laform plizoumwen imen, me konmsi in fer avek delo. Mon ti reste bousbe! I ti tous mwan, mon ti fer en sote! Son lanmen ti fre, vreman fre. Apre i ti reantre dan lekor Dominik. Mon ti vir laba. Mon ti war sa prosesis antre e sorti dan Dominik, konmsi i ti pe anverg dan en kostim, degoutan. I ti eksplik mwan ki i respir enn lot gaz ki nou, gaz ki annan plis dan ler. Mon pa tro konnen sa bann keksoz koumsa. Konmsi nitrozenn. Mon ti demann li akoz i'n vin lo later, i dir mwan ki zot ti'n vin zis eksplor lespas dan sa rezyon e dapre zot bann

kalkilasyon, zot ti'n mazine ki Later ti devret en landrwa kot zot ti kapab respire e viv tre byen. Pa ki ti zot lentansyon vin viv isi.

“Anplis nou'n dekouver sa zerb delo sale ki zot apel gomon. I tre nitritiv pour nou,” i ti kontinyen

“Akoz ou dir nou? I annan plis parey ou ki'n vin avek ou?” mon ti demann li.

“Wi. I annan senk nou, enkli mwan.”

“Oli zot? Zot osi zot in pran lekor en dimoun parey ou?” Mon pa ti kapab anpes mon lekor frisonnen.

“Non. Parey mon'n dir ou. I pa nou lentansyon fer zot okenn ditor. Nou pe zis anmas enn de lenformasyon syantifik. Mwan, mon'n fer sa aköz ou. Mon'n kontan ou depi premye moman ki mon'n war ou! Ti sel fason pour mwan apros ou.”

“Lezot i lo nou navet spasyal,” i ti kontinyen, “Nou'n koul li zis andeor labe Lans Rwayal. I annan en defonsman dan fon lanmer. Ti zis bon pour nou kasyet la. I fre. I annan dekwa gomon. Laba menm ki mon ale dan aswar, dan lizour osi. Mon al donn lanmen mon bann koleg fer resers.”

I ti avoue osi ki i pa ti al travay letan i ti kit kot mwan dan bomaten, i ti kit lekor Dominik dan bwa, desann borlanmer e naze ziska kot zot laboratwar soumaren.

Aparaman, i ti kapab retenir son lalenn anba delo bokou pli lontan ki nou e i ti konn naz parey en pwason.

Lizour ti fer nou ti ankor pe koze. Dan pti wit er, i ti dir mwan ki i bezwen ale. I ti atrap mon figir dan son lanmen e anbras mwan lo mon lalev,

“Ou konnen ki ou pa kapab koz sa avek personn, Emma? Promet mwan.”

Mon ti sakouy mon latet. Wi, mon konnen ki mon pa kapab al koz sa avek personn. Lekl ki ti pou krwar mwan tou fason? Me tou sa konesans i pez for lo mon lestoman, i tourmant mwan. Mon pli gro tourman, mon pli gran lafreyer se mon piti. Kimannyer i pou ete, pov pti bet? I pou viv?

Sa ekstre ti fini la. Larestan sa paz ti vid. Mark ti vir paz e war en lot ekstre. I ti kontinyen:

## Sapit 17

Mark in ne! I ti ne le 3 Zen, aswar. Deza en mwan. I ti pez 3.9 kilo, en gro pti baba. I pran tou mon letan, mon pa ganny letan ekrir. Mon pa ti fer apel Manman pour ed mwan akouse i ankor pe repros mwan sa ziska ozordi Malabek pa ti krwar ki sa ti en bon lide, vi ki nou pa ti konnen kimanyer Mark pou ete. I ti demann led son bann koleg. Zot ki ti vin asiste mwan. Premye kou mon ti per zot, me apre ki douler piti ti'n for e ki zot ti si zantiy avek mwan, mon ti perdi mon lafreyer pour zot. Ofon zot parey nou bann imen, sakenn son karakter ek son fason fer. I annan Msye ek Madanm Valk dan zot karant an, Tanavalek ki ti en vev senkant wit an, Ksaya en zenn fanm trannde an e byensir Malabek ki ti annan trann-enk an. Zot ti kont zot lannen apepre parey pour nou. Zot tou zot ti syantis, expert dan zot domenn.

Pour retourn lo Mark, ou kapab imazin mon lazwa ler i ti ne, en pti baba parfe avek tou son pti ledwa lipye, pli enportan ti napa en pti latras bannla! Mersi mon Dye! Malabek ti'n deside ki si i ne parey zot, nou ti pou fer krwar ki in mor letan pe ne e zot ti pou pran li pour al viv avek zot. Mon ti'n agree malgre lide perdi mon piti ti enposib pour mwan aksepte. Plito mon mor! Me mon lazwa pa'n dir lontan. Malabek in eksplik mwan ki dapre tes disan ki zot in fer, Mark pou sanze apre. Zot pa krwar toudswit, me kekfwaw ler i konmans son bann lannen adolesans, ler i konmans vin en zonn. Mon sey pran en latitud optimis; mon ankor annan plizyer lannen boner avek li.

Manman pe met presyon lo mwan pour al batiz Mark vit, me mon pa oule. Mon pa kapab eksplik li ki Mark i zis

lanmwatye imen e mon pa konnen si mizerikord Bondye i aplik pour tou kreatir sa liniver ouswa zis pour nou bann zonn. Mon pa oule fer en pese mortel san konnen.

Ti annan plizyer paz vid, apre lo en lot paz, Emma ti'n met dat anler dan kwen - 25 Zen 1984, me dat aktyel lo paz *dairy* ti 25 Oktob 1979. Mark ti fer en pti kalkilasyon mantal e dekouver ki i ti annan senk an, sa letan. Ekstre ti'n ganny ekrir avek bolpen nwanr, diferan avek bann ekstre avan ki ti ble.

Bomaten mon'n al bat avek mon pti zournal ki mon ti'n perdi. I ti dan en tetdorye ansanm avek bann morso leyet ki mon ti fer pour Mark. Pa demann mwan kimannyer in ariv ladan. Mon ti'n menm bly li. Mon'n relir enn de ekstre; tou sa bann bouwersman sa lepok. Mon krwar mon a kontinyen, kekfwaw en zour Mark a oule konnen ki ti arive e mon pa pou la pour rakont li, eksplik li. Ou pa zanmen konnen ki i kapab arive.

Depi lannen pase Malabek in eksplik mwan ki zot bann resers pres pour konplete. Ki zot pres pour retourn se zot, Nizou. Deza sis an depi ki nou ansanm. Aparad sa letan ki mon ti dekouver sekre Malabek, kot mon ti vreman malere, viv dan en laper, nou'n ere ansanm. Ti pran en pe letan pour mwan adapte mwan avek sa, me gradyelman mon ti konpran ki sa gran lanmour ki mon ti'n eksperyanse pa ti lanmour pour Dominik, me pour Malabek i pa ti enportan kimannyer i ti ete, fizikman. Se son karakter, son zantiyes ki ti enportan. Nou ti kapab konvers lo tou sort topik en lannwit antye. Nou sekre ti fer nou vin pli pres avek kanmarad vi ki nou ti bezwen ekskli bann lezot dimoun dan nou lavi. Nou ti zis nou trwa, Mark, li ek mwan. Enn ler mon regret sa. Mon'n bezwen distans mwan avek mon fanmiy. Lina i ankor pas pase enn ler. Mon konnen ki i vey letan ki Malabek pa la. Mon

manman, mon pa war li preski ditou. I'n vreman ofanse ki mon'n refize fer batiz Mark.

“Sa, mon ser, pa pou fini byen!” ti dernyen parol ki i ti dir mwan lo sa topik.

Me son regar i kontinyen akiz mwan sak fwa mon anmenn Mark vizit li letan Nwel.

Mark ti aret en kou, entonnen. Sanmenm i ti rapel fer son batem ansanm avek premyer konminyon dan laklas katriyenm! Tant Lina ti fer batiz li apre ki Emma ti'n disparet. Pti bout par pti bout keksoz ti pe tonm an plas, me ti annan ankore en ta ki i pa ti konpran e i ti santi ki pa ti reste li bokou letan. Tou keksoz ti pe akseler ver en presipis e i pa ti konnen si i ti pour sorti ladan vivan.

I ti kontinyen:

Mon'n pran en desizyon. Mon'n deside pran lof Malabek pour al avek li Nizou. I annan en pe letan ki i pe sey persyad mwan pour vin avek li. Me vi ki sa i pou enplik en bann transformasyon mon lekor pour mwan nabou adapte mwan avek lavi laba, i pe les mwan fer mon prop desizyon. Mon'n mazin lo la lontan. Malabek pe ale dan detrwa mwan. Mark osi pour metamorfoz an en Nizouyen dan senk a set an e i pa pou kapab kontinyen reste isi. I pou bezwen al viv laba. Malabek in dir mwan ki i pou retournen dan apepre senk an zis voyaz li menm i pran plis ki enn an pour li vin get lo progre Mark e si mon deside konmans sa seri lopeyasyon e tretman neser pour mon transformasyon konmela, dan senk an mon pou'n pare pour voyaz avek li. Mon lavi pa pour vo nanryen san Mark ek Malabek. Mon pou napa en rezon pour viv. Sifo mon ale mwan osi.

Me zis sa mazinasyon perdi mon lekor imen i fer mwan transpir fre! Anplis i pou premye fwa ki zot fer en leksperyans koumsa lo en et konplike parey imen. Madanm Valk in eksplik mwan ki zot pour tir bann esantiyon selil mon disan, mon bann organ prensipal, parey mon lespri, mon leker, mon poumon; zot pour egzaminen e devlop fason pour zot sanz striktir mon selil pour fer li vin parey pour zot. I dir mwan ki zot in deza fer sa avek plizyer lezot kreatir. Zot pou fer sa a plizyer repriz, alors sanmenm fodre zot konmans boner, pou zot ganny letan avan ki zot bezwen ale. Madanm Valk in dir mwan ki i annan tou konfyans ki i pou marse, me kantmenm ...

Tanto mon pou konmans. Zot pou vin sers mwan dan zot navet spasyal dan lafore, pour anmenn mwan kot zot laboratwar i ete dan labe. Zot in promet mwan ki i pa pour fermal, zis zot pour fer enn de pti pikir dan mon latet ek lezot parti mon lekor. Mark i dormi byen aswar, mon pa krwar i a rod mwan.

Mark ti poz en kou. En vizyon ti flash dan son latet. Lalin pe reflekte en kouler rouz epe. Son kosmar! Son manman pe depes ver en lalimyer rouz aveglan, son lenz pe anvole, pe fwet avek son lazam dan en divan for. En gro bebet ki ti ouver son labous e son manman ti antre ladan. Navet spasyal. Mon Dye, in donn li kosmar tou sa lannen. Ou ti a krwar ki i ti a rapel en ta tapaz, me aparaman non, sa navet ti drolman silanzye. I pa rapel tapaz, me i rapel presyon ler ki i ti lev li e zet li vant anler ater, ler sa navet ti leve, reste sispandi en moman par lao bann pye dibwa, apre disparet avek en klendey. Non, pa toultan ki i ti dormi byen aswar.

Ksaya in ofer pour vey li, me mon napa konfyans dan li. Mon santi ki i pa kontan mwan, i zantiy zis letan Malabek i la. Mon krwar i anmoure avek Malabek, me Malabek pa remarke.

En ekstre date le 10 Oktob 1984

Malabek pe ale. Nou'n fini organiz tou keksoz. Nou pou anter lekor Dominik dan bwa, apre Malabek pou larg bato pti Pyer olarz e nou pou fer krwar ki Dominik in al lapas e pa'n retournen. I annan detrwa mwan i'n al lapas avek pti Pyer tanzantan, alors dimoun pa pou war sa drol si i'n perdi lo delo sale. Lekor Dominik in konmans large osi. Malabek pa ti pou kapab kontinyen servi li pour lontan ankor. Mon sagren i ranpli mon lestoma. Senk an! Senk an avan ki mon war li ankor, si mon war li ankor. Mon pe sey mon mye pour mwan pa plere. Mon pa oule bouwers Mark. Nou'n gard sekre kimannyer son papa i vreman ete menm kont li. Nou'n mazine ki i pou bezwen viv en lavi normal, regilye, parey tou pti manmay son laz isi Sesel. Akfer bouwers li avek en bann detay keksoz ki i pa pou ni menm tro konpran, ki pou zis fer li santi li izole e diferan avek lezot? I ava annan ase letan apre pour eksplik li, letan i konmans sanze.

I annan en mwan depi ki mon'n konmans pran en latizann pour fer mon lekor sanze. I dan laform en pikir ki mon pik dan mon lebra tou le swar. Madanm Valk in montre mwan konman pour fer.

## Sapit 18

Mark ti vir paz. Sa detrwa paz ki ti reste ti vid. Sa ti dernyen ekstre ki son manman ti'n ekrire. Mark ti ferm *dairy*, e larg en gro soupir. I ti reste en moman, imobil, pe get dan plafon. I ti fors son lespri reste vid. Gradyelman tapaz lapli kont lafnet ti penetre sa nyaz frazil, ki i ti pe kasyet deryer. I ti zet en regar lo revey enn er ti'n sonnen e i ti lafen. I ti leve pour al rod manze. I ti pe al pas en triko prop lo li avan, ler i ti remarke ki i ti ankor 'envisib'. I ti larg triko lanmenm ater pa nesaser.

I pa ti kapab kontinyen blok son lespri. Toudenkou, parey en deliz, en panse bouwersan ti anvair li. I ti respir for detrwa fwa, apre dousman, i ti konmans triye e asimil tou sa ki i ti'n aprann. Son lavi ti an morso, me la i krwar ki i ti'n ganny ase morso pour konmans pyeste li ansanm.

Son papa ti en Nizouyen, ki ti'n antre dan lekor Dominik, mari marye son manman Emma, ki li i ti'n toultan pran konman son Papa - I ti menm annan serten tre sa zonn. Avan ki son vre Papa ti kit later pour retourn Nizou, zot ti anter lekor Dominik dan bwa e fer krwar dimoun ki i ti'n perdi lo lanmer. Son manman in reste avek li ziska ki i ti annan dis an, apre son papa in retourn lo later pour vin sers zot. Me li i pa ti ankor sanz lekor alors son papa in al avek zis son manman. Zot in kit li avek Tant Lina. E la, si i pe byen enterpret sa bann lendikasyon ki i pe gannyen, zot in retourn ankor pour vin sers li.

Kimannyer i ti pou pran kontak avek zot? Lo son konpiter? Me i pa ti asire kimannyer. I a vey lalimyer lo lanmer aswar e sey rod en fason pour atir zot latansyon. I ti ganny sa santiman ki ti annan en keksoz ki i ti pe bliye, en keksoz enportan. En keksoz ki pa ti kole, en pti panse ensinifyan ki ti fofil dan kolin son lespri.

Son lespri preokipe, i ti pe travers lasal-a-manze pour li al lakwizin kan i ti tann en tapaz. Pti latab, trwa lapat, dan salon ti savire e roule ater. Alerte, Mark ti tris lanmenm, son regar ti balye tou kwen salon, son leker pe bat for. Latab ti kontinyen tournen, tapaz ki i ti fer lo tayls, ti kontinyen rezonnen lontan apre ki i ti'n aret vire. En tansyon ekspektan, etandi konmsi lastik, ti fer Mark retenir son souf. Mark ti war li dan kwen son lizye, en pti mouvman apenn remarkab, plito en sanzman kouler lonbraz e dan en klendey, kelken ti bat li dan miray, en lanmen lo son lagorz, pe trangle li. Disan ti rezonn dan latet Mark, son figir ti vin rouz. I ti debat, sey grif sa dimoun dan son figir, me san gran lefe. Son figir ti konmans vin ble, son mouvman malkordinen. Avek en gran zefor, Mark ti lev son zenou e tap son agreser dan son bavant. Lanmen lo son lagorz ti perdi zot lafors e Mark ti glis ater, me i pa ti tonm net. I ti graponn en lebra sez atan, apiy lo la brefman, epi i ti releve, kourbe. I ti anval bann gran gran gorze ler, ki ti fer li touse, anmenmtan i ti tay ver son lasanm an servan miray pour siport li. I ti get deryer li pour war si i ti pe vini, me natirelman, i pa ti war personn. Son agreser pa ti imen. Konman Mark ti atrap ponnyen laport, bougla ti lans li ankor avek en kriye laraz, me i ti ganny zis son lipye. Mark ti donn koudpye apepre kot son latet e i ti bezwen large. Mark ti bag anndan dan lasanm. Vit, i ti vir lakle dan serir. I ti ankor pe respir avek difikilte, son lagorz ti anflanm. Son lespri ti an tourbiyon, pe kalkil tou keksoz alafwa.

Son agreser ti lager en moman avek ponnyen laport, apre i ti arete. Mark ti respire, me i ti sir ki sa ti en pti repriz, sirman i ti pou retourn ankor. Mark ti get isi, get laba, perod en keksoz pour defann son lekor avek,

me i pa ti war nanryen. I ti zis ganny letan ris lili e vin blok laport avek, avan ki en lars ti fann dan laport; i ti tann tapaz dibwa kot i desire.

*Oh shit!*

Sa lars i ti'n fek fite son lavey letan i ti pe ed Tant Lina e i ti'n poz li deryer laport lakwizin. Ankor en kou-d-lars ti sizle laport, lesard dibwa ti anvole.

Ar wi, Senyer, sov li!

Dan en panik, Mark ti graponn en sez, sot lo lili e balans sez dan louverz par lapat Sa kat ranze louverz anba ti grennen, en son vif, transan, ki ti rezonn dan ledan e fer sanpye marse lo li. Lapli ti fwet anndan. I ti'n bliye ki lapli ti pe tonbe. I ti grenp lo dosye lili, epi lo bar lafnet. I ti kourbe pour li sot deor. Zis avan i ti sote, i ti tann laport deryer li kot i sede. Mark pa ti vire pour gete. Konman son lipye ti tous ater, i ti demare dan direksyon lafore. Lars ti pas anriflan obor son zorey e al anter dan en pye banann. Mark ti fer en pti kriye. I ti ouver lapay kot i ti ale!

Mark ti taye ... taye. Lapli ti tou tranp li. Gro divan ti balans bann fey pye dibwa par lao son latet dan en fason efreyan. Malgre ti gran apremidi, lapli ek lafoumbal ti fer lafore sonm. Ou ti apenn war detrwa met devan ou. I ti'n otomatikman pran sa pti santye ki mont dan bwa. Delo lapli ti devid dan santye par landrwa. I ti trenbal fey mor avek li, par anba bann rasin dibwa, bwi ant bann ros; i ti fouy son semen avek en lazwa konpletman inapropriye. Fey zarbis ti larg zot delo lo li de le moman ki i ti abord avek zot. Zerb ti glise anba son lipye, i ti mank lekilib. Son respirasyon osi ti pe vin tro kourt, alor i ti forse aret en moman. I ti get deryer li pour war

si sa kreatir ti pe swiv li. I pa ti war personn, me sa pa ti vedir nanryen. I ti kapab de pa avek li. Sa pansé ti fer li transpir fre e i ti about pour li konmans tay ankor. Me i ti ezit en moman e sey kalme son lekor pour li nabou rezonn en kou lozikman. Apre, i ti sorti lo santye e madre deryer en touf vakwa maron.

Mark ti reste imobil e fikse dan sa brouyar avek en konsantrasyon total. Kanmenm delo ti koul dan son lizye, i pa ti swiye. Toudenkou, parey lot zour, i ti santi en leksplozyon lalimyer briyan son latet. Douler ti fer li ferm son lizye e tenir son latet dan son lanmen. Ou ti a krwar son lizye ti pe desire. Douler ti enorm, Mark ti mord son lalev pour li pa kriye. Erezman sa pa ti dire e en moman apre, Mark ti reouver son lizye. Keksoz ti diferan, pa bokou, en serten ten dan latmosfer ki pa ti egzaktaman parey labitid. Apre i ti war Li! Mark ti is lalenn e sren lanmenm. I ti pe monte avek en lepa determinen, son lars dan son lanmen. I ti koupay brans dibwa ki ti dan son semen, me plito avek laraz, ki lefe ki zot ti zenn li. I ti aret vizavi avek Mark e fikse dan son direksyon. Mark ti war li kler. Malgre son lafreyer i pa ti kapab pa admir sa laform, preski imen, me sak mouvman ti en flo arzante konmsi metal merkir. I ti santiye, bann pti letensel refle lalimyer.

Mark ti lev son lanmen e regard son lekor. Li osi i ti parey. Konpletman emerveye, i ti admir son lekor. I ti zoli. I ti pas lanmen lo son lizye pour war ki'n arive. Son lizye pa ti santi parey son labitid anba son lanmen. I ti pli gro e pli anbye. I ti'n perdi son lizye imen e i ti konpran ki i ti'n fini sanz laform. Sa prosesis ti'n fini. I ti nepli imen, i ti konpletman nizouyen. Me, i pa ti ganny letan asimil tousala aköz son agreser ti'n kit santye e i ti pe avans ver li.

O menm moman Mark ti war aköz bougla ti'n arete e fini dekouver kot i ti pe kasyet. I ti'n kraz zerb kot i ti'n pase. I pa ti esper plis. I ti demare. Bougla ti fer en kriye e pran deryer li. Nenport moman i ti ekspekte lars anter dan son ledò.

I ti tay an fou. Enn ler i ti pas dan en ta sansib, ki ti grif son lipye. Son lipye ti anfonse en kou dan en tron dibwa pouri; i ti pil pile pour tir mangwak avek. I ti sot kap ros. Gradyelman, ti annan mwens bann gran pye dibwa, e plis glasi ek gro ros granit. I ti nepli kapab taye. I ti apiy lanmenm avek en ros e sey evalye kot i ti ete, si bougla ti ankor deryer li. I pa ti tann li. Me i ti'n perdi. Sirman i ti par la an montan Piton de leboulis. I ti war lanmer dan lwen. Toudmenm i ti kasyet anba en trou ros ant de glasi. I ti'n ganny kros krose partou e i ti pe sennyen, en delo zonn kouler pisan. I ti tranp son ledwa ladan e goute. I ti sale, avek en gou metal. I ti tou tranpe, fatigue, per, san bliy lafen. I ti kokiy li ptipti, ptipti, son latet lo son zenou. Parey en pyero, en sel gro larm ti esap son gro lizye e koul lo son lazou. Gradyelman i ti relaks en pti gin. Son misk lipye ti pe tranble, lefe ki'n tay tou sa zistans. Son lekor osi ti tranble avek reaksyon sok. Me son zorey ti reste apik. I ti sey idantifye tou tapaz ki i ti tandè marse dan lapay, pres avek louvertir kot i ti ete. I ti mat debout. En tang ti tir nenen, get li avek kiryozi, apre kontinyen lo son misyon. I ti asiz ankor, lo alert, son lizye pe sey penetre sa lizyer brouyar ki i ti nabou war par lespas ant sa de glasi. Apre en bon moman, akable par lafatig, i ti tonm dan en pti abazourdi.

## Sapit 19

Zan-Iv ti ariv kot li dan pti trwa er, tout an presan. I ti fer letour lakaz. Son tonton, pli gran frer son papa, ti pe fer kazye anba langar deryer lakaz. I ti koz de pti mo avek li, letan ki i ti pe tir son soulye labou, epi i ti rantre par laport lakwizin. Malgre lapli, i ti oule absoliman ariv kot Mark. I ti kas son dyaket, anvoy lo sez lanmenm, pas lanmen dan son seve mouye. I ti diriz ver son lasanm. Dan salon, son granmanman ti pe bos karang lo sofa. I ti pas lo bout lipye obor sofa son granmanman la, si i al lev li, i pou trouv keksoz pour fer li fer! Arivan dan lasanm, i ti zet son sak lo lili, detas son semiz, tir son kannson e rod lenz sek pour mete. I ti pas son *track suit* lo li. I ti konsider telefonn Mark pour dir li ki i pe vini, me telefonn ti dan salon e i ti pour lev son granmanman. I ti deside mont koumsanmenm. Depi lontan, i ti pe mazin mont kot Mark, me ti'n annan en *match* foutbol ki ti'n ganny organize ant lekol bisnes ek lekol akademik e i ti'n bezwen al zwe. *Match* ti'n fini enn lo enn e bannla pa'n oule les li al boner. I ti travers par dan lakwizin, remet son dyaket ek son soulye, e sorti deor.

“Kayor, mon pe al kot Mark, oke? Dir manman.”

“Mmm...,” son tonton ti zis gronnyen, son lizye anvaye par katarak, pa ti preski war kler, me son vye lanmen korde, ti tres sa bann zig banbou avek lavites e prezizyon.

I ti kouver son latet avek kap son dyaket e pran semen anmontan. I ti mars vit; enn akoz ti fer fre, de akoz i ti enpasyan pour retrouv Mark pour konnen kimannyer i ti'n pas son lazournen. I ti'n ganny sans koz avek Danyel pli boner, kestyonn li en pe lo sa lensidan yer. Danyel ti'n en pe ezite pour koz lo la. I ti paret ankor

terifye par sa ki ti'n ariv li. Me apre, avek difikilte, i ti reisi rakont Zan-Iv ki i ti'n santi:

“... konmsi, konmsi en nanm ti'n fors son lekor anndan mwan britalman. I ti pe pous mon prop nanm deor. Mon pa ti kapab respire. Mon ti anvi vomi. I ti pran kontrol mon lanmen konpletman. Mon santi son lentansyon, mon santi ki i pe sey touy Mark, me mon pa kapab anpes li. Mon pa kapab anpes li.”

Son lavwa tranblan, ti afebli, epi i ti aret koze. Son figur ti'n vin blan. Zan-Iv pa ti ensiste plis.

Personn pa ti reponn bonzour Zan-Iv, me sa pa ti fatig li. Mark, letan i ti pe konsantre dan en keksoz, ou ti a vin kriy dan son zorey, i pa ti pou tann ou. I ti fer son labitid, pas par deryer e antre par laport lakwizin. Konman i ti antre, son lensten ti dir li ki keksoz pa ti normal. I ti travers salon. Pti latab ti ankor ater, sez sofa ti atraver, kousen lo la ti'n tonm ater.

“Mark! Mark!” Zan-Iv ti kriye, irzan, depi kot i vini.

Laport lasanm ti anpyang. I ti'n ganny as ase, me i ti ankor pe tenir lo son kouples. Zan-Iv ti sey pous li ouver. Laport ti ouver en pti gin, epi pri lanmenm. Lili ti'n blok li. Zan-Iv ti kas kas ankor en pe bann lesard dibwa, apre i ti grenp anndan, pasan par lao dosye lili, ki ti'n ganny fann li osi. Lili ti'n kas an de. I ti konpran ki ti bezwen kou-d-lars ki'n fer en dega parey. Anndan dan lasanm, ti annan vit grennen, sez avek en kote lapat kase. Lapli ti'n fwet anndan, ater ti mouye, lili osi ti tou tranpe. Divan ti'n anvol bann papye ki ti lo latab Mark e zot ti'n tonm dan delo ater.



Ki ti'n arive? Kelken ti'n fer latak lo Mark? Lekor Mark ater, bennyen dan disan ti flash dan son lespri. I ti konnen i ti'n merit mont direk kot Mark depi bomaten. I ti avans kot lafnet e get deor. Lapli ti'n preski aret tonbe. Ti annan mark lepa zis anba lafnet. I paret ki Mark ti'n sove; tre probableman dan bwa. Me depi keler tousala ti'n pase? I ti frisonnen. I ti get isi, get laba, en pe efare, san tro konnen ki pour fer. Dousman en pti son ti penetre sa konfizyon dan son lespri - bip, bip, bip. Konpiter Mark!

I ti avanse pour get pli pre. Wi, parey lot zour, BIPIP ti pe fer mwannik lo la. I ti pran sa pti stoul lanmenm dan kwen biro, plas li devan lekran, kot normalman sez ti ete. I ti asize. I ti get lekran, ezite, met son lanmen lo kibord, ezit ankor. Apre i ti tip:

**“Wi?”** I ti pez bouton “enter”

I ti retenir son lalenn, pe espere si i pour ganny larepons. En minit, de minit, napa nanryen. Zis konman i ti krwar ki i pa ti pour ganny okenn repons, ki sa pa ti pe marse, enn ti aparet.

**“Mark, ou sa?”**

**“Wi. Ki ou?”** Zan-Iv ti tipe.

**“Dadi, sa.”** swivi par, **“Manmi osi i la.”**

Zan-Iv ti konpletman dekonserte. Ki ti pe arive dan sa landrwa? Napa en lord prezan? Letan i ti pe sikann Mark ki sete son manman ki ti pe vin sers li, i ti pe fer zis sa sikannen. I pa ti vreman krwar ladan. Sa ti pli move

ki program *twilight zone*, i ti pe koz avek malfezan! Non, pa posib. Ti bezwen en fars ki kelken ti pe zwe lo Mark.

**“Mon manman ek mon papa in mor. Mon pa krwar dan malfezan. Alors lekel ou?”**

**“Mark nou pa'n mor nou. Nou konnen ki ou'n konmans sanze. Nou bezwen koz avek ou. Nou ava eksplik ou.”**

**“Ou pe koz lo lefe ki mon'n vin envizib?”**

**“Ou pa vreman envizib. I zis ki ou lekor prezan i fer avek amonia e i en pe difisil pour war ou avek lizye imen. Me lo plannet Nizou, kot nou sorti, tou keksoz pour korek.”**

**“Plannet Nizou?”** Zan-Iv ti pe vin plizanpli etonnen avek en bon pti doz lafreyer. Me dan en sans, sa ti pe konfirm son soupson ki Mark ti'n vin en elyenn, malgre ki i ti'n napa kouraz pour dir sa Mark son lavey. Selman li, i ti'n mazine ki en elyenn in debark lo later e i'n anvair lekor Mark, ouswa i'n fer leksperyans kelkonk lo li en pe parey ou war dan bann film.

**“Wi. Ou osi, ou en Nizouyen omwen lanmwatye Nizouyen. Me, les nou a eksplik ou tousala ler nou rankontre. Vin dan lafore tanto. Ou konnen kot sa gro ros lavann i ete?”**

Zan-Iv ti pe konmans konpran sa zistwar par bout. I ti rapel rankontre manman Mark en sel fwa. I ti'n fek vin reste Mon Plezir e i ti'n fek fer zanmi avek Mark. I pa ti rapel son vizaz, me i ti definitivman imen. Tou fason i ti

ser Tant Lina alors sirman i ti imen. Saverdir, se papa Mark ki ti en elyenn. I paret ki vre i ti pe koz avek paran Mark, ki zot ti pe dir li laverite. Me i ti annan ankor tro bokou kestyon. Tousala ti tro enkrwayab.

**“Ou dir mon manman osi i la avek ou? Mon rapel mon manman tre byen. I ti en dimoun parey mwan, i pa ti okenn Nizouyen.”**

**“Sa i vre. Mark, mon pti seri, ou manmi sa. Mon ti dakor pour mwan vin Nizouyen, pour mwan nabou al avek ou Papa. La, nou'n vin sers ou.”**

Zan-Iv ti kalkil en kou. Pour en bon moman i pa ti reponn bannla. I ti pe mazin lo lefe ki ti annan kelken ki ti pe sey touy Mark. Eski i ti kapab annan konfyans avek zot, ouswa zot menm zot, pour en rezon enkonni, enkonpreansif, ki ti oule touy Mark. Sa zafer ki Danyel ti'n rakont li namn ki ti'n sey antre avek li, ti sirman zot menm.

**“Mark, Mark! Ou ankor la?”**

**“Wi.”** Ti annan ankor en kestyon pour zot, en kestyon ki ti pour ed li konnen ki i ti pour kapab pran risk krwar zot.

**“Eski zot in vin sers mwan zot tousel ouswa i annan ankor Nizouyen avek zot?”**

**“I annan senk nou. Akoz?”**

**“Akoz enn ant zot pe sey touy Mark!”**

**“KWA?”**

**“Pa Mark ki pe koz avek zot”** Zan-Iv ti revele **“Mon apel Zan-Iv. Mon zanmi avek Mark.”**

**“Oli Mark?”**

**“Mon krwar in sov dan bwa. Fotespere i'n sov dan bwa, e zot pa'n reisi ganny li. Mon'n fek ariv la kot Mark. Zot in detrir son lasanm avek en lars, mon krwar. De fwa oparavan, zot in atak li.”**

**“Ki sa ki fer ou krwar en Nizouyen ki pe fer sa? Nou tou nou kontan pour akey Mark. Tou dimoun Nizou pe esper li. I deza seleb laba.”**

**“Akoz dernyen fwa zot in sey servi lekor enn nou zanmi pour fer atak li.”**

Zan-Iv ti rakont zot lensidan ki ti pas avek Danyel.

**“Si sa ki ou'n rakont nou i vre; wi, i bezwen en Nizouyen ki'n fer sa. Me i difisil pour krwar. Tou sa trwa dimoun ki avek nou, i nou zanmi depi lontan. Kimannyer zot kapab fer sa? Akoz zot oule fer sa?”**

Ti annan en silans lo tou le de kote. Apre bannla ti tip

**“Nou pou al rod li. Toudswit. Fotespere nou pa tro tar.”**

**“Mon osi mon ti pe fer lide al rod li,”** Zan-Iv ti dir.

**“Esper nou kot ros lavann. Nou pe vini.”**

Konpiter ti tennyen. Zan-Iv ti soupire. Son leker ti pe bat for. I pa ti sir si i ti pe ed Mark ouswa met li dan plis problem. Son prop lekor osi. *Oh shit!* I ti pas son de

lanmen dan son latet. Ki i ti pou fer? Al esper bannla dan bwa? Pran risk ganny touye? I ti napa gran swa. I ti pou bezwen al rod Mark e i ti bezwen led. I pa ti pou kapab *deal* avek en Nizouyen ki lapliparditan i pa ti ni menm kapab war li.

I ti prepar li pour al dan bwa. I ti pran gran kouto anba sink, i ti pran tors dan tiwar lakwizin. Fernwanr ti pou sirman fer li dan bwa. I ti mazine ki Tant Lina ti bezwen pres pour arive sorti travay. I ti pou enkyet san konpran ki pe arive. I ti decide ekri li en pti not. I ti eksplik Tant Lina brefman ki aparaman ti annan kelken ki ti'n atak Mark e ki Mark ti'n sov dan bwa. Li, Zan-Iv ti pe al rod li. Apre en moman mazinasyon, i ti osi demann Tant Lina pour pa apel lapolis toudswit, me pour esper li arive avan.

Lapli ti'n aret en kou, me lesyel ti ankor nyaze. Letan ti lour. Lapli ti pou tonm ankor. Vannswet ti'n araze. Divan ti soufle parey en demon ki ti'n esap lanfer, determinen pour detrir tou dan son semen. Pye koko ti ploye, enn ler ou ti a krwar i ti a kase. Si ou pa ti solid lo ou lipye, i ti a derap ou, al avek. Zan-Iv ti zip son dyaket ziska dan likou, devir son kap dyaket e kouver son latet. Laserpoul ti leve lo li. I ti pran semen dan bwa. I ti sey gete osi si i pa ti war okenn latras ki petet Mark ti'n fer, me divan ti'n fer tro bokou dega pour vreman konpran. Letan i ti pe apros ros lavann, i ti pran swen pour fer mwens tapaz ki posib. A vre dir, menm si i ti tay an fou parey en koson maron, ou pa ti pour disteng li avek tapaz brans dibwa ki ti pe krake dan divan toultour li. I ti madre deryer pye dibwa e obzerv son lanvironnman avek latansyon. Ou a dir bannla ti'n ariv avan li? I ti

pans pa. I ti sey vey mouvman tou lonbraz ki pa normal, me ti enposib. I pa ti konpran nanryen dan sa labrim, sa tourbiyon divan. I ti soupire, e atrap son gran kouto pli for. Sa ti reasir li en pti gin. I pa ti en manrmay li, e kouyas ti a pase la, si i annan ki ti vin atak li.

Zan-Iv ti kalkil en kou, apre decide ki si i ti reste la, i ti pou parey poul lo nik, fasil pour atrape. Si paran Mark ti dan konplo pour touy Mark, zot ti pou touy li osi. An plis, lavi Mark ti andanze, vomye trouv li plito posib. I ti fer letour ros lavann e kontinyen an montan. Lapli ti rekonmans tonbe, pli for ki avan. Ou ti a krwar ki fernwanr ti'n fini fer. Son dyaket pa ti kapab protez li konpletman. Lapli ti fwet dan son figir, desann avek son likou e mouy son semiz. Son soulye osi ti'n tou tranpe e tre enkonfortab pour mars ladan. Ti vreman en letan miserab. Tanzantan i ti anvoy lavwa e kriy Mark. I ti realize ki i ti pe atir latansyon lo son lekor, me ti en risk ki i ti bezwen pran. I pa ti pou zanmen war Mark dan sa tanpet.

## Sapit 20

Lina ti ariv kot lakaz sis er sonnen. I ti'n ganny retar. Avek sa ta lapli ki'n tonbe, delo ti'n monte dan semen Pwent Lari e ti'n blok trafik. Bis Tata ti pran pres en demi er-d-tan pour traverse. Apre sa, i ti'n tape an montan pour ariv dan sa bwa. I ti tou tranpe, sa pti parasol frazil pa'n servi dan nanryen avek sa divan. I ti fatigue, son migrenn ti'n leve. Se bann zour koumsa ki ti fer li regret reste dan en bwa! I ti pas par deryer, par laport lakwizin. I ti tir son soulye e remarke ki i ti'n fini dekole. I ti soupire; pli lisyen i meg, pli pis i bag li! La, i ti pou bezwen trouv larzan pour aste en lot. Premye keksoz ki i ti fer se ranpli son boulwar e met lo dife. I ti anvoy lavwa e kriy Mark en kou, me ti napa larepons. I ti tann en laport pe tape, ale vini dan divan. I ti diriz ver lasanm pour al gete e osi pour al tir sa lenz mouye lo li e la, i ti war dega dan salon. Mon Dye! Voler ti'n pas kot li!

“Mark! Mark!” I ti kriye Oli sa piti? Pa dir mwan i'n al kot Zan-Iv! I ti diriz ver lasanm Mark.

Son leker ti vin fre. Soke, i ti debout devan laport koup koupe, demi-ouver. Ki ti'n arive? Divan ti pous laport e i ti ferm dan son figir. Lina ti ouver li ankore i ti bezwen fer li meg pour li nabou pas par laport ki ti'n ganny bloke par lili. Mark! En keksoz ti'n ariv Mark. Lapolis, i ti bezwen telefonn lapolis. O Mon Dye! Son vant ti brouye. I ti dous lanmenm en moman, efare. Boulwar lo dife ti sifle tre for e otomatikman i ti al lakwizin pour tenny dife anba la. La, son lizye ti bat lo not Zan-Iv lo latab. I ti ris en sez e asize pour li lir.

Kelken ti pe sey touy Mark! Me sa ti en zafer lapolis, akoz Zan-Iv ti dir li espere? I ti leve e ale, vini dan lakwizin, pe sey deside ki pour li fer. I ti avans kot lafnet e get ver lafore. Deor, fernwanr ti'n fini fer.

'Ou a dir mwan oli zot?' i ti demann son lekor, enkyet.

Mark ti ouver son lizye an gran.

“Mark! Mark!”

Leko son non, trennen par divan, ti filtre dan kolin montanny, rezonn dan kap ros. Kelken ti pe kriy li. I ti ekout ankore. En pti moman apre, i ti tann ankore.

“Mark! Mark!” I ti rekonnet lavwa Zan-Iv.

I ti santi en gran soulazman. I ti sorti deor. Fernwanr ti'n fini fer, me sa pa ti en problem pour Mark. I ti nabou war tre byen, an nwanr ek blan, me bokou pli byen ki zonn i kapab war aswar. Zis lapli ki ti rann keksoz en pe brouye.

“Zan-Iv, mon isi!”

“Mark! Mark!” Zan-Iv ti kriy ankore.

“Mon isi,” Mark ti reponn pli for.

En pti moman apre Zan-Iv ti aparet, sorti deryer en bann pye dibwa agos avek Mark. Zan-Iv ti kler tors lo li, me Mark ti realize ki Zan-Iv pa ti pe war li. Alors i ti apros Zan-Iv e tous li lo son zepol. Zan-Iv ti fer en sote.

“Mark?”

“Wi. Menn, granmersi ou'n vini! Ou pa pou krwar ki'n arive.”

“Mon'n war leta ou lasanm...”

“*Shhh!*” Mark ti graponn lebra Zan-Iv e Zan-Iv ti aret koze en sel kou.

Zot ti'n tann kriy Mark. Zot ti vir dan direksyon lavwa, ki ti sorti a drwat. Mark ti ser lebra Zan-Iv pli for. I ti war en Nizouyen pe apros zot. I ti pran gran kouto dan lanmen Zan-Iv, anmenmtan i ti rekil parey krab ver trou ros kot i ti'n kasyet, an trennan Zan-Iv par lebra avek li.

“Kwa? Ki sennla?” Zan-Iv ti soufle.

“En Nizouyen, kekfw sa enn ki pe sey touy mwan.”

Mark ti dir kekfw, akoz malgre sa Nizouyen ti pe apros zot ase vit, pa ti paret annan zouti avek li. I pa ti paret agresif nonpli. Toudmenm Mark ti lev son gran kouto dan en fason menasan e kriy avek li,

“Pa koste. Mon pou touy ou!”

Sa Nizouyen ti reste debout en dizenn met avek zot,

“Mark, mwan sa, ou Papa. Mon'n vin sers ou.”

Leker Mark ti sere. I ti realize ki i pa ti ni menm konnen kimannyer son Papa ti ete. Larm ti vin dan son lizye, me i ti anval son lapenn. I ti ouver son labous pour dir keksoz, me parol pa ti sorti.

“B .. be .. be ..” i ti begeye. I ti ezite. Son papa? Pa son papa? I ti sey reflexir vit, sey analiz sitiasyon me ti annan zis en bouiversman panse dan son lespri. Ler i ti remarke ki sa Nizouyen ti pe profite pour avans pli pre, i ti panik.

“No .. on! Debout ou lanmenm! Mon pou debrans ou!” i ti menase, azite.

“Mark, i oke. Mon pa pour fer ou ditor, mwan.”

Nizouyen ti kontinyen aprobe, pti pa par pti pa, avek prekasyon, pe kontinyen reasir Mark dan en lavwa amikal. Mark ti get Zan-Iv dan kwen son lizye i pa ti fye tir son regar net lo bougla pour get son desizyon, me sa gran idyo ti pe kler son tors partou partou, pa konnen ki i ti pe rode.

“Oli li? Oli li?” Zan-Iv ti pe demande irzan.

Oli lekel? Mark ti fini bliye ki Zan-Iv pa ti kapab war sa Nizouyen. Nizouyen ti ankor pe koze,

“Mon konnen ki ti annan kelken dan nou group ki pe sey touy ou, nou'n fini atrap li. I oke prezan.” I ti'n ariv zis detrwa met avek zot.

Mark ti ezit ankor. Zan-Iv ti kriy,

“I lalang!”

Tro tar! Nizouyen ti'n fini ras son lars e i ti lans lo Mark. Mark ti sey rekil par deryer, me lars ti bles li lo son zepol, i ti tonbe. Gran kouto ti sap li. Zan-Iv ti pous en kriye, laper ek laras melanze, i ti graponn sa gran kouto

e konmans koupay an brit an bann, konmsi en boug fou.

Toudenkou en lalimyer rouz ti anvair sa landrwa. Zan-Iv ti aret koupaye e get anler. Son labous ti reste ouver. En navet spasyal ti pe flote oter pye dibwa par lao son latet. I ti apepre senk met longer, kat met larzer dan laform en kokiy zwit, kouler aliminyonm. En kou-d-lars, ki ti zifle obor son zorey, ti fer li rekonmans koupay ankor avek en lavites. Zot ti tann en lavwa kriye avek lotorite,

“Valk! Arete! Ki sa ou'n vin fou?”

Swivi par en lesanz parol dan en langaz ki ni Mark, ni Zan-Iv pa ti konpran. Mark, ki ti'n relev debout, ti war en Nizouyen par laport sa navet spasyal pe koz avek sa enn ater. Ti annan en zouti parey en tors dan son lanmen. I ti vize, e *shoot*. Konmsi en kou-d-zekler en lakord ti deroule e anpay Valk, ki ti'n lev son lars pour bles Zan-Iv. I ti sape, i ti tonbe. Lars ti anvole. Mark ti soulaze. I ti atrap Zan-Iv lo son zepol pour fer li aret koupaye,

“I oke, prezan. Arete. Zot in ganny li.”

“Oli? Oli?” Zan-Iv ti demande, ankor dan en panik. I ti aret koupaye, me i ti kontinyen gard en poz 'an gar' konmsi Dartanyan dan trwa mousketer. Pov Zan-Iv! I pa ti ganny en konpran ki ti pe arive.

“Mon krwar mon paran in arive,” Mark ti dir li, avek lazwa dan son lavwa.

“Ou paran ki'n atrap li?” Zan-Iv ti demande.

“Wi. Mon krwar mon Papa.”

“Ouf! Granmersi!” Zan-Iv ti relaks, me latansyon Mark ti nepli lo Zan-Iv, i ti pe regard en Nizouyen kot ti pe desann avek en lesel lakord metalik, swivi par en lot. Mark ti regard zot desann, son leker dan son lagorz. Sa enn premye ti ariv ater. I ti regard Mark avek lafyerte ek lanmour.

“Dadi?” Mark ti demande, ezitan.

Son Papa ti zis ouver son lebra, Mark ti plann ladan. Son manman osi ti aproz e ser son mari ek son piti. Zot ti plere.

Zan-Iv, kantmenm pa ti war zot tre byen, ti doute ki pe arive. Son lagorz ti gonfle avek lemosyon li osi.

“Mon regrete ki ou'n pas dan tou sa problemin ou tousel,” son manman ti dir li. “Mon kapab mazin ou konfizyon ek lafreyer.”

“I oke,” Mark ti reasir li, “Mon zis kontan ki zot la. Ki tou in fini byen.”

“Vini. Annou. Nou ava anmenn Zan-Iv kot li avan nou ale.” Manman Mark ti dir.

Zot ti mont sa lesel metalik enn par enn, enkli Zan-Iv e laport ti ferm deryer zot.

## Epilog

*Apré ki lapolis ti'n ale, Tant Lina ti asiz anba lavarang dan en sagrafasyon. Son larm ti vers an silans lo son figir. Ipa ti swiye, i ti zis mouse tanzantan.*

*Zan-Iv ti tann li, me i ti napa kouraz pour al sey konsol li. I ti pe asize dan salon, pe tras e retras son ledwa lo lannen marke an lor lo dairy Emma, ki i ti'n ranmas ater dan lasanm Mark avan ki lapolis ti vini. Son lizye osi ti ranpli avek larm, me i pa ti pe plere. Non, non, non, i pa ti pe plere.*

*Mark ti'n ale.*

*Apré ki Msye Valk ti'n ganny kaptire son lavey, zot tou zot ti mont dan navet spasyal. Son leker ti pe bat dan son vant, e si Mark pa ti la pour reasir li, zanmen i ti pou'n pare pour antre ladan. Anndan ti paret pli gran ki ou ti pour ekspekte par son laparans deor. Ti annan en gran lekran en kote, ki ti permet ou war deor, ase kler malgre ki i ti aktyelman fernwanr deor. Par devan sa lekran ti parey dan kokpit en gro avyon avek tou sort bouton ek pti lalimyer. Konman i ti ariv anndan, Emma ti donn li en sennglas pour mete, ki ti permet li war zot tre byen. Son labous ti reste ouver. Ipa ti trouv mo pour dir. I ti'n gard sa sennglas konman souvenir.*

*Lars ti'n koup en pti bout son zorey, i ti pe sennyen. Bannla ti panse. La, zot ti dekouver osi aköz MsyeValk ti pe sey touy Mark. Ti senpleman en kriz zalouzi e gro ker. Malabek ti'n resevwar en ta laglwar pour sikse fer en zanfan avek laras imen e osi pour son konesans*

*profon lo sa ras, en laras ki ti egal bann Nizouyen dan lentelizans. Letan i ti pour retourn tvek Mark Nizou, ti annan en promosyon pe esper li, en promosyon pour vin Direkter Zeneral Departman Resers Spasyal, en pozisyon ki MsyeValk ti kwrar ki li ki ti merite. Apré ki i ti pou'n touy Mark, i ti pour deklar Malabek konman pli gran manter ki egziste e fer li ganny pouse dan zot Departman Resers Spasyal. Madanm Valk pa ti kapab aret demann leskiz pour son mari. I ti enplor Malabek pour pa fer kondann son mari. Ki ti pour arive avek Msye Valk, Zan-Iv pa ti konnen. Pa ti enteres li nonpli.*

*Mark ti'n ale.*

*Bannla ti debark li deryer lakaz Tant Lina dan pti nefer diswar. Tant Lina ti'n fatige espere, i ti'n fini telefonn lapolis pour deklar zot perdi. Me, avek sa movetan, lapolis ti'n dir li ki napa nanryen ki zot kapab fer. Zot ti pou bezwen esper lizour fer. Zan-Iv ti rakont Tant Lina tou sa ki ti'n arive. Zot ti ganny letan prepar zot zistwar pour lapolis. Kelken ti'n atak Mark tousel kot lakour. Aparaman, Mark ti'n tay dan bwa. Zan-Iv in al sey rod li, me i pa'n trouv personn. Lapolis ti arive dan pti nefer bomaten, apré ki Tant Lina ti'n apel zot ankor. Leksplikasyon par isi, kou-d-telefonn par laba, anfen en douzenn gard ti kit lakour pour al rod Mark dan bwa. Me ti zis en fars.*

*Mark ti'n ale.*

*Souden, ti annan en bonzour msye-madanm. Ni Tant Lina, ni Zan-Iv pa ti reponn, me Zan-Iv ti leve pour al gete lekel. En zoli fiy ti aparet. Zan-Iv ti toudswit rekonnet sa seve rouz. Ti Tanya! Son figir ti pal, son lizye ti rouz konmsi kelken ki'n pler lontan.*

*“Mon kapab war Mark silvouple?” I ti demande dan en lavwa tranblan.*

*Tant Lina ti zis fer en pti irle. Zan-Iv ti reponn dan son plas,*

*“Mark in disparet.”*

*Tanya ti soke. I ti asiz lanmenm lo bar lavarang, son lizye gro, e i ti dir,*

*“B ... be ... mon ansent pour li!”*